

**NINTH MIZORAM LEGISLATIVE ASSEMBLY
(FOURTH SESSION CUM BUDGET SESSION)**

LIST OF BUSINESS

FOR SECOND SITTING ON FRIDAY, THE 21st FEBRUARY, 2025
(Time 10:30 A.M to 1:00 P.M. and 2:00 P.M. to 4:00 P.M.)

OBITUARY

1. **PU LALDUHOMA**, Hon. Chief Minister to make obituary reference on the demise of Dr. Manmohan Singh, former Prime Minister of India.

QUESTIONS

2. **Questions** entered in separate list to be asked and oral answers given.

DISCUSSION ON MOTION OF THANKS

3. Discussion on Motion of Thanks on the Address of the Governor (to be concluded).

PRIVATE MEMBERS' BUSINESS

4. *Resolutions.

VANLALTHANTLINGI
Commissioner & Secretary

Please see Bulletin Part-II No. 68, dated the 14th February, 2025 for relative precedence of Private Members' Resolutions to be moved.

SPEAKER : *Lalpa mit chu mi felte chungah a fu a, A beng pawh an tawngtaina lamah a chi si thin a; Amaherawhchu, Lalpa hmel chu thil tisualtute chungah a awm thin, tih a ni si a.*

- I Petera 3:12

Vawiinah hian kan member zahawm tak, Hon'ble Minister for Health, Pi Lalrinpuui, rokhawlhna avangin kan zingah a awm thei lo tih House hriatah ka puang e.

Vawiin hi kan business a inchherchhuan deuh hlek dawn a, hun hman dan pawh member ten thiam deuh turah ngai ta ila.

OBITUARY:

A hmasain Obituary lamah kal ila. Vawiin hian kan ram hruaitu kal ta sunna hun kan hmang dawn a. Kan sun tur hi former Prime Minister of India, Dr. Manmohan Singh a ni a. Obituary hun hmang turin: -

1. Pu Lalduhoma, House Leader;
2. Pu Lalchhandama Ralte, Leader of Opposition;
3. Dr. K. Beichhua, BJP Group Leader;
4. Pu C. Ngunlianchnunga, Congress party aiawhin.

Tunah Pu Lalduhoma, kan House Leader zahawm tak ilo sawm ang u.

PU LALDUHOMA, CHIEF MINISTER: Pu Speaker, Dr. Manmohan Singh, Ex-Prime Minister, India hi December ni 26, 2024 zan dar 9:51 ah AIIMS (All India Institute of Medical Sciences), New Delhi-ah kum 92-mi niin a boral a, December ni 28, 2024 khan sorkar chawimawina famkim nen vuiliam a ni.

Dr. Manmohan Singh hi Pu Gurmukh Singh leh Pi Amrit Kaur te fa niin, September ni 26, 1932-ah Gah (West Punjab) thingtlang khuaah a lo piang a. Kum 1958 September ni 14 ah Pi Gursharan Kaur nen inneiin, fanu pathum an nei a ni.

Zirna lamah chuan pawl li thleng chu an khua, Gah Govt. Primary School, Urdu medium-ah a kal a. Punjab University-a a zirchhuah hnuin, University of Cambridge-ah Master Degree a zir leh a, hemi hnu hian University of Oxford atangin Doctor of Philosophy a zo leh a ni.

Dr. Manmohan Singh hi politics-a a zuan luh hma pawhin India ram tan a thawh hlawk hle a. Hna pawimawh leh lian tak takte lo chelh tawhin, chung zinga a langsar zual te han tarlang ila: -

- i) Economic Adviser, Ministry of Foreign Trade;
- ii) Governor, Reserve Bank of India;
- iii) Director, Industrial Development Bank of India;
- iv) Secretary, Ministry of Finance (Deptt of Economic Affairs)
- v) Member-Secretary, Planning Commission;
- vi) Advisor to the Prime Minister of India on Economic Affairs;
- vii) President, Indian Economic Association;
- viii) Chairman, India Committee of the Indo-Japan Joint Study Committee;
- ix) Secretary-General & Commissioner, South Commission, Geneva.

Heng bakah hian sawi tawh angin nihna/chanvo pawimawh tak tak chelhin, India ramin hma a sawnna turin theihtawp a lo chhuah tawh thin a ni.

Rajya Sabha, Member atan Assam atangin tum 5 heng - 1991, 1995, 2001, 2007 leh 2013-ah te hian thlantlin a ni a. Tin, kum 2019 khan a vawi rukna atan Rajasthan atangin MP (Rajya Sabha) atan thlantlin a ni bawk. Kum 1991 - 1996 chhung khan Union Finance Minister niin, ni 21 March, 1998 - 21st May, 2004 chhung khan Leader of Opposition, Rajya Sabha a ni bawk a ni. Congress Sorkar-ah ni 22nd May, 2004 - 26th May, 2014 chhung khan Prime Minister niin, Sikh sakhaw zuitute atanga India ram Prime Minister ni thei hmasa ber a ni nghe nghe a ni.

Dr. Manmohan Singh hi Indian Economist ropui leh Parliamentarian ropui tak a ni a. Union Finance Minister hna a chelh lai (1991-1996) kha India sorkarin sum leh pai dinhmunah hun khirh tak a tawh lai a ni a, chu hun khirh leh hun thim tak atanga India ram sum leh pai dinhmun siam tha turin '*Liberalisation Budget*' hmanga huaisen taka hma a lak ngamna kha a chhuanawmin, India ramin bung thar a kai lehna bul a nih bakah, khawvelin 'Economist Ropui' tia an hriatna a lo ni ta bawk a. ni. Kum 2004 atanga Prime Minister a nih hun chhunga India leh ram dangte thawh hona tur policy a duan te chu India history-a hun pawimawh tak niin, vawiin thlenga India rama cheng mipuiten kan chhawr tangkai em em - National Rural Health Mission (NRHM) te, National Rural Employment Gurantee Act (NREGA) te bakah Right to Information Act (RTI) te hi Dr. Manmohan Singh Prime Minister a nih chhunga duan leh hman theih tura dan-puitlinga hlankai vek a ni. Kum 33 chhung zet Rajya Sabha Member a nih hnuin, kum 2024, April thla khan Politics chu a chawlhsan ve ta a ni.

India ramin Dr. Manmohan Singh hi a ui tak zet a, ram leh hnam tana hna a lo thawhte a ngaihlu in, a chhuang hle a ni. Ka lawm e.

PU LALCHHANDAMA RALTE, OPP. LEADER: Pu Speaker, ka lawm e.

Kan House Leader zahawm takin Dr. Manmohan Singh chanchin a sawi baka tlema zawng han sawi ve ka duh chu, India Prime Minister 14-na niin, Parliament-ah kum 33 zet member niin, ram tan ro a rel a. Amaherawhchu, Rajya Sabha member char char a ni a. 1999 Lok Sabha election-ah Delhi South atangin a ding ve a, vanduaiah a tang a; chuti chung chuan India ram hian a mi-ngaihsan a ni reng a ni.

Tin, India ram economy tluchhia siamtha tura India fa-neih that a ni tih a lantir a. Amah hi kum 1962 khan Oxford University, London atanga economics subject-a Doctorate Degree nei a ni a. Hei chang ni lovin, mithiam bik anih avanga Honorary Doctorate Uiversity pasarih ngawtin an pek a ni. Chutiang khawpa khawvelin a ngaihsan a ni a. Saudi Arabia pawhin an ram chawimawina sang, *Order of King Abdul Aziz*, kum 2010 khan an pe a. Japan sawrkar pawhin Order of the Paulownia Flower, 2014 an pek, India fa chhuanawm a ni.

India ram economy inkharkhip tak, mipui tam si, economy chaklo taka awm pawh a khawhawirawn thlak a, multi-national company te laluta India ram economy siamthatu Dr. Manmohan Singh hi India tan a pawimawhna a lang zel dawn a ni.

Sawi belh hram ka duh chu - a nun kha kan hmu thin a, a entawn tlak khawp mai. Pa-tawng

tam lo, nun tak nei leh mi-zaidam tak a ni. Amaherawhchu, thu sawi ve mai mai lo, a thusawiah nghet taka a ding thin a ni. Tin, amah thusawi pakhat an sawi chu, “*A chang chuan, hringnuah hian kalpui duh neia at-tlatna (tih-tlat) hi a tha a; tun hi at hun a ni*” tiin, Indo-US nuclear deal lai pawh khan chu thu chu a sawi a ni.

Chuvang chuan, Indian Economy chawinung thatu, khawvelah pawh India chawisangtu kan Prime Minister zahawm tak vawiinah kan lo sun ta hi thinlung takin kan sun a ni. A nupui, Pi Gursharan Kaur leh a fate Pathian thlamuanna an chan ka duhsak e.

DR. K. BEICHHUA: Pu Speaker, ka lawm e. Khawvel mi-ropuite, mi-thil titheite sun an lo ngaiin, thlah an lo ngai thin a ni. Chutiang chuan, Dr. Manmohan Singh pawh vawiinah sunna hun kan hmang mek a ni a. Kan hotute’n a chanchin kimchang takin an rawn sawi tawh a, khalam kha ka sawi nawn lo ang a. Vawiina kan sun mek Dr. Manmohan Singh hi, amah ngeiin, ‘accidental politician ka ni,’ a ti a, ‘accidental Prime Minister ka ni,’ a ti a ni. Chutiang chuan, accidentally a politician a nihna leh *accidental prime minister* a nihna chu India-mipui hian kan chhawr nasa hlein ka hria a.

Kum 2014-a Prime Minister Office a chhuahsan dawn khan, press conference a neiha a thusawi lar tak chu, “*History will be kinder to me than the contemporary media*” a ti a ni. Chu chu a thih hnu hian a dik hlein ka hria a. Prime Minister a nih laia national media te beihna nasa tak karah ngawih a chuh a, a dawhthei a, a insum a; a dawhtheihna chuan vawiina a chanchin kan sawi pawh a tinem duai mai a ni. A sawi ang ngeiin, media ten a chanchin an sawi leh an puanchhuah aiin, India ramah a chanchin chuan a tithangmawi ta zawk ngei a ni. Hei hian pa-ropui tak a nihzia tichiang a, keini pawh hian amahah zir tur tamtak kan neiin ka hria. Kum 1990 chhoa India ram economy siam tha tura policy a duan, khawvel insumdawn tawna chungchangah India dan khauh tak te thlah dula, deregulation, privatization leh foreign investors te tana India ramin kawngkhar a hawn chu khawvel pum ei-leh-barah dinhmun sang taka India kan invawrh chhoh theihna chhan te pawh hi niin a lang. A thiamna leh ngaihtuahna senga ram tana hna a lo thawh tawhte hi a chanchin kan sawia kan hmaih ngaih loh tur a ni.

Pu Speaker, Prime Minister anih laia India rama mi-harsa tak takte leh dinhmun khirh tak taka awmte khai chhuah a tulzia kha a hmu chiang hlein ka hria a, chung te avang chuan tuna kan hman tangkai em em *Ni 100 Inhlawhna* MGNREGS kan hriat bel em em te pawh hi ama hun laia lo duan chhuah kha a ni a. Chutiang chuan, zirlaite education lama hma kan sawn theih nan tiin *Right to Education* te pawh kha a hun laia siam chhuah a ni. Chu lo ah chuan, miharsate ei leh barah hnianghnar zawka an kal theih nan tiin *National Food Security* te pawh kha ama hun laia siam a ni. Chu bakah chuan, *Right to Information Act* te pawh kha a hun laia duan a ni a, transparency government a awm theih nan tiin theih tawp chhuahin hma a la a ni. India ramin hruaitu ropui tak, hmathlir nei tha tak kan thlah liam ta mai hi BJP Party chuan uihawm kan ti a, kan ui tak meuh meuh a ni. Mi-zaidam leh inngaitlawm, pa-fing, thawkrim leh mi-rinawm a nih piah lamah, India ram tana sulhnu ropui tak tak a hnutchhiah te hi, ‘chhuan lo la awm zel turte tan min hnutchhiah a ni’, tih vawiina he ram hruaitute hian kan theihngilh loh a tha hlein ka hria. Dr. Manmohan Singh hi India ram economy siamthatna leh hmasawna kawngah kan theihngilh loh tur mihring, pa-ropui ani a, vawiin ah BJP party chuan ‘kan ui hle a ni’ tih he House ah hian ka rawn sawi a ni. Ka lawm e.

PU C. NGUNLIANCHUNGA: Pu Speaker, ka lawm e. Kha, kan kan hotute - party hrang hrang atang te leh kan House Leader atangin Dr. Manmohan Singh a chungchang leh a hnathawh ropui tak takte kan ngaithla tawh a, han sawi belh chiam tur a awm vak loin ka hria a. Chutih rual chuan kan ngaihthlak tak ang khan, Dr. Manmohan Singh hi India ram tan miropui, mipuite leh mirethei zawkte tan thil tha hnutchhiaha, he khawvel chhuahsan tu a ni hi a ropui ka ti a. Vawiin nia Central-a BJP sawrkar, Pu Narendra Modi a khaihhruai ngei pawh hian ni 27.12.2024 (a thih tuk) ah khan Union Cabinet Meeting ah minute hnih lai mai sunna an nei a. Chumi piah lamah chuan India ram flag a ngul chanve ah ni 7 chhung ngawt mai zar a ni.

Kan ngaihthlak tak ang khan, ani hi MP pawh a nih hma atangin Finance Minister a ni a; amahina sawi ang takin, *'accidental finance minister'* tih hial a ni. A hnathawh ropui tak tak - India ram economics reform te kalpuiin vawiin, tun hunah chuan India thilsiamte khawvel ram dangah thawnehhuaha hmuh turin a awm a, chutiang chuan khawvel ram dang siamte pawh he India ramah hian kan kawt tualah hmuhin a awm tawh a ni. Heng hi ama hmalakna a ni.

A bik takin vawiiina mi rethei leh chan haite tan nasa takin hma a la a, Congress Party kan thuthlung pakhatan chuan, mi-hnuaihngung leh rethei zawkte chawikana, an chanvo tur an hmuh hi a takin a nunpui a ni. Kan ngaihthlak tak ang khan, *Ni 100 Inhlawhna* (NREGA) te hi a bik takin keini thingtlang bial tan phei chuan a hlu em em a ni. 'Hei hi awm lo ta se engtin nge kan bial mipuite hi an awm ang' tih te ngaihtuahnaah a awm thin. Vawiin niah hian nasa takin kan chhawr tangkai a. Chu mai chu ni lovin, covid pandemic khawvelah rapthlak takin, India ram pawh a rawn tuam ve a; chungah te chuan India ram pumpuia hripui a len lai khan, heng thil thleng - *Ni 100 Inhlawhna* avang hian India economics pawh a rawn siam tha chho leh a ni.

Chutiangin, Right to Information Act te, 12th Oct, 2005, ah khan hman tan a ni a, hengte hian *Prime Minister-ropui* a nihna a ti lang chiang hle a ni. Ram hruaitu kan ni a, tam tak chuan kan thil tih leh kan hnathawhte mi zawng zawng hriata pholan hi kan duh lem lo a ni. Dr. Manmohan Singh erawh chuan tute pawhin kum 20 kal ta thleng pawha kan hnathawh dik lote a lo awm palh a nih pawhin, mite'n an hmuh theihna turin sawrkar-langtlang, sawrkar tha siam a nih theihna turin *Right to Information Act, 2005* a han duang chhuak a, 12th Oct, 2025 ah hman tan a ni te kha a ropui ka ti takzet a. *Tin, Right to Food Security Act, 2013*, 'AAY' kan tih, mirethei ten ration buhfai kg 35 a thlawna an dawn theihna te, ...*(technical error)*... Tin, PHH atangin buhfai mi pakhatin kg 5 zel, a thlawna an han dawng thei te hi, a bik takin keini India ramah pawh State kilkhawra hnam hnuafual dinhmun harsa tak takte awmna ram atan hian 'a va han hlu lehzual em' ka ti a ni. Chu mai piah lamah chuan, National Health Mission hnuai raipuar vaccine pek ang chi te pawh hei hian nasa takin thingtlang mite hnen a thleng a ni. Hetiang hruaitu ropui a nihna a thiltihah a lang hi a chhuanawm ka ti a.

Tin, kum 1993-94 khan Border Area Development Fund (BADP) te tihchhuah a ni a; hei hi tunah phei chuan a tawp ta niin ka lo hria a, (ka hresual em ka hre lova). Khang te kha border area a awmte tan a tangkai em em a ni. Sum leh pai tam tak BADP hnuai ah kan hmu a, kha khan infrastructure inkalpawhna te, hall te, sikul-in te, tui in tur han lakna tur te kan nei thei kha a ropui a. Thingtlang mite tana Dr. Manmohan Singh-a thiltih vawiiinah hian sawitur tam tak a awm a, amaherawhchu kan ngaithla tawh a.

Tichuan, ka han duhtawk dawn ang a. Kan zingah awm tawh lo mahse, Dr. Manmohan Singh-a kaihhraina hnuaiah Central Congress sawrkarin India ram mipuite tana dan tha tak tak leh scheme belhchian dawl tak tak a lo siamte chu thangtharte nun tinuamtu, kawng hrang hranga kan nun tinuamtu, tiawlsamtu a ni. Heng a thawhrah te hi Congress party chauhkan kan chhawr lova, Mizoram-ah pawh MNF party te, BJP te, ZPM te, neutral leh mipui ten kan chhawr nasa em em a ni.

Dr. Manmohan Singh-a hi thusawi thiam a ni ngai lova, thusawi a thiam avanga hria kan ni lova. Mahse, hnathawk thiam mi a nihna erawh chu khawvelin a hriat dan a ni a, a ropui takzet a. Vawiina ram roreltute pawh hian hnuhma tha hnutchhiah tum theuh ila, he kan ramah hian engtik niah emaw chuan, he House-ah ngei pawh hian kan chanchin an la sawi ve dawn a ni. Chutih hunah chuan ram mipuite, rethei changhai zawkte leh he Zoram pumpui huapa roreltu kan nih theihna turin a nunah zirtur ropui tak min hnutchhiah a ni, tih kan hriat ka duh a ni. A kalsan tak a nupui leh a fanaute, “Pathian thlamuanna, rilru reng renga hriat sen lohin thlamuanin, awmpui rawh se” tih hi kan tawngtaina a ni e. Ka lawm e.

SPEAKER : Sawi duh dang kan la awm em aw? Kan awm tawh loh chuan; hei Dr. Manmohan Singh-a hi ‘Architect of Indian economy’ tih a ni a, a uihawm takzet a ni. Aw le, a sun nan kan zain minute khat i lo ding ang u.

(Memberten a sunnan minute khat an ding a...)

I thu ang u le. Tunah chuan *Zawhna & Chhanna* ah kan kal nghal ang a.

QUESTIONS & ANSWERS:

Starred Question No. 1: Labour, Employment, Skill Development & Entrepreneurship Department.

Zawhna Neitu: Pu Jeje Lalpekhlua, South Tuipui Bialtu.

PU JEJE LALPEKHLUA: Pu Speaker, ka lawm e. ‘Tuipui South’ ni lovin, South Tuipui’ zawk. (**Speaker:** Sorry, South Tuipui.)

Pu Speaker, Starred Question hmasa ber zawhna ka chang thei hi lawmthu he House zahawm tak kaltlang hian ka rawn sawi duh a. Labour, Employment, Skill Development & Entrepreneurship Department changtu Minister, Pu Lalnghinglova Hmar chhan atan ka zawhna chu:

Hnahtial District ah hian Labour, Employment, Skill Development & Entrepreneurship (LESDE) Department dah tumna a awm tawh em? tih hi a ni e. Ka lawm e.

SPEAKER : Chhang turin Labour Employment, Skill Development & Entrepreneurship Department changtu Minister, Pu Lalnghinglova i lo sawm ang u.

PU LALNGHINGLOVA HMAR, MINISTER: Pu Speaker, ka chhanna chu hetiang hi a ni e: -

Sorkarin a ngaihtuah mek a, November ni 20, 2024 khan office hawn phal dilna hi thehluh a ni tawh e”. Ka lawm e.

SPEAKER : Zawhbelhna zawt turin

1. Pu Jeje Lalpekhlua (Zawhna neitu),
2. Dr. K. Beichhua,
3. Pi Baryl Vanneihsangi,
4. Pu C. Ngunlianchunga.

PU JEJE LALPEKHLUA: Pu Speaker, ka zawhbelhna chu –

LESDE office hawn hma hian tuna kan mamawh phuhruk turin ruahmanna siam a ni em?

DR. K. BEICHHUA: Pu Speaker, ka zawhbelhna –

- i) Mizoram MYC hnuaiiah hian coaching center engzat nge kan neih?
- ii) Siaha-a coaching center kan neiha furniture te saw ka MLA fund atanga lei vek a ni a. Tin, in luah man pawh ka MLA fund atanga tum a ni a. Nikum August ni 31 ah khan Co-ordinator pakhat leh IV-Grade pakhatin banna lehkhah an hmu thut mai a ni. September ni 1 ah Siaha District ZPM Vice President fapa Co-ordinator atan appoint a ni a. Chutiang chuan Siaha District ZPM Treasurer nau pawh September ni 1 ah IV-Grade atan appoint a ni. Khang an ban takte kha engvanga ban nge an nih? Show Cause Notice pawh engmah a awm lova, an tihsual sawi tur pawh a awm hran lo a ni. Tin, an lak tharte kha eng criteria-a lak nge annih? Written in nge, interview through-in? Nge, politics-a induhsakna avanga lak?
- iii) A thawktute hlawh hi regular-a pek a ni em? Tin, in luah man ba a la awm em? Awm ta se, engzat nge kan bat? Pu Speaker, ka lawm e.

PI BARYL VANNEIHSANGI: Pu Speaker, LESDE changtu Minister ka zawhbelhnate chu: -

- i) LESDE hnuaiia skills training hrang hrangah hmeichhe pual bik training kalpui a ni em? Anih chuan, engte nge min hrih thei em?
- ii) Labour Cess tlingkhawm hi education lamah hman theih em? Mizoram sorkarin chutiang chu a ti ve tawh em? A la tilo a nih chuan, hmang tura ruahmanna a awm em? Ka lawm e.

PU C. NGUNLIANCHUNGA: Pu Speaker, ka lawm e. Question pathum ringawt chu a tlem lutuk deuh a ni. Kan Dan-ah pawh khan 5 chin kha Speaker thu a ni a, I duh chuan a dang pawh min pe thei a. Hei hi keini lam kan chan ve deuh a ni a, kan question a chhuak mawh ropui si a (**Speaker:** Vawiin hi business a inchherchhuan nasa riau mai a, business dang kha a nek chep ang tih kha a hlauhawm a..) Pu Speaker, ka lawm e.

Ka zawhbelhna chu: - Nikum budget ah pawh khan ka sawi tawh a; Lawngtlai LESDE office hi IV-Grade pakhatin a awp a, chu zawng chu a ni a; a van manganthlak em! Sawti reng sawn em ni min dah dawn? Mizoram-a district ah pawh a lian pawl tak kan ni a. Helai hi sorkar hmasa pawh ni se, Lawngtlai hi ngaihsak kan hlawh lo ang reng khawp a. Tun sorkar hian Lawngtlai district-a LESDE office tihchangtlun nan emaw, hmalak tumna te, staff dah belh tumna te a nei em? IV-Grade pakhatina a awp reng hi chu, a manganthlak deuh a ni. Minister zahawm tak hian he thilah hian ruahmanna a nei reng em? Ka lawm e.

SPEAKER : A theih ang anga chhang turin a changtu, Minister Pu Lalnginglova Hmar ilo sawm ang u.

PU LALNGHINGLOVA HMAR, MINISTER: Pu Speaker, ka lawm e.

Pu JeJe Lalpekhluva South Tuipui bialtu zawhna chhanna chu: – Hnahtial-ah chang nilovin, district tinah hian tun dinhmuna office kan neih lohnaah pawh District Committee a ding a, DC kaihhruaina a ni a. Tin, District Skill Committee hnuai-ah hian District Skill Development plan an siam thei a, chu chu LESDE office kan la neih lohna district-a kan DC-te theuh hian an tih theih vek a ni a, chu chu kan secretariat ah emaw, directorate ah emaw rawtna an rawn thlen thei a ni.

Chutih rual chuan, tunah hian ‘Mizoram Building and Other Construction Workers’ Welfare Board’ kan tihah hian, mi tam zawk dan dik taka inziak lut turin awareness campaign te kan nei a. Tin, multi media lamah campaign te kan nei bawh a. Chutah chuan (a figure chiah ka hre lova,) mi 5000 chuang labour dik takte tunhnaiah an inziak lut a ni. Chungcho tan chuan Aizawl-ah emaw, hmun dangah emaw renewal fee pek a harsat avangin, office kan la din hma pawh hian district tinah District Facilitator dah kan tum a, chutiang tur chuan ruahmanna kan nei a; nikum lama welfare board meeting-ah pawh kan pass tawh nghe nghe a ni.

Tichuan, Pu JeJe Lalpekhluva zawhna ka chhanna chu: - Office kan la din hmaa harsatna phuhruk turin DC ah District Skill Committee a awm a, DC te dawr theih a ni. DC ten district milin District Skill Development plan an siam thei a. Tin, Labour Welfare Board memberte’n LESDE office an mamawhna taka mipuiin an dawr thina kha, district tinah facilitator district dah kan tum a, chutiang tur chuan ruahmanna a kal mek a ni.

Dr. K. Beichhua, Siaha bialtu zawhna ka chhanna chu: - Mizoram Youth Commission hnuai a ni a, LESDE hnuai mah nise ka zu hre kilh kelh lova. Amaherawhchu, MYC hnuai-ah hian center 5 kan nei a, thawktu 11 kan nei bawh a. A lak danah hian sorkar hmasa leh tun sorkaraa an lak dan te a inang vek em, tih ka hriatpui kilh kelh lova, ziakin kan rawn chhang ang a. ‘Engtikah nge an laka, engtikah nge an tawp’ tiha kha – A hmaa mite kha a tawp tawh a, kan pawtsei zel a. Tun tumah hian MYC Bill hi kan pulut dawn a, chumi hnuah chuan changtlung zawk lehawmze nei zawk, a thawktute pawha lukhawng nei zawk leh nghet zawka lak theih a ni tawh dawn a. A hmaa an lak dan kha ring chhunzawm tawh lovin, a tharin tunah hian kan pulut dawn a, awmze nei zawka kalpui tum a ni.

Tin, a rawn sawi bik tak kha a hranpaa ka hre lova, Mizoram Youth Commission hi autonomous body tho a ni a, anmahni nen inrawnin, ziakin kan rawn chhang dawn a ni. Tun leh tunah kan inzawt si a, ka sawi thei mai lo a ni; I sawi bik lai kha. Min lo hrethiam dawn nia.

Tin, Aizawl South-III bialtu Pi Baryl Vanneihsanghi zawhna – ‘Hmeichhe pual bik’ han tih khan, hmeichhe pual bik kha a awm nual thei a. Tin, mipa nena thawh kawp theih te pawh a nih ka ring a. Labour Welfare Board hnuai-ah *Beauty and Wellness Sector* hnuai-ah khan chi hrang hrang, amahina a hriatthiam tur chi - nail technician zirna te, beauty therapy zirna te pawh kan nei a; a danglam dan kha ka hre vak lova. A job role ah chuan, Senior beauty therapist zirna te pawh kha kan la nei leh zel a ni.

Tin, *Tourism and Hospitality* hnuai-ah House-keeping zirna a awm a, a parent-sector hnuai-ah hian fashion designing leh puanthui zirna te pawh a awm a. Chungte chu hmeichhe pual bik a ni em phei chu ka hre lova; mipa pawhin a thawh theih tho na in hmeichhe pual deuh chu a ni

awm e. Tin, baking zirna te pawh a awm a, chu chu tuna ka chhan theih chu ni se.

Tin, “Labour Cess tlingkhawm education atan a hman theih em” tih hi, education hi a hman phalna zinga mi a ni a. Tin, Education atan Labour Welfare Board-a inziaklutte, an fate zirna atan pawisa pawh dah a ni a. Tin, pawisa pek theih chin pawh tunhnaiah khan tihsan a ni a, a letin kan tisang thawk thawk a ni. ‘Pawl chuti zat anih chuan’ emaw, ‘BA a nih chuan’ emaw, ‘zirna sang bik emaw a nih chuan’ tih zawng zawng kha tunah kan inchhang theilo nain, chung zawng zawng chu a awm a. Tin, kan ruahmanna lian berah chuan, education-ah hian model school din kan tum a, Labour Welfare Board atang hian 4 aia tlem lovin bul kan tan phawt ang kan ti a. Chutah chuan, labour fate an luhna tur zirna tha zawk, a building te pawh ti changtlung ila, a hmun-hma te pawh chei tha ila, zirtirtute pawh a tul a nih chuan heng pawisa atang hian rawih belh ila, tiin.

Ka han sawi thui deuh ang a, Pu Speaker. Tunhnai khan Labour Ministers’ Conference-ah ka zuk kal khan Union Labour Minister te bakah kan Commissioner leh Secretary te, State dang minister zawng zawngte pawh an awm a. Chutah chuan he thu hi ka sawitel deuh kher a – “Kan dan hmanlaia hi UP te, Maharashtra te nen ang khatin min hrut a. Nangniin a crore tel in sawi a, keiniin number pawh a-sangin kan sawi a; nangniin a nuai tel in sawi kha, keini tan a sang bi te a ni a. Kan intam hleih em em a, dan pakhata inhrut rual ringawt hi chu a remchang lova. Kan tan Dan hranpa in siam thei a nih loh pawhin, a dan bawchhe si lovin, a pawhfan min phalsak ula, chutiang chuan kal kan tum a ni” kan ti a. Tichuan, education pawh hi he Labour Welfare Board-a pawisa tlingkhawm hian na taka kalpui kan tum a, chutiang tur chuan ruahmanna pawh kan siam tawh a ni.

Tin, Lawngtlai West bialtu, Pu C. Ngunlianchungza zawhna chhanna chu - Tun dinhmunah LESDE hian office kan la nei tam lo em em mai a. Aizawl, Lunglei, Champhai leh Siaha hi kan neih pangngai chu a ni mai a. Lawngtlai-a kan neih hi (i sawi ang khan) a changtlung lo em em mai a, IV-Grade pakhatin a enkawl a. (I in, i building a ni a, kan luah kha). Tuna kan sawi ang khan, facilitator neih kan tum a, district tina an inziah luh theihna tur. Tin, nichina Pu Jeje Lalpekhlua zawhna ka chhanna ang khan, nikum 20th November khan district tina office din phalna sorkarah thehluh tawh a ni a. Sorkar sum leh pai dinhmun ziaawm chho se chuan kan rawn din thuai thei turah ngai ila. Eng pawh ni se, tun dinhmunah chuan IV-Grade pakhat bakah khan district-ah facilitator kan rawn dah dawn a. District skill chungchangah chuan Lawngtlai pumpui tan District Skill Committee a awm a, anni kaltlangin harsatna a awm a nih chuan a dawr theih reng a ni.

DR. K. BEICHHUA: Pu Speaker, Siaha chungchang ka zawhna kha - Mahni bial a nihna angin theihtawp chhuahin kan lo enkawl ve a, In luah man te, furniture te ka sawi tawh kha. Chutih laiin 31st August-ah engmah awm lova banna order rawn chhuaha, a tuka ZPM hotute’n an naute, an fate an appoint nghal mai kha a serious riauin ka hria a. ZPM chuan, ‘party duhsak bik kan nei lo ang’ tih kha in thupui a ni a, chutih laia khatianga thil a thleng ta mai kha. An recruit dan kha a party base lo ni ta se, kan minister hian a cancel thei ang em? tih lai kha tuna min chhan theih loh pawhin, ziakin min lo chhang thei se, Pu Speaker.

SPEAKER : Kha kha chu minister nen khan ziakin in la inchhang turah ngai ang aw.

Vawiina kan Business hi ka sawi ang khan, *Obituary* kan hmang a, tunah hian *Q & A* kan

hmang mek a. Governor Speech-a *Motion of Thanks* hi kan la sawi viau dawn a. Tin, *Private Members' Resolution* pawh a la awm a ni. Chuvang chuan, vawiina kan hun hi a chep deuh hlek avangin, member zahawm tak Pu Ngunlianchnunga khan, 'hun a tlem mah mah mang e' a tih kha, business dang kha kan neksawr lutuk kha a dik bik si lova, kan han ti deuh zung zung ang a. Sawi tak ang khan, zawhna neitu zawhbelhna leh a bak pahnih dang kha kan la ang a, chutiang chuan tih hram hram kan tum dawn nia.

Starred Question No. 2: Tui lakna chungchang.

Zawhna Neitu: Pu Lalchhuanthanga, Aizawl South-II Bialtu.

PU LALCHHUANTHANGA: Pu Speaker, ka Starred Question 2, PHED Minister chhan atana ka zawhnate: -

- a) Aizawl khawpui tui lakna khawl hi tui lianin a chim theih tawh lohna turin department-in ruahmanna a siam em?
- b) Ruahmanna a siam a nih chuan, chung ruahmannate chu min hrilh theih em?

SPEAKER : Vawiin hi PHED zawhna a chhuak tluang riau mai a, a minister pawh a rim dawn deuh niin a lang a. Aw le, a theih ang anga chhang turin Public Health Engineering Department changtu Minister zahawm tak, Prof. Lalnilawma i lo sawm ang.

PROF. LALNILAWMA, MINISTER: Pu Speaker, ka lawm e. Zawhna chhanna chu -

- a) Aizawl khawpui tui lakna khawlte hi tui lianin chim theih tawh lohna turin PHE Department in ruahmanna a siam mek a ni.
- b) Vertical Turbine Pump House, Clear Water Pump House, Duty Room, Clear Water Sump te hi tuna an awmna atanga 2.7 - 3 mtrs ah chawisan vek tum a ni.

SPEAKER : Zawhbelhna zawt turin: -

1. Pu Lalchhuanthanga (Zawhna neitu);
2. Pu VL Zaithanzama,
3. Pu Rasik Mohan Chakma,
4. Pu H. Ginzala.

PU LALCHHUANTHANGA: Pu Speaker, ka lawm e. Ka zawhna te chu -

- i) Tuna khawl awm sate awm hmun chawisan tawp loh deuh hian phase-II awmna Dihmunzawl anga hmun sangah te hian sawn theih a ni ang em?
- ii) Tuna ruahmanna kal mek tawh hi eng chen nge a thlen tawha, sum ngai zat tur tlangpuite min hrilh thei em?
- iii) Aizawl khawpui chhung tui pump leh sem chungchanga kan tun dinhmun min hrilh thei em?

PU VL. ZAITHANZAMA: Pu Speaker, ka lawm e. Tui lianin kan tui pump khawlte min tih chhiat sak a tunah khua alo thal a lui tui kum dang ang bawkin a kamin kan mangang leh hle tan dawnin a lang a tahchuan zawhna pahnih kan zawt duh a -

- i) Aizawl khawpui chawmtu Tlawng Lui khu kum dang aiin a kam nge, a ziaawm? A dinhmun dik tak min hrilh thei em?
- ii) Khua a lo thalin tui a kam zel dawn niin a lang a. Hemi atan hian inruahman lawkna, invenna tur eng emaw siam kan nei em?

PU RASIK MOHAN CHAKMA: Pu Speaker, ka lawm e. Ka zawhbelhna chu –

i) Jal Jeevan Mission hnuai hian thingtlang khua tam tak tui pek a ni a. Mahse, plastic pipe an hman kha a tha lo lutuk a, khaw tam takah a hmantlak loh avangin an dah mai mai a. Khangte kha siamtha turin ruahmanna siam a ni em?

ii) Chawngte ah hian NABARD sum hmangin sorkar hmasa khan Greater Chawngte Water Supply Scheme, infrastructure tha tak an siam a. Mahse, khua atangin a hla deuh hlek a, enkawltu mumal an awm lova. Chuvangin, sorkar hna Muster Roll tal lakbelh a nih loh chuan kan chhawr tur angin kan chhawr thei dawn lo a ni. Tunhma chuan thla thum danah te tui kan dawng a, tunah hian kar tin kan dawng thei a, a lawmawm takzet a. Mahse, management kha a that loh chuan a chhiat thuai a hlauhawm a ni. Khangah khan staff dah belh dan a awm em?

iii) Chutiang bawk chuan, Longpuighat khua hi Chakma Autonomous District Council-a khaw lian ber dawttu a ni a, khatah khan Dam puitham deuh mai siam a ni a, a catchment area atangin km 3 laia hla a ni a. Committee enkawl chu a ni lo deuh a, chuvangin, a enkawltu chowkidar tal dah ngei ngei a ngai a ni. Khang te kha ruahmanna siam dan a awm em?

iv) Mizoram-ah hian tui bill tihsan tumna a awm em? Ka lawm e.

PU H. GINZALALA: Pu Speaker ka lawm e. Ka bial thingtlang khaw pali hi tui a harsa khawp mai a, hon. Minister zahawm takin min hriat sak sela ka duh a. Heng -Zote, Aiduzawl, Vaikhawtlang leh North Diltlang te anni a. Thal ah pheih chuan a harsa khawp mai a; hman ila chuan chawipui mai ka chak thin a ni. Chutiang khawp chu a ni a. Khawngaih takin Minister hian min duhsak se la, hei hi min ngaihtuah sak thei ang em? Ka lawm e.

SPEAKER : A lawmawm e. A theih ang anga chhang turin a changtu Minister Prof. Lalnilawma i lo sawm ang.

PROF. LALNILAWMA, MINISTER: Pu Speaker, zawhna a tam angreng a, ka theih ang angin ka chhinchhiah e.

Tuna kan tui pump awmna hi kan hriat theuh tawh angin 2017 khan tuilianin a chim a; chuta tang chuan a ngaiin kan kal chho a, nikum May ni 28 a Cyclone Remal avanga tuilian khan a chim leh a. Chutah chuan, 2017-a a chim chin ai khan ft 5 in a chim sang a ni. Tichuan, ni 28-a Cyclone Remal avanga leimin Melthum te, Saikhamakawn te khan ‘tuilian in min chim sak’ an ti a, a hmunah ka zuk kal vat a, zan thim hnuah ka rawn hawng a. Tichuan, CM hnenah, “Khumi kan tui pump khu tum hnih min chim sak tawh a, a vawithumna min chim leh chuan kan thiam loh a ni tawh ang. Chuvangin, hma lak vat a ngai a ni” tiin report ka pe a. CM chuan, “E, hmachhawpawh rawn nei ta che u” tiin min ngaihpawimawh sak a.

Tichuan, department atangin rawtna pakhat kan han siam a. Tichuan, tuna a awmna khu luikam mai a nih avangin, sawn chhoh a tha ang em, tih kan engineer te nen kan inrawn a; chu chu option pakhat a ni a. Option dang leh chu - tuna a awmna ngai ang anga chawikan chhoh kha a tha mai lawm ni, tih kha a ni a.

Tuna Pu Chhuan tea rawn zawhna kha, department chuan tuna a nihna ang anga dah kha, a man te a tam lo bawng ang a, a tha ber zawng awm mang e, tih kha kan ngaihdan a ni a. A

chhan chu, a chhaklam ramah khan han insawn dawn pawh ni ila, mimal ram a nih tawh a. Khatiang mimal rama kan tih dawn chuan sum tam tak sen a ngai ang a, khawl te pawh a thar lei a ngai dawn a ni. Chuvang chuan, tuna a nih ang ang khuan meter 3 in tisang ila, tih kan rawt ta a ni. A pump khawl leh a tui rawn luhna te kha tisang ta ila, kan ti ta a.

Tichuan, sum ngai zat tur kha engzat nge tih kha, tuna kan ruahman dan chuan crore 30 a ni a, chutah chuan tun tuma SASCI atang hian crore 11.81 min pe tawh a. Amaherawhchu, a vaia hetia tan ho a nih loh chuan, a then kan khai kana, a then a la kan si loh chuan a buaithlak dawn a. Chuvang chuan, crore 30 atanga a la bak crore 18.19 hi kan dil leh mek a. Hemi hi min pek chuan, hma kan la chho zel thei turah ngai ila. Tuna min pek sa atang pawh hian hma kan la tan dawn a ni, tih kha ka chhanna ni se.

Tichuan, zawh belhna neitu, Pu Zamtea zawhna kha – Tuilian kan tuar a; tunah hian a thal chho leh ta a; tuna kan tui dinhmun engnge, tih kha a ni a. Tuna kan tui dinhmun hi Pu Speaker, (hetah hian ka kawl a,) nikum January leh kumin January inkar data kan Engineer ten an rawn buatsaih a. Hmanni ka room-a kan thlir ho khan, “E he, hetiang chuan tui kan nghei mai dawn e; kan tui dinhmun hi a hlauhawm hle mai a, hma kan lak nghal a ngai a nih hi,” kan ti a. Tichuan, kan tui dinhmun taka hi chu, remal ina min tihchhiat sak hnu khan a khawl te kan siam a, theihtawp kan chhuah a, thla ruk pel hret hma kan la a ni. Tuna kan tui pump theih dinhmun chu hei hi a ni: -

Phase-I atangin MLD 9.68, Phase II atangin MLD 16. Tichuan, tuna SIPMIU kan tih Phase-III atang hian MLD 8.44; avaiin average in tunah chuan litre 34.12 MLD kan pump thei a. Hetiang hian pump reng thei ila chuan, kan tui indaihlohna te pawh hi kan zia tawh turah kan ngai a. Tunah pawh hian kartin vawikhat rawn sem theihna veng kan nei a, a thenah chuan thlakhatah vawi thum sem theihna te kan nei ta a. A chawhrualin *vawithum*, veng thenkhatah chuan kar tin kan rawn sem ta a ni.

Tichuan, Tlawng tui dinhmun hi – tun February ni 19, 2025 (nimin piah) kan data ah hian nikum leh tun dinhmun hi compare ta i la, nikum 19th Feb., 2024 ah khan MLD 110 kan pump laiin, discharge theih zat kumin 19th Feb., 2025 ah chuan MLD 89.139 a ni. MLD 20 lts in a inthlau a ni, Pu Speaker. Hei hi mutmawh-hnarmawh ah pawh kan neih a ngaiin ka hria. Hetia MLD 34 lts kan pump theih laia a tui kan pump-na ber Tlawng tui level a tlakhniam si chuan, khawia mi nge kan pump chuan ang le, tih laia hi. Tichuan, hemi data kan neih ve leh CM hnenah ka tlan phei leh a, kar hmasa khan, “EEE hetiang anih chuan tuna kan tuikhuahna meter 1-a tihsan kan tum mek lai, (SASCI hnuai min pek tawh) hi kuminah chuan kan tan hman dawn si lova. Tunah sum nei tawh mah ila, fur a rawn hnai tawh si a, kan zawh hman min len sak leh mai ang. October vel ah kan tan dawn si avangin, tuna tan thil hmanhmawh thlak, ruahmanna min siamsak the” ka ti a, ka va ngen rawi mai a ni.

Tichuan, Engineer te nen kan sawiho a, chutah chuan tuna kan tih theih chu temporary barrage a ni a, tuna Tlawng tui awm ang ang khu eng emaw chen khuah thena, kan mamawh hun atan kan tui pump-a lakluh tur a ni. Chutiang chuan, tunah hian kar hmasa atang khan hma kan la tan a, a hmanrua te lain kan khuap tling ang a. Hei pawh hian a daih rei lo; ruah vawikhat a rawn tlak hmaa kan hman zawh chuan kan che chhe viau dawn a ni. Chu chu kan tui dinhmun ni ta se; mipui leh House member zahawmtak te hian min lo hriatpui ta ula.

Tichuan, Tuichawng bialtu zawhna kha - hemi plastic pipe (PVC) tiha kha, kei pawhin sorkarna kan han siama office ka zawm vel leh kan Engineer te ka ko a, tuna PVC pipe ho hi Ministry ina min pawmpui a ni em; hei hi engnge? tiin zawhna ka siama a. Anih dan tur diktaka pipe kal a nih chuan emaw, khang PVC kha approved a nih chuan, GI Pipe ai pawhin pressure a do zo turah kan ngai, tih kha chhanna ka dawn a ni a. Amaherawhchu, a tlo lo lai a awm anih chuan, sorkar hmasa hma lo lak tawhna kha tunah a chhe leh a nih chuan, sorkar tharin kan bawhzui chu a ngai a ni mai a. Pu Speaker, chuti zawng chuan thlir ta ila a tha ang e.

Tichuan, “NABARD sum hmanga Chawngte tui supply kha a hlain, thawktu lak belh theih ni se, management a hi tihchangtlun deuh ni se,” tih kha – Ni e, a tul dan azirin department-in kan thlir zel a, kan lo enzui turah te pawh ngai ta ila.

Tichuan, ‘Longpuighat tui lakna enkawltu’ tih te pawh kha - Ni e, harsatna hrang hrangte a rawn lut thin a, chung harsatna rawn lut a piang chu theihtawpin department-in kan bawhzui ve zel a. Amaherawhchu, kan hriat theuh tawh angin, hna thar han lak hi thil harsa a ni a, a department concern te nen inrawna hma kan lak theih chuan, hengte pawh hi kan bawhzui zel ang, tih kha min lo hriat sak se.

Tichuan, ‘tui bill tihsan tumna a awm em’ tih hi, keini a department level-ah chuan vawikhatmah tui bill tihsan hi kan la sawi lo, Pu Speaker. Amaherawhchu, VC inthlan dawn khan tui kan mamawh a, tui hnianghnar theihnan theihtawp kan chhuah a, department-in; tui kan han hnianghnar ta a. Karkhat ah vawi 1 te, vawi 4 te kan han sem tak ah chuan tui a haw tam na na chuan tui meter kha a kal sang tur a ni. Khami a kal sang tura kha department lamin ‘tui kan dawn tam chuan, a bill a sang dawn a ni’ tih kan inhriattirna kha tute nge ka hre lova, media ah tho khan, ‘sorkarin tui bill tihsan a tum’ tih kha a ni ta a ni. Tui kan dawn tam na na chuan tuna kan rate pawh hian kal ta ila, a sang mai dawn a ni Pu Speaker; kha kha chu mi nawlpui hriat a ni. Hei hi House hian min lo hriatpui se - tui bill tihsan tumna department-in kan nei lova, tute emaw khan ‘tui bill an ti sang dawn’ tih kha min lo vawrhdarh sak a ni.

Tichuan Pu Laltea zawhna ‘min lo hriatsak se’ a tih kha, Zote te, Aiduzawl te, Vaikhawtlang te harsatna kha, a tir a ka sawi ang khan harsatna kan hriat a piang hi chu a theih ang angin department in kan lo bawhzui zel a, tuna mi pawh kha kan lo hria ang e Pu Speaker, ka lawm e,

SPEAKER : A lawmawm e.

Starred Question No. 3: PHE chungchang.

Zawhna Neitu: Pu Lalramliana Papua, Lunglei South Bialtu.

PU LALRAMLIANA PAPUIA: Pu Speaker, ka lawm e. Ka zawhna chu hengte hi an ni e-

- a) Lunglei Municipal Council Area huam chhungah PHE tui connection pangngaiin a thlen ve loh veng eng zat nge awm?
- b) Engte nge?
- c) Lunglei Greater Water Supply tihchangtlun hna thawh mek hi eng huna zawh fel tur nge?
- d) Tun thlenga a thlen chin achievement hi engnge ni?

- e) JJM hnuaiia hmalakna thingtlang lama tui thianghlim laksak kawngah tun thlenga la zawh fel loh eng zat nge awm?
- f) Hmalakna kalpui tawh ah hlawhtlin theih lohna hmun/khua a awm em?

SPEAKER : Chhang turin changtu Minister, Prof. Lalnilawma i lo sawm ang.

Lawk, khawngaihin. Hei question hour tawp hun hi 11:30 AM a lo ni ta a, Minister hi kan chhan zawh tir law law dawn em ni ang? (*House-in a remti a.*) Aw le chhang rawh le.

PROF. LALNILAWMA, MINISTER: Pu Speaker, ka lawm e. Pu Papuaia zawhna chhanna chu: -

- a) Pialthleng/Tlawng Pump (Main Reservoir) aia sang Upper Theiriat bakah pipeline thlen ve phak lohna veng pali a awm.
- b) Hrangchalkawn, Lungpuizawl, Zobawk, Upper Theiriat te an ni.
- c) Lunglei Greater Water Supply tihchangtlun hna hi hnathawh tan atanga kum 3 chhunga zo fel thei tura ruahman a ni a. Kumin 20th January, 2025 ah expenditure sanction hmuh a ni a, kum 2028 ah zawh fel beisei a ni.
- d) Tun dinhmunah hnathawhna atana mamawh material hrang hrang supply order hmanga chahte chu nghah mek a ni a, pipe thenkhat a lo thleng tawh a, physical work pawh tan vat tum a ni.
- e) JJM hnuaiia thingtlang lam tana tui thianghlim lak hna te zawh fel tawh a ni hlawm a. Amaherawhchu, sorkar laipui atanga hnathawhna pawisa dawn kim a la nih loh avangin hnathawktu – contractor leh supplier pawisa eng emaw zat bat sak a la ni. Tin, khuarel chhiatna leh chhan dang vanga hmelhem, siamthat leh tihchangtlun belh ngai thil thenkhat a awm a, hengte hi pawisa a awm hunah chul mam leh a ni ang.
- f) Hmalakna kalpui tawh ah hlawhtlin theihlohna hmun/khua a awm lo. Amaherawhchu, tui hnianghnar pek tura ruahman zat mipui hnena pek theih loh chang erawh hmun thenkhatah a awm a, hei hi sik leh sa danglam nasat vang te, tuihna kiam zel avang te, ruahsur hunbi mumal loh tak avang te a ni awm e. Tuihna leh ramngaw humhalh tur hian YMA, mipui leh Sorkarin theitawp a chhuah zel a tul hle a ni. Pu Speaker, ka lawm e.

SPEAKER : A lawmawm e. *Zawhna leh Chhanna* hun a tawp a. Zawhbelhna hi kan la tawh lo mai a niang chu maw? Ti khan Business dangah kan kal ang.

DISCUSSION ON MOTION OF THANKS

Tunah chuan, Nilaini-a kan Governor thusawi chungchanga *Motion of Thanks* Member zahawm tak Pu T. Lalhlipuaia'n a rawn move kha kan sawiho dawn a ni. Hei hi minute eng zat nge inpe ila tha kan tih le?

PU LALDUHOMA, CHIEF MINISTER: Helai kan AC hi a bengchheng khawp mai a, keini ho tan hi chuan. Session hmasa lamah pawh khan ka sawi tawhin ka hria a, tihdan awm thei se la a tha hle mai.

Tuna i han zawhna kha, *Motion of Thanks* hi chu nilengin kan sawi thin a, *Private Resolution* pawh hi nileng daih a ni thin a. Nileng daih pahnih kha ni khatah lak a lo ngai ta si a. Chuvangin, lak kawp hram hi tum ta mai ila. *Motion of Thanks* discussion hi chu minute 5 diat diat emaw sawi ta ila, insum tlang ta ila. Dar 3.00 PM-ah te chuan *Private*

Resolution hi sawi hman thei hram ta ila, tiin ka'n rawt teh ang.

SPEAKER : Minute 5 rawtna a awm e. Tha kan ti em?

PU LALCHHANDAMA RALTE, OPP. LEADER: Ka duh dan chuan, minute 5 kha ka thlawp a, chawhma dar 1:00 PM ah *Motion of Thanks* hi zawh hman tum ta ila, khami hisap khan wind-up tur pawh kha ti ta ila. Dar 2.00 PM ah *Private Member Resolution* luhpui tum ta ila, chawhnu ah chuan business danga kal a tha zawk lo maw?

SPEAKER : Aw le. Ka han sawi duh chu - Member te'n vei tak kan neiha, kan up tang tanga sawina hun awmlo thin hi chu a buaithlak ve thin a. Chuvang chuan, member ten an sawi duh a, han inpal ngawt hi helam atang chuan ka'n hreh deuh hlek thin a; a sawitu tur awmdana zir te pawh ni se la a tha ang e. Tunah Member zahawm tak Pu T. Lalhlimpuia'n sawihona han tan sela.

PU T. LALHLIMPUA: Pu Speaker, ka lawm e. Mizoram Legislative Assembly Session vawi 9-na-cum-Budget Session vawi 4-na tantirha Hon. Governor, Gen. Dr. Vijay Kumar Singh-a thusawi chungchanga lawmthu sawina motion ka nei tur hi ka lawm em em a ni. A hmasa berah chuan, kan Governor bulah thinlung takin lawmthu ka sawi a. Ngaihtuahna fim tak, Mizoram mipuite hamthatna tura sorkar hmahlir te, policy leh hmasawna kawng hrang hranga hmalaknate a rawn tarlang a. A thusawi hian State chhunga mi zawng zawng huapzo hmasawna, economy stability leh social harmony nei thei tura sorkar inpekna a tarlang a ni.

Budget Session neih hi kum khat chhunga Session pawimawh ber te zinga mi a ni a. Sorkarin kumtina a sum leh pai report a pekna leh a ruahmanna a ni a, chutah chuan sum hman dan, lakluh leh hmalam hun atana Economic Policy-te pawh a tel a ni. He Session atan pawh hian rorelna kawngah langtlang leh accountability a awm theih nan min puih pawh ka beisei a ni.

Governor thusawi hmasa lama *Bana-kaih* (Hand-holding) scheme hman a nih ta hi a lawmawm hle a. Hei hi entrepreneur leh loneitute tanpui tumna a ni a, mahni inrintawkna leh sum leh pai lama chakna kan neih te chawikan tumna a ni bawka ni.

Tunah hian Mizoram hmun hrang hrangah sawhthing leh hmunphiah te lei mek a ni a. Sawhthing pawh huntiam ang ngeiin nimin *State Day of Prayer* kan hman ni atangin lei tan a nih thu kan hria a. Thingtlang leh khawpui hmun hrang hrangah kalpui niin, Mizo mipui kuthnathawk leh mi-taimate tan lukhawng a nei mek a. Anmahni kutkawih ngei maia hlawhtlinna an hmuthei hi a lawmawm em em a ni. Kumdang lo awm leh turah vawiina sorkarin ruahmanna a siam hlawhtlinna chauh hi kan duhtawk tur a ni lova, ram inrelbawlina tha hnuaiah mipuite hamthatna tur hlawhtling zawk he policy hnuaiah hian kan ngaihtuah chhuah zel hi vawiina he House zahawmtaka thute kan mawhphurhna niin a lang a ni.

Hon. Governor hian dan leh thupek kaihnawih thil pawimawh tak tak a sawi a, Mizoram Police leh Security Agency dangte'n remna leh muanna vawng reng tura an hmalakna fakawm tak, a bik takin international border area chungchang te a tarlang a. Kan mipuite tana boruak him taka siam tura an inpekna hi a lawmpui awm takzet a ni.

Chutihrial chuan, kan Governor-in a tarlan angin State chhunga ruihhlo tawlhrukna leh hman sualna hlauhawm zual zel hi ngaihtuah awm tak a ni a, he harsatna sutkianna kawngah Excise & Narcotics Department-ina hma a lakna te a chhuanawm hle a. Tin, ruihhlo zuarte man leh NDPS hnuaiah thubuai ziahluh chungchang te pawh a tarlang bawk a ni. Chubakah chuan, India rama *pakhatna* nihna kan hauhna lang thar te pawh a rawn tarlang bawk a. Forensic Lab-a case enfiiah chungchanga rang taka dapchhuah kawngah India rama a ti hmasa kan ni thei hi a chhuanawm hle bawk a ni.

Home Department hnuaiah, a bikin Prison Department lama staff indaihlohna vanga kum kal ta lama kan mualpho thinna phuhrukna leh zir chiang tura study team indin tura sorkarin ruahmanna a tarlang te hi Mizo mipuite tana thu lawmawm a. Mizoram chhunga NGO leh Kohhran te thleng pawha kan mangan rukna, District Jail tawt lutuk chungchanga district jail 7 lai tihchhangtlun tur a ni te hi a nghahhleahawm hle a ni. Chutiang bawkin, *Focus Project* hnuaiah Agriculture lama sum lakluhna tihhmasawmna tur te, lo neih dan nghet neih theihna tura hmalakna te pawh a rawn tarlang a. District eng emaw zata kuthnathawk tute chawikan an ni mek a, lei rualrem an rap tan ve bek bek te hi a thusawia lang te hi thil lawmawm tak a ni bawk a ni.

Tin, Pu Speaker, *National Mission on Edible Oil Palm* hlawhtling taka Mizoram-ah kalpui a ni hian rah duhawm tak a chhuah a, oil palm/palm oil metric tonne sang tamtak tihchhuah leh hralh chhuah a ni a. Hei hian agriculture lama mahni inrintawkna leh lo neitute eizawmna tihhmasawmna tura sorkar inpekna nghet tak mai a lantir niin ka hria a ni.

Chubakah, sorkarin khawpui borual tihhmasawmna, mipui tihhriselna a ngaihpawimawh zia a sawi hian hmasawmna nghet tak kan neih theihna tura ngaihtuahna kan senna te pawh a tarlang niin ka hria a. *Swachh Bharat Mission*, Urban 2.0 hnuaiah vantlang hamthatna a tarlang te hi a ropui hle mai. Bawlhhlawh awmlahna State nih tumin Zoram chuan ngaihtuahna a seng mek tih te pawh a sawi a. Mihring lo pung zelina a ken tel tlat bawlhhlawh hi sawngbawl dan mumal tak kan neih thuai thuai a ngai a. Chuti lo chuan kan lo neihte tui thianghlim pek chungchanga kan boruak leh a chhehvel te nasa takin a nghawng thei bawk a. District 4 laia *Solid Waste Management* (bawlhhlawh sawngbawl) project kalpui a ni te hi thu lawmawm tak anih rualin, diktaka kan hman erawh Mizoram-a chengte mawhphurhna a ni.

Tin, infrastructure - healthcare services leh social welfare programme tihchangtlunna tura hmalakna chhonzawm zel te hian mipui hamthatna nasa takin a pui dawn tih thu a sawi te hi a lawmawm hle mai a. Hengah hian Central Unit hrang hranga sak mek, damlo leh upa zawkte tan anmahni ngaihsakna he sorkara lo lang hi sorkar tihtur awm reng te pawh niin a lang a ni.

Tin, Pu Speaker, he sorkar hian thil tamtak a kalpui zingah *Mizoram Journalist Pension Scheme, 2023* a kalpui thei ta mai hi thil chhinchhiahtlak tak a ni a. He scheme hnuaiah journalist pension ten thla khata 8,500/- lai an dawng thei tur hi thil ropui leh lawmawm tak a ni a. Chutihrial chuan, Mizoram hmasawm zelnaah hian thudik zikluak mipuite'n kan hriat a tul tawh takzet a, politics inbeihna leh hamthatna tur zawnga thu-lengvak kara thudik tarlan hi journalist-te mawhphurhna pawimawh tak a ni a, chutiang ti turin sorkar pawh hian scheme a duan hi zahawm taka kalpui erawh chu journalist-te mawhphurhna a ni ve thung ngei ang.

Kan Governor thusawi-a langsar tak pakhat chu - Mizoram-a zirna tihchangtlunna tura

hmalakna hi a ni a. State sorkar ta University din tumna - *Mizoram State University Bill, 2025* tun tum Session-a pharh a ni tur hi thil ropui tak a ni. Hei hian zirna sang zawk tihchakna kawngah leh thalaite tana remchang zawk kawng tam tak a siam dawn niin a lang a, hmasawna pawimawh tak kan Governor hian a rawn tarlang a ni.

Tin, zirna kawngah chuan, School Education hnuai zirtirtu indaihlo phuhrukna turin casual teacher mi 998 lai lak thar a ni te hi, he sorkarin zirna a ngaihpawimawhzia a tilang a. Hemi kawngah hian, nikum hmasa 2023 lamah khan SEDP teacher mi 700 chuang lak thu ah he House zahawm takah hian lawmthu sawina te kan lo hre tawh a. Amaherawhchu, tun tuma zirtirtu lakte erawh hi chu *qualified teacher* ngei, a lak dan dik taka lak anni hi a thlamuanthlak viauin ka hria a ni.

Tin, zirna tha pe tura NCERT hmalakna hi a chhuanawm takzet a, kan hnam mila zirna kan kalpui zel hi sorkar chuan a ngai-thutak hle tih pawh a chiang a ni. Tin, zirna thuam chak tura *Eklavya Model Residential School* thar 5 lai he sorkar-in a chhawpchuak thei te hi a lawmawm em em a ni. Governor-in a sawi zelnaah chuan, lirthei lo pung zelin boruak chhia a siam a, a tihchhuah mei khu endik hna te leh lirthei that leh that loh endik te hi sorkar hmalakna pawimawh tak, hriselna nena inkaihhnawih tlat a ni. Khawl leh thildang tel lovin heng thil hi test hleihtheih a ni lova, tunah hian heng test-na khawl hrang hrang mipuite tan eng emaw zat min chhawpchuah sakin, awlsam zawka test a nih theihna turin district hrang hranga hmalak mek a ni te hi a lawmawm leh zual a ni.

Tin Pu Speaker, ram dangah te kan han kal a, mi neih ang kan awt a; kan ram kan thlir a, *ar-bo-zawn ang* a ni a. Nimah sela, *Inland-Water Transport Project* hlawhtling mai tur tarlan a ni te hi a lawmawm leh zual a. Chu bakah chuan, sorkar hian project dang ruahthamloh hemi kawngah hian a nei niin a lang baw a, he sorkar hian theihtawp a chhuah tak meuh nia a sawi te hi a lawmawm leh zual a ni. Khualtha kan ram rawn tlawhtute hipna tur kan mamawh em em a, hemi kawngah hian Tourism Department pawhin chak takin hma a la a. Mizoram-ah hmasa ber turin *Hnahsin Kut* Champhai-ah hlawhtling taka neih a ni a, *Leitlangpui Music Festival* neih a ni baw a. Heng hi a bultanna chauh ni mah sela, a chhimtu mipui tam takin an hlutin, Mizoram-a sum hailuhna remchang leh eizawna kawnga hmalaknaah nasa taka min puitu a ni baw dawn a ni.

Governor Speech a langsar tak pakhat chu - Mizote talent kan neihna kawngah kan special bikna haichhuahna tur *Bana-kaih* policy hnuai Empowering Mizoram Sports (EMS) a ni a, he sorkar hian mizo infiam mite chona thar a pek ngei a beiseiawm a. Khawvel huapa lang tura chhawpchuah tumin *Olympic, 2036 Vision* a neih thu a rawn tarlang te hi a lawmawm a. Hetih rual hian, mizo infiam mite hemi kawnga lo inbuatsaih sauh sauh erawh chu kan tih tur niin a lang a. A bultanna atan hian *Mizoram Sports Enclave, 2024* buatsaih a nih thu a rawn tarlang te hi thu lawmawm tak a ni.

Tin, Mizo culture-a bet tlat kan invui thu ah, mahni chenna khua thlanmual ngeiah invui kan duh vek a, chutiang chuan chungtinte kan inbuatsaih thin a, hemi kawnga sorkar fawngvuntute lu tihai em em thintu chu - ruang phurhna hi a ni. Kan Governor Speech pheh 10-na (No. 55)-a tarlan anih angin, ruang phurhna kawngah sorkarin mawh a la ta hi, sorkar leh mipui tan a va thlamuanthlak em! Hemi chungchanga tarlan ka duh chu - Mizoram sorkarin ruang phurhna atana budget kan dah cheng nuai 5,00,00,000/- atangin nuai 2,33,33,314/- hman a ni a. Sorkar kum tlemte kan la neih ah hian eng emaw zat chu

la hmang turaah inggai mah ila, kan budget daih tur a ni hi a lawmawm lehzual a, reestimate ngai lova chunglamin zoram min hruaina leh min venhimna te pawh hi a tarlang tel niin ka hria a, chu chu he House-ah zahawm takah pawh tarlan hram ka duh a ni.

Ruihhlo beihna kawngah mi awm laklawhte enkawlina kawnga sorkar hmalakna kan Governor-in a rawn sawi hi tarlan ngei ngei chi ah ka ngai a. *One-Stop Centre* hmun 5-a din belh tum a ni te, *Jordan Centre*, Sethawn enkawltu lak a nih tur thu te, sorkarin mipuite a ngaihsakna leh hnam chhanna tura ke a penna kawng a tarlang niin ka hria a. Tin, ruihhlo dona kawngah sorkar hmalaknain district thar pathum - Khawzawl, Hnahtial leh Saitual-ah Excise & Narcotics station hawn thar a ni tur a rawn sawi te hi a lawmawm lehzual a ni.

Kawngpui hmasawna Governor-in a sawi ah hian, PWD-in kawngpui hmasawna project engemaw zat a kalpui a, kawngpui infrastructure hi haw haw thuta tha thei a ni si lova perspective plan a ngai a. Kum eng emawzah kalpuia hlawhtling thei chauh a ni tih kan hre theuh awm e. A process hi a rei deuh avangin, sorkar pawhin selna tam tak a dawng thei awm e; chuti chung chuan chak takin hmalak mek a ni. Inkalpawhnaa hmalakna hrang hrangah, Tuivai lei dawh phei chu kumkhat chhungin hawn theiha peih a ni ta mai hi thil ropui tak a ni.

Tui thianghlim ngaihtuah kawngah he sorkar hmalakna kan Governor zahawm takin a tarlan atanga he House member zahawm takte hmaa kan tarlan duh chu, *Jal Jeevan Mission* hnuaiyah thingtlang chhungkua mi 1,33,060 te sorkarin tui thianghlim a ngaihtuhsak tur thu tarlan a ni a, a lawmawm hle. Pu Speaker, thalaite eizawna ngelnghet an neihna turin skill development sorkarin a tichak mek te hi ngaihtlak a nuam hle a. ITI tih changtlun te, hnathawktute hamthatna tur chhawpchuah te hi thil lawmawm tak a ni. Tin, MYC hmalakna hard and soft skill nei tura thalaite hmakhua sial mek a ni te hi a lawmawm takzet a ni.

Thil tam tak Pu Speaker, sawi tur awmin a lang a, hriselna kawnga hmalakna te, clinic centre, health sub-centre a hlankai a ni te leh, nursing school, nursing college-a hlankai ani te a lawmawm a. Pu Speaker, heng thu hmang hian kan Governor chungah lawmthu ka sawi nawn leh a - Thuchah rilru hneh tak min pe a, he House-a member zahawm takte hian he *Motion of Thanks* hi min thlawppui a, Mizoram hmasawna leh hausakna hmathlir te tihlawhtling turin tangrual taka thawk turin ka ngen che u a.

Tichuan, Pu Speaker, he House zahawm takah hian Governor thusawia lawmthu ka sawina *Motion of Thanks* hi min adopt sak turin ka ngen a che. Ka lawm e.

(Speech not corrected.)

SPEAKER : Aw le; kha, a sawi hawng ta a. Member zahawm tak tak Lt. Col. Clement Lalhmingthanga i lo sawm ang.

LT. COL. CLEMENT LALHMINGTHANGA: Pu Speaker, ka lawm e. Minute 5 chhung hun pek kan ni a. Kan Governor zahawm tak speech-ah lawmthu sawina tur tam tak a awm a, amaherawhchu, highlight ka han nei ang a.

Tuna kan Sorkar flagship programme pawimawh tak mai *Hand-holding*, 'Bana-kaih' tih kha September ni 19, 2024 khan tlangzarh a lo ni a. He programme kaltlang hian Zoram mipui kuthnawktute leh mahni kutkawih hmanga eizawngtute tan malsawmna ropui tak

a rawn thlen hi lawmawm ka ti a. Tin, central India lama programme pawimawh tak mai *Vikshit Bharat, 2047*, India Independent a nih kum 100-na denchhena he programme awm leh *United Nation Sustainable Development Goals* (SDGS) tihhlawhtlinna tura Zoram-in a hma a lak vena, a ke penna pawimawh tak mai a ni hi a chhuanawm ka ti bawk a. Tin, he *Bana-kaih* policy kaltlang bawk hian sum puk ve thei dinhmuna ding lote tan pawh ngaihtuahna a la siam leh zel a. Kan sorkar hian CM - *Special package* a la buatsaih leh zel hian ‘mi zawng zawng huap sorkar’ a nih zia a lantir bawk a. Hei hi a lawmawmin, a chhuanawm hlein ka hria.

Tin, Home Department hnuaiiah hian Central Jail leh District Jail hrang hrang, hun rei tak thuamthat lova awmte SASCI hnuaiia thuam thar lehna tura hmalakna leh sum tam tak a dahhran a ni te hi lawmawm hle a ni. Pu Speaker, Central Jail khu Assembly committee pakhat - Subject Committee-IV member MLA pangate leh kan Assembly Secretariat official te nen kan zuk tlawh a. Chutah chuan kan Central Jail building-in thuamthat a lo mamawh tawh zia kan zuk hmu a. Tin, mipa tanna jail bik mi 438 awmna tura ruahmanah mi 822 lai mai an lo awm a, a tawt em em mai a. Tin, a building rawih tawh tak takte pawh he kan sorkar hmalaknaa siamthat an ni tur te leh, an mamawh hrang hrang phuhruk anni tur hi a lawmpui awm kan ti a, ka lawm khawp mai.

Tin, Mizoram Forensic, Science Laboratory (FSL), lehkha hmang lova case chinfelna India rampuma hmasa ber tur Mizoram-in kan hen nei hi a chhuanawm ka ti a. He system hmang hian ni 30 chhungin case a chinfel theih dawn a. India ram huapa a awm chhun kan han ni thei hi, he kan sorkar hmalakna hi a chhuanawm takzet a ni.

Tin, Agriculture - kan eizawna inngahna bulpui berin ngaihsak a hlawh a. sik leh sa inthlak danglamin loneituteah harsatna tam tak a thlen thin a. Chutiang harsatna leh sik leh sa inthlak danglam thin pawisa lo tur *Climate Resilience Agriculture System* hi FOCUS hnuaiiah kalpui mek a ni bawk a. Heng te pawh hi tunah hian district paruk - Champhai, Mamit, Serchhip, Kolasib, Khawzawl leh Saitual ah te kuthnathawktu chhungkua 55,000 zetin an chhawr mek a ni. Heng te pawh hi hmasawna ropui tak a ni a, a chhuanawm ka ti hle bawk a ni.

Tin, Information & Public Relations Department hnuaiiah Mizoram journalist-te tana Journalist pension scheme, 2023 hi kalpui niin, he hamthatna hi mi pariat zetin an dawng tawh bawk a. He scheme hnuaiiah hian journalist kum 60 chunglam, India khua leh tui dik tak, kum 30 chhung journalist hna lo thawk tawhte’n thla tin pension cheng 8500/- an dawng thei dawn a ni.

Tin, Revenue Department lampangah ram chhinchhiahna fel fai tak a awm theihna turin leh ramri inchuh te, ram LSC inchuh thubuai kan neih fo thin te pumpelhna atana Land Revenue & Settlement Department-in hma a lakna GIS software pakhat *e-ram* introduce a ni te hi a lawmawm ka ti a. Hei hi November ni 5, 2024 atang khan hlawhtling taka hman a lo ni a; kei pawhin he *e-ram* ah hian ka ram neih ve chhun te thlamuang takin ka va register ve nghe nghe a ni. Tichuan, he hmalakna tihlawhtling tur hian private firm 13 zet empanelled an ni bawk a.

Tin, he hna hi Surveyor indaihlohna sang tak kan neih thin avanga ram teh hman loh te, ram inchuh thubuai settle theih loh thin te pawh rang takin hei hian a rawn solve dawn niin

a lang a, a ropui ka ti a ni.

SPEAKER : A lawmawm e. Tunah sawi leh turin member zahawm tak Pu Jeje Lalpekhlua i lo sawm ang.

PU JEJE LALPEKHLUA: Pu Speaker, ka lawm e. Kan Governor zahawm tak speech-in Mizoram Sorkar hnuai department hrang hrangte hmalakna a rawn tarlanah khan lawmthu sawina tur tam tak a awm a. Khang a rawn sawi bakah khan Mizoram Sorkar hmalakna chhinchhiah tlak tak tak leh hmasawna hmuh tur a awm nual baw a. Hun kan neih tam loh avangin ka ngaih pawimawh zual tlem han sawilan ve ka duh a.

Pu Speaker, a hmasa berah chuan, hand-holding scheme chungchang kha Governor Speech ah a rawn lang a. He scheme hi Mizoram chhunga kuthnathawktute, mahni kutkawiha eizawng thin ten intodelhna tlak eizawna ngialnghet an neih theih nan hmasawna-rualkhai a awm theihna tura ruahman a ni a. Hemi chungchangah hian kan Chief Minister, he house leader hi a tang khawp mai a, theihtawp a chhuah tak meuh meuh a. Tin, kan minister te, department hrang hrang thawktute pawhin theihtawp an chhuah mek zel a, a hlawhtlinna hmel pawh kan hmu chho zel dawn niin a lang a. Kuthnathawktute leh mahni kutkawiha eizawng thin ten bul tanna atan loan an lak ve theihna tur Mizoram sorkarin bank pathum - MRB, SBI leh APEX Bank te nena inremna thuthlung an han siam te pawh kha a ropui ka ti em em a. Hei bakah hian kuthnathawktute zingah sum puk thei dinhmun a ding chiah lo te'n eizawna bul an tan ve theihna turin CM - *Special Package* duan a ni thei te hi lawmawm ka ti a. A bikin kan bial South Tuipui te phei hi chu mi harsa te te kuthnathawka eizawng te kan ni a, he scheme phei hi chu kan hmang tangkai viau turah kan ngai a.

Tin, Mizoram sorkarin thlai chi 4 - sawhthing, hmunphiah, aieng leh mizo-hmarcha a rate mumal zawka hralh a nih theihna tura minimum support price a duan te hi a lawmawm ka ti a. Nimin khan Mizoram hmun hrang hrangah sawhthing hralh turin an buk mup mup a, ka bial South Tuipui Constituency – Hnahthial, Darzo, Cherhlun leh Tarpho khua atang te pawhin sawhthing quintal 430 veiliam a ni a. Hengte hi kuthnathawktute'n thlan tui nasa tak chhuaka an thawhrim rah a video leh thlalak kan hmuh te phei chuan hnuk te pawh a ti-ulh rum rum a, a lawmawm hlein ka hre baw a.

Pu Speaker, a dawt lehah chuan, infiam-mi ka lo ni ve tawhnaah, a pheh 8-na - Sports & Youth Services hmalakna chungchang a rawn sawina kha a lawmawm em emin ka hria. Mizoram - *Bana-Kaih Scheme, 2024* hnuai *Empowered Mizoram Sports* (EMS) programme tlangzarh a ni te, Mizo infiam-mite Olympic 2036 huna a tam thei ang ber an tel theihna tur *vision* te kha a ropui ka ti a. Tin, hei hi ka lo vei em em tawh thin a ni a, Session hmasa pawh khan ka lo sawilang tawh a. Infrastructure ringawt ni lo *entirnan*: “School building tha tak neiha zirtirtu nei tha tleh si loh chuan hmasawna a rualkhai dawn lo a ni” tih thu te pawh ka lo sawi tawh a, hemi kawngah hian a changtu minister-in theihtawpa hma a lakna a lawmawm hle a.

Tin, Mizoram-ah hian *Sports Incentive Award*-in a huam loh discipline thenkhatte pawh huam tel vekna tura hmalak a nih thu kan ngaithlak te kha, a lawmawm ka ti a. A bik takin tunhnaiah *Ban-elh* lama min tihmingthatu Denic Lalruatluanga leh Benjamin Lalawmpuia te tunhnaiah an che tha thei em em a, Mizoram piaah lamah pawh India mipuite min tihmingtha a. Heng mite hetiang dinhmun chang thei tura an ding hi lawmawm ka ti a. Tin,

infiamna discipline hrang hranga pawimawh tak si, langsar si lo chu - Team Coach-te hi an niin ka hria a. Heng mite tan pawh an pawisa dawn tur tihpun a nih tur thurawn sawilan a ni kha a ropui ka ti a.

Pu Speaker, a dawt lehah chuan, phekk 17-naah Excise & Narcotics Department chungchang a rawn sawi te pawh kha a lawmawmin ka hria a. Ruihhlo vangin kan ram dinhmun kan hria a; chhungkaw tam tak kan rum a, thalai tam takin nunna kan chan a. Hei hi theihtawpin kan Chief Minister hian tlin hlimah pawh khan hma a la nghal a; tin, a changtu minister pawhin theihtawp a chhuah a. Tun hnaiah he department-ah pawh hian hmasawna nasa tak kan hmu a. Kan hriat angin district thar 3 - Saitual, Hnahthial leh Khawzawl ahte hawn thar a ni a, a lawmawm ka ti a.

Tin, kan bial, Hnahthial District hi ramri depa awm kan ni a, hetiang kawngah hian Excise Department a rawn awm hnuah te pawh hma an han la a, hmasawna nasa tak kan hmu a ni. Pu Speaker, i remtihna, Hnahthial leh South Tuipui bial huam chhunga YMA branch hrang hrangte, sub-headquarter Hnahthial te, NGO hrang hranga ka thawhpuite, ruihhlo do kawnga hma lo latute leh theihtawp lo chhuahtute chungah he House kaltlang hian lawmthu ka sawi nghal duh a. Chutih rualin, theihtawp chhuaha he ruihhlo do kawnga hma la chhungzawm zel turin he House zahawm tak kaltlang hian kan ngen nghal duh bawka ni.

Pu Speaker, phekk 2-naa Mizoram Home Department hmalakna chungchang a rawn sawi kha a lawmawmin ka hria a. Tun hnaiah kan district – Hnahthial ah krismas hmangin ka va phei a. Ka ngaihtuah a, ‘sorkar hmasaah khan police te kha khawng an awm zawh vek’ tih tur khawpin duty tur pawhin kan innawr chhuak zo mang lo a ni. Tunah chuan Hnahthial-ah phei chuan kawi tinah police hmuh tur an awm a, khawtlang nu leh pa kan thla a muang viau a ni. Hengah te hian a changtu minister chungah lawmthu kan sawi leh duh bawka ni.

Sawi tur tam tak a awm a, a tawp lam ka hnaih mai ang a. Pu Speaker, kan hriat angin Revenue Department hnuaih a hian, changtu minister Pu B. Lalchhanzova’n theih tawp a chhuah a; online-a in register theihna *e-ram portal* a han tithlawhtling thei te hi lawmawm ka ti a.

A tawp berah chuan, Social Welfare Tribal Affairs hmalaknaah hian tun hnaiah ruang 38 anmahni awm hmunah phurh thlen a ni tawh te hi lawmawm ka ti a. Tichuan, kan Governor Speech - *Motion of Thanks* hi ‘ka thlawp e’, tih ka sawi duh a ni e. Ka lawm e.

(Speech not corrected.)

SPEAKER : A lawmawm e. Pu F. Rodingliana ilo sawm ang.

PU F. RODINGLIANA, MINISTER: Pu Speaker, ka lawm e. Thil pakhat tawite han sawi lawk ka duh a. Ka department P&E hi PHE hnuaih hian a awm vek mai a, a heading hi a awm ve lova, a hrela tan chuan a buaithlak thei a. Hei hi a siamthat theih em, tiin ka rawn zawt nghal duh a. No. 71 leh 72 kha a inzawm nghal a, a dangah chuan department zawng zawng kha a hrangin a awm vek a.

Tin, Ruang phurh policy-a ‘crore 200 leh’ tih kha a سوالin ka hria a; a ziaka mi en hian ‘nuai 23’ tih zawk tur a ni lo maw? Kha kha min lo ennawn sak leh sela. Ruang pakhat phurh man kha a to dawn lutuk a vaibelchhia a nih chuan; ‘23 lakhs’ tih a ni zawk lo maw,

crore aiah' tih kha ka han sawi duh a ni.

(Speech not corrected.)

SPEAKER : Tunah chuan Dampa Bialtu zahawm tak, Pu Lalrintluanga Sailo i sawm leh ang.

PU LALRINTLUANGA SAILO: Pu Speaker, ka lawm e. Hei, kumina Governor Speech hi uluk takin ka han zirchiang a, nikuma Governor Speech, December ni 13, 2023 nen ka han compare thin a; helai hi a enpuitu lam hi a fuhlo deuh nge aw ka ti a ni. A nawi hle mai a, nikum kha chu a chhuanawm hlein ka hria a. Tin, tuna kan P&E Minister zahawm takin a sawi ang chi te pawh kha a ni a. Tun hnuah chuan enpui that deuh a tha em aw? Hei hi ka ngaih pawimawh em avangin Pu Speaker, kan sawi hmasa duh a.

** (This portion of the speech is expunged as ordered by the Chair.)*

Aw le, a thusawi point tam tak zingah hian han en chhunzawm zel tur hi tam tak a awmin ka hria a. "Mizoram sorkarin *minimum support price* - sawhthing, hmunphiah, aieng, leh hmarcha-ah te a pe ang" tih te a awm a. Hei hi vawiin niah hmanhmawh taka lawmthu sawina chiah ka la ngai lova, a la pek loh tlat avangin. A pek hnuah te chuan lawmthu kan la sawi turah te pawh ka ngai a. Advance taka han sawi kha chu 'a tul em aw' tih te ka ngaihtuah a.

Tin, phok 7-na - Transport chungchangah khan Pu Speaker, lirthei hrang hrang fitness enfiagna tur *Inspection & Certification*, Hlimen-ah sak a ni tih kan hria a, a lawmawm a. Chutih rual chuan, lirthei a pung nasa em em mai a; pollution certificate kan pek dan hi a privatize theih em aw? A changtu Minister khan min lo zirchian sak se ka duh khawp mai a. A nih loh pawhin, kan House Leader-in khawngaihin min lo chhinchhiah sak sela.

Saw lai kan sorkar hmunpui ber Secretariat-ah sawn hmuhawm loh khawpa tamin an intlar nitin-zantin ringawt mai a, North leh South, East leh West emaw zawngin a then theih em aw? Naktuka thi mai tur, hmanhmawh taka zin turin a lak theih hauh loh ang chi ah te polutution certificate avanga harsatna tawh tam tak kan awm a. Heng hi awlsam zawnga kalpui theih dan a awm em aw? Kha kha ka ngaihtuahna a awm tel a ni a.

Tin, ruang phurh chungchangah a rate te pawh an rawn tarlang a. A lawmawm viau rualin keini western belt lampang - Dampa bial te, Tuichawng bial te hi tihhmayh kan neiin ka hria a. Inland-water transport kha a ngai thin a ni. Lui dungah tui a len chuan, motor kal theihlohnaah ruang inphurhna a awm a. Kha kha kan sorkar hian min ngaipawimawh sak se a thain ka hria a. He laiah hian a tel lova, ngaihtuahna thar min put sak thei sela ka duh khawp mai.

Tin, P&E chungchangah ka biala West Phaileng - Marpara te hi ka sawi fo tawh thin a, helai hmalakna hi state kut a nih chiah lohna a awm a. Amaherawhchu, harsatna awm erawh chu, Environment & Forests Department lam atang hian clearance an pe thei lo thin a ni. High Court-ah te an inkhing a, an hneh tawh a, helai hi kan P&E minister khan min lo hriatpui sela. Khulai 132 ah khuan a ram pumpui himna tur (home lampang kaihnawih te pawh a nih ka ring a,) BSF camp khu security thilah an thlunzawm avangin harsatna tam tak kan tawh phah a. Chuvang chuan, khu khu kum 10 dawn mai an tih chen chen lai khu chu, Environment & Forest Department lam te pawh hi harsatna a awm a nih chuan, a sutkian dan kan House Leader pawhin a hriat ka ring a. Chutiawng zawng chuan hmalak dan te pawh

awm thei sela ka duh khawp mai a.

Tin, Speaker, vuivai deuh hlekna ka nei a. Fisheries Department hmalakna ah hian district hrang hrangah central sorkar kaltlanga han tih ang chi a awm a, chutah chuan Champhai District te, Lai leh Chakma Autonomous District te a tel a ni. Amaherawhchu, Pu Speaker, Serchhip District - kan House Leader bial hi a tel hauh lo mai a, a lo sawi nasa tawh si a. Lau Lui-a *Fish Festival* han neih te kha thalaiin an chak tawh tehluh nen, ‘engatinge he speech ah hian a tel ve loh aw’ tiin ka’n vuipei deuh a ni. Heti laiah hian hmalak lak tumna a awm em? House Leader lo sawi tawh kha chu a department hotute hian an umzui dawn lo em maw ni dawn le?

A tawpna atan ka sawi duh chu - nichina ka sawi tawh ang khan, nikum lam kan Governor Speech kha member zawng zawngin “hei hi chu *excellent* a ni e” kan tih, ameherawhchu kuminah hi chuan (kan thiante pawhin an larawn sawiin ka ring a), a nawi ang reng riau mai a. Chuvang chuan, enpui uluk deuha, Governor Speech hi sorkar hmalak tumna han puanchhuahna a ni a. Mahse, a kim lo mai ni lovin, a nawi deuh hlek a ni. A tlangpui thu erawh chuan han object em em chu ka nei lova. Motion neituin arawn sawi tawh ang khan, pass tur ang zawngin ka thlawpna karawn sawi lang a ni e. Ka lawm e.

SPEAKER : A lawmawm e.

**(This portion of the speech is expunged as ordered by the Chair.)*

Le, a leh peka sawi turin Member zahawm tak Pu H. Ginzalala ilo sawm ang u.

PU H. GINZALALA: Pu Speaker, hun min pek avangin ka lawm e. Kan Hon. Governor thusawia *Motion of Thanks* put luh a ni hi a lawmawm ka ti a. Hei, ka han chhiar zau a, a lawmawm ka ti a. Kum khat chauh kan la sorkar a, kan sorkar hnathawh dan - kan governance ah hian thil thar *innovation* tam tak a awm niin ka hria a. A bik takin, tourism lamah te phei chuan bung thar kan kai a ni. ‘*Hnahsin Kut*’ kan ti a ka bialah, kan hlawhtling khawp mai. Kum dang zawng zawng aiin hetiang festival rawngkai deuh te nen khaikhin ralah chuan a hlawhtling khawpin ka hria. Tourist pawh kan thahnem khawp mai a, home-stay awm zawng zawng kan full fai vek; hotel zawng zawng pawh a khat vek a ni. Hei hi bungthar kan kai niin ka hria a, a lawmawm ka ti a. Sorkar leh NGO pakhat - *Champhai Nature Conservancy Society* te tang kawp an ni a, an fakawm ka ti a, ka biala mite ngat anni hi. Chuvangin, tourism lama bungthar kan kaina kan hon. Governor hian a sawi lang hi lawmawm ka ti a, lawmthu ka sawi a.

Hei, thil thar tam tak a lo lang a, niminah pawh sawhthing kan lei a nih kha. Agriculture sector lamah phei chuan, tih tak emah chuan hma kan lo la lo hian ka han hre thin khawp a; ka biala ka chhoha ka sawi ber thin chu – ‘engmah tih tak tak kan lo nei thin lo a ni maw’ tih hi a ni. Amaherawhchu, tunah pawh hian agriculture sector-ah bungthar kan kai hi ropui ka ti a, niminah pawh khan quintal eng emaw zat kan lei chur chur a ni. Chuvangin, agriculture sector-ah *harhtharna* a lo thleng hi lawmawm ka ti a ni.

Tin, education sector-ah pawh hian chu tho chu a ni a. Transfer and posting chungchangah pawh sorkar dangte (ti tawh mai teh ang) an tih theih loh kan ti ni hian a hriat a ni. Tin, zirtirtu kan lak chungchangah te pawh high school-ah ringawt pawh zirtirtu 350, middle

school-ah 371, primary school-ah phei chuan 648 kan lakbelh a ni. Heng te pawh hi thil thar ropui tak kan sawi sa mah ni se, ka sawi nawn duh a.

Tin, Sports lamah pawh hian *Bungthar* kan kai a nih hi maw le! Empowering Mizoram Sports (EMS) hand-holding scheme hnuaiiah hian kan nei dawn a ni a, a detail-in kan sawi hman lo ang a. Kan Minister viak tha tak, *Dynamic Leader* kan nei a, sports-ah hian; a ropui ka ti. A viak a han tha em em khawp a, *Pharao sakawr-pa* ang mai a ni a, a ri zak mai a ni, ani hi chu. A ropui ka ti khawp mai. Sports lamah hian vision thui tak min neih pui a ni a, *Vision, 2036* hi kan nei der tawh tunah hian; Olympic hi kan target a ni. Chutiang vision nei thui kan nei hi a lawmawm ka ti a.

Tin, Revenue & Settlement lamah pawh hian kan minister hi ka fak duh a ni. *Innovative thinking* a nei nasa ka ti a, kan ngaihtuah ngai loh thil - *Out of the box* hi arawn ngaihtuah chhuak a ni. Tunah hian in mobile phone atangin *e-ram* electronic hmangin ram hi a hmehchhuah zat zat theih tawh a ni. Khatianga thil thar a lo chhuak mek hi a lawmawm ka ti a.

Tin, ruang phurh chungchangah te pawh a hahdam thlak ta khawp mai. A zarzo tute vek kan ni a. 'Inclusive Government' kan ti thin a, hei hi a lo thlen dikna chu a ni ta a ni. A lawmawm hle mai.

Tin, Fisheries Department lamah pawh ka bialah phei chuan hma kan sawn a nia! Kan Minister hovin kum dangah beneficiaries 100 bawr vel lek lek kan thlan lai khan, kuminah Champhai District-ah phei chuan beneficiaries 400-500 kan thlang dawn a ni. A ropui khawp mai. Session zawh lamah hian project thenkhat hawn kan tum a, sangha lian pui pui man kan tum a ni, bomb hmang lovin lenin kan man dawn a ni.

Tin, Finance hian discipline kan nei tha khawp mai. Tunah hian Finance Department zuk zawt teh u; sum kan nei tha; kan dinhmun a tha lutuk tunah hian. A changin crore 600, 700, 800 te kan nei tin ten a ni, tunah hian; bat chu sawi loh. Chuvangin, Finance Department lam te pawh an fakawm ka ti a ni. Tin, *rebate chungchang* hi sawi loh theih loh ah kan ngai deuh a. Electric Department lam te hian an ti tha khawp mai. 'Electric bill kan pek that avangin kum tin rebate eng emaw zat lawmman kan dawng ziah a ni' tih lai te pawh ka sawi tel duh a ni.

Aw le sawi tur tam tak a awm a, hon. Governor thusawia *Motion of Thanks* rawn put luh hi lawm takin ka thlawp a ni. Pu Speaker, ka lawm e.

SPEAKER : A lawmawm e. Tunah chuan Member zahawm tak Pu Lalrinsanga Ralte i lo sawm ang.

PU LALRINSANGA RALTE: Pu Speaker, ka lawm e. Vawiin nia Governor's Speech kan han sawiho leh thei hi a ropui hle a. Governor's Speech hi sorkarin tun kum chhunga a kal chhoh dan tur ruahmanna rawn ziahna bu a ni deuh mai a. Ka hmaa sawituin a rawn sawi ang deuh khan, kum hmasa lam Governor's Speech leh tun Governor's Speech han en hi chuan, a inthlau hle mai a. Sorkar tan tirah ruahmanna kan han siam a, kan phur vanglai Governor's Speech leh tun a vawihnihna sorkar kaphung tak tak kan han hriata Governor's Speech, sorkar kal dan tur kan han ruahman te a lo inthlau ta hle mai hi, kan inzir fing chho niin ka hria a, a lawmawm hle a.

Tin, Governor's Speech hi ka han en vang vang a, lawmna deuh mai ka nei a. Lengpui Airport hralh tumna boruak kan neiha sorkarin hma kan lak mup mup kha he Governor's Speech ah hian a rawn lang lo hlauh mai a, lawmawm ka ti takzet a ni.

Tin Pu Speaker, he Governor's Speech phok hnihna ah hian Hand-holding policy hnuaiha *Chief Minister's Special Category Scheme* siam a ni tih kan han hmu a, a lawmawm hlein ka hria a. Amaherawhchu, he Hand-holding hnuaiha Chief Minister's Special Category Scheme hi, a hmaa loan 'nuai 50 thleng lak theih' kan tih ang khan nge kan kalpui dawna, hei hi beneficiary-wise in kan kalpui dawn? Hei hi ka hrechiang chak hle mai a.

Tin, ka hma a sawitu khan, 'ninin lamah te pawh sawhthing kan han la a,' a ti a, a lawmawm khawp mai a. *Minimum Support Price*, thlai chi 4-a pek tur' tihah hian Pu Speaker, ka sawi leh duh chu, vawiin niah hmunphiah chungchangah hian kan hlawhchham leh niin ka hria a. Kum lo kal ta zawng zawng, sorkar hmasa kum 5 chhung leh nikum ai pawhin tunah hian hmunphiah rate a chhiat ber lai kan tawng a ni. Kan thlaichingtute, huan neitute an harsa tlang em em a, sorkarin ruahmanna kan siam khirh si a. Collecting centre-ah te hmunphiah lakhawm turin, a dah rona hmun hma kan nei lova, thingtlang miten dah rona tur silpaulin tak ngialah pawh harsatna kan neih laia, a ro khera lei tuma hi. A hring hi kg ah 40/- aia tlawm lovin hralh tur a ni a, chu ai tlawma hralh te chu sorkarin minimum support price kan pe ang, tih hian let ta ila sorkar kan mualphona fo hi a reh deuhin kan ring a ni.

Tin, thil lawmawm deuh mai kan hmuh chu, MNF sorkar hunlai (term hmasa) hlawhtlinna tun sorkar chhovah hian a rawn lang chho zel niin ka hria a. Sorkar hmasa hmalakna te sorkar tharah a hlawhtlinna leh a hawna te kan nei chho zel hi a lawmawm hlein ka hria a ni.

Tin, Prison Department hnuaiha an indaihlohna te enfiah tura study team, Home Department-a secretary kaihhraina hnuaiha din a nih hi ropuiin, a lawmawm takzet a. Prison Department te hi an indaihlo hle mai a, lirthei an nei lo chu thu hran, a staff pawh an indaih lo hle a ni. Tin, Jail Superintendent te Jailor te leh Assistant Jailor an pay level dik lo lutuk siam that hna a kal chhoh theih dawnah kan ngai a, ka lawmpui hle a ni. Tin, SASCI hnuaiha central jail leh district jail pasarih sak that tur a ni hi ropui ka ti a, a lawmawm takzet a. Kan central jail khu sak that tura ruahman a nih khan Subject Committee-in kan tlawh a. Khu lai sak that tur leh renovate tura tel lo library khu ka ngaipawimawh khawp mai a. Sorkar anga tih a harsa a nih pawhin, a bialtu MLA-in a ti thei turah ngai ila, MLA fund te pawhin; a lawmawm hle ang a.

Tin, sorkar hmasaa kan lo kalpui, *Mizoram Journalist Pension Scheme, 2023* a takin kan han kal chhoh pui thei tan ta hi a lawmawm ka ti a. Sorkar hmasain engkim ruahmanna a peih fel tawh sorkar tharin a rawn chhunzawm hi a lawmawm hlein ka hria a ni.

Tin, Education ah hian Governor's Speech-a rawn lang ngei ngei tura ka ngaih, ka hmuh tak loh thil pakhat a awm a. Sorkar hmasain school kan lo upgrade tawh, tun sorkar thar pawhin nikum budget ah te pawh pawisa a lo dah fel vek tawh te 'kan upgrade ta a ni' tih Governor hian a rawn sawi ka beisei laia kan la hmu lo hi chu, pawh ka ti takzet a. Sikul hrang hrang middle te, high school te, higher te, lump-sum school te, grant in-aid school te, provincialized ang chi government school-a hlan chhoh tur te kha, rang taka sorkar hian kan kalpui theih ka beisei a. Chutiang tur chuan ruahmanna sorkar hian a neih chho vat

turah ka ngai a ni.

Tin, Pu Speaker, Transport hmalakna te a lawmawm ka ti a, ropui ka ti a. Amaherawhchu, tunah hian two-wheeler te rawng var vek hmang tura thu chhuah a han ni a, kan two-wheeler khalhtute an mangang em em mai a, sorkar in hei hi ennawn sak leh theih dan a awm em tih te rilruah an awm a ni. Chutiang chuan sorkar hmasa in Eklavya Sikul panga kan han sa a, ka bialah Bilkhawthlirah pawh kan han sa zo hman vek a 2023 khan, tin, he sorkar thar a rawn pian hian a hawwna te hi fum fe takin an nei nge nei lo ka hre lova, a bialtu ka nihna ang hian sawm ka ni lem lova. An hawng tawh em ka hra chiah lova, a run chu kan run tawh niin ka hria a, a lawmawm khawp mai a Bilkhawthlirah Eklavya Sikul tha tak kan han nei ta a, Sorkar chungah pawh lawmthu ka sawi duh a ni.

Chutih rual chuan, Jordan Centre, Sethawn ami kan ngaihsak lo rei lutuk hi chu Pu Speaker, thain ka hre lova. Kum 2 he sorkar a kalna tur a ni a, tunah hian '*Expression of Interest* (EoI) thehltur in sawmna tih chhuah a ni' kan la ti dek dek chauh mai a. Ruihhlo ngai kan thalaite ngaihsakna kan tih lana, an tana hun han sena, anmahni enkawlina tura ruahmanna kan siam zung zung hi a tul hlein ka hria a ni.

Tin, Pu Speaker, ZMC chungchangah hian lawmawm deuh mai, mahse, rawn ziah lan loh a awmin ka hria a. ZMC hi Mizoram sorkar leh society enkawl thin kha a ni a. Hmanni lawkah Cabinet meeting khan ZMC staff zawng zawngte leh a inenkawlina pawh Mizoram sorkar hnuaiyah a dah tharin ka hria a, a lawmawm hle a. He thil lawmawm tak hi Governor hian a rawn sawi tel lo hi a uiawm ka ti a. Tun sorkarin a hmalakna a ni a. Staff hoten harsatna hrang hrang an tawk thin a, society hnuaiyah leh Mizoram sorkar hnuaiyah thawk kawp anni a, buaina namen lo an nei thin a ni. Tunah erawh chuan felfai takin sorkar hnuaiyah an awm thei ta hi ka lawmpui a. Hei hi ziahlan ni thei se a tha mang e aw. Kan sorkarin kum khat chhunga a thil tih ropui ber pawl niin ka hria a, ka lawmpui takzet a ni.

Pu Speaker, kan Governor thusawi hi a tlangpui chuan a pawmawmin, a thain ka hria a, ka thlawp a ni e.

(Speech not corrected.)

SPEAKER : A lawmawm e. Tunah chuan member zahawm tak Pu Lalmuanpuia Punte ilo sawm ang.

PU LALMUANPUIA PUNTE: Ka bula microphone hi kan hmang mai ang e. Pu Speaker, vawiina ka rawn inthumna muftler mawi tak mai hi, Lai leh Mara puan intawm a ni.

* *(Expunged as ordered by the Chair.)*

Hei, kan Governor Speech hi a thain a lawmawm khawp mai a. A hmasa berin Hand-holding – *Bana-kaih* policy hmanga sorkarin mi thiamna nei, mahnia kal thei si lote bana kaih kan tumna programme hi a chhuanawm hlein ka hria a. Tunah hian kan sawi thin angin, *Bana-kaih* cheng nuai 50 thleng loan anmahnia bank an va approach pawha an hmuh theih thin si loh kha sorkar tihpuinain an hmu dawn a ni a. Ka biala kan recommend-te phe chu opposition vek anni. Keini chuan inthliarhranna kan nei lo reng reng a, hetiangka kan kalpui chho zel thei dawn a nih chuan, he *Bana-kaih* hmang hian Mizoram economy pawh kan vawrh sang hle dawn ni hian a lang a.

Inthlan laia kan zawrh tel miah loh, CM - *Special Package* ‘cheng nuai khat thleng a thlawna dawn’ tih te phei chu dil an tam ang reng viau mai a. Heng pawh hi a thlawna sem lam ni lovin, tunhma anga ‘an tihlawhtling em; an ti tak tak em’ tih vil zui si lova pek tawp ang kha a ni dawn lova. Hma an la tak tak em? An lak tak tak loh chuan, a laklawhah khan kan ti tawp hmak hmak dawn a ni. Progress partner ho te khan tunhma ang deuha zelthel deuha tih tum leh sorkar bum tum an awm maithei. Amaherawhchu, an kal thui lovang. Chuvang chuan, *tih tak takna* nen tih kan tum a ni.

Sawhthing hi kan sawi angin, nimin atangin kan han lei tan ta a. Thenkhat chuan ‘chutiang, khatiang’ an han ti a, support price chungchang te pawh nichinah khan sawichhuah a ni a; “An la pe miao lova” tih kha. Support Price pek ngai lovin cheng 50 kan intiamna angin kan lei nghal vek a ni, nimin atangin khan. A chawi tur ang ang kha chu, tihralna tur kan hre lo a nih pawhin, a tawih mai ang. Kan intiamna angin thingtlang kut hnawthawk mite’n an hnathawh rah, an thawhrimna a thlawna loh nan cheng 50-in kan lei tan a ni. Tin, kha kha kan hralh leh tur a nih avangin, pawisa chawi, cheng 20 emaw, 30 emaw, 35 emaw pawhin lo hralh ta ila, tinah cheng 30-a kan hralhin cheng 15 kan chawi dawn a ni mai. Amaherawhchu, kha kha tihral ve leh phawt a ngaih thin avangin, vawi khatah a vai vaiin kan lei seng dawn lova. A tah tawlin khang ho kha kan tihral phawt hnuah a dang kan lei belh zel ang. Kan lei belh zel dawn a, sawhthing kumina thar zawng zawng chu lei zawh vek kan tum; vawikhata kan lei thei lo anih pawhin. Chutiang te chu a nih avangin, tuna kan kalphungah hi chuan hma kan la sawn zel dawn niin a lang a.

Central Jail leh District Jail pasarih lai sak that a ni tur te hi a lawmawm khawp mai. Jail hi kan sawi tak ang khan, tuna Opp. leader te, keini te hi lo dai zeuh zeuh tawh kan ni a, jail dinhmun hi kan hre viau a ni. Tuna sak that tur an project rawn tih tharah phei hi chu tha tak a ni. A lawmawm khawp mai. Tin, homeguard ho rifles allowance cheng 100-a tihpun a ni te hi a lawmawm khawp mai.

Tin, Ministry of Finance hnuaiyah project 133 - kawngpui 80, building project 51 leh lei dawh 2 bakah, NABARD hnuaiyah kawngpui 23 - building 13 leh lei 10 kalpui mek a ni a. Helaiyah hian ka han sawi uar zual duh chu, sorkar lo kal tawh te khan an ti theih loh pawh a ni lo; an ngaihsak loh tawp; Tuivai lei Manipur nena kan inkal pawhna kan sorkar tirh atangin hma kan han la nghal a, hei hi naktukah hawn a ni dawn a ni. Kan Opp. Leader bial a ni a, ani pawhin thusawina te a nei dawn a ni. Khitiang lek khi sorkar hmasa khan ti duhin, lo ngaihsak ni se, an dawh ve thei lutuk. Kum 1997, October thlaa airuah tamin a lak tawh a ni a, sorkar hmasa te khan an ngaihsak lo reng reng. Chu chu Manipur nena kan inkal pawhna pawimawh lutuk a ni tih kan hriat avangin Chief Minister leh PWD Minister hnenah pawh a pawimawh zia sawiin hma kan la nghal a, keima mimal ang pawhin ka nawr nasa ve a ni. Chuvang chuan, khi lai lei kan han dawh te hi a lawmawm tak meuh a ni.

Pu Speaker, ka duhtawk mai ang a. Kan Governor thusawi kha tha ka tiin, *Motion of Thanks* hi ka rawn thlawp a ni e. Ka lawm e.

SPEAKER : A lawmawm e. Tunah chuan, member zahawm tak, Pu R. Rohmingliana ilo sawm ang.

PU R. ROHMINGLIANA: Pu Speaker, ka lawm e. Pu Speaker, a hmasa berin

Governor thusawia *Motion of Thanks*, member zahawm tak Pu T. Lalhlimpuia'n a rawn pulut hi lawmawm ka ti a. A tir lamah he Motion hi ka thlawp a ni tih ka sawi hmasa duh zawk a.

He kan Hon. Governor thusawi hi ka han chhiar a, pawl ka tih deuh mai pakhat chu -Hma an lak loh vang a nih chu ka ring bik lova. Hei, Mizote, pi leh pu atanga kan inngnen tlat Vety lampang hi thai lan a awm miah lo mai a. Vety lam hi keini mizote tan chuan thil pawimawh tak a ni a, hemi awm lo hi a mak ka ti deuh hlek a. Engnge ni a chhan? Vety lamah hmasawmna kan nei lo nge, hmalakna a awm lem lo?

Pu Speaker, hon. Governor hian point by point-in a rawn sawi bawk a. A point 2-naa a rawn sawi – “kan Annual Budget hi mi tam takin Sorkar pawisa lut leh chhuak ziah lanna satliah maiah an ngai fo thin” a tih hi, dik ka ti a. Chumai ni lova, “mipui hmakhua atana sorkar hma thlir leh ruahmanna a ni” tih a rawn tarlang hi tha ka ti hle mai a. Keni pawhin kan budget 25-26 tura hi hmuh kan chak tawh hle a, Mizoram mipuite pawhin an nghakhlelin ka hria a.

Tin, point 7-na - Chief Minister's *Special Category Scheme* a rawn sawi lang a. Hei hi SEDP nen khan a inang viau a, a hming a danglam mai niin ka hria; a lawmawm ka ti a. Hemi Scheme atang hian tanpui ngaite tanpui theihna tur chi kha, keini kan bial, tanpui ngai tam em emna bial ah te khuan heng scheme te hi min rawn hnawhthlak sak tam deuh turin ka nghal a ni e.

Tin, a point 8-naah - *Minimum Support Price (MSP)* chungchang a rawn sawi hi thil tha tak a ni. Kan Governor Speech hi han en ula, a tawpah hian ‘*dawn*’ tih hi a tam em em a ni. Minimum Support Price chungchang kan Governor zahawm takin ni 19-a a sawi ah hian, “minimum support price kan pe dawn” tih a ni a. Chuvangin, vawiin niah kan sorkar hian minimum support price min pek nghal hi keini bial chuan kan duh hle mai. Hmunphiah lak a hun tawh si a, an la a; ruah sur an hlau em em a. MLA fund atangin silpauline kan lei a, kan thawn thla a, an khuh loh chuan a huh chhe vek mai dawn si a. A hralhna rate to zawk sorkarin a bituk pawh kha an nghak hman lo thin a. Chuvang chuan, tlawm te tein an lo hralh a ni. Khang te kha ka bial - Thorang Bial ah khuan minimum support price hi min pek sak vek ula, sorkar rate ai tlawma an lo hralh tawhna kha, helai Governor thusawi atang hian sorkarin hma min lak sak turin ka ngen bawk a.

Tin, point 12-naa, “Study team ten prison lamah report an rawn thehlut ang” tih laia hi, hei hi thehlut vat vat se la. Hmanni lawkah ka zuk tlawh a, prison te, forensic science laboratory te, Delhi-a kan training-ah khan kan jail tangte leh forensic science laboratory te tlawh turin home-work min pe a, ka zuk tlawh ve ve a, an lo pawimawh hle mai a. Anni khu thumchak an ngai hlein ka hria a.

Tin, point 13-naah pawh hian, SASCI hnuiah Central Jail leh District Jail 7-te sak that a nih tur thu a rawn sawi a. Hei pawh hi ‘*dawn*’ tho a ni a. He ‘*dawn*’ a hi chak tak a hma min laksak a tulin ka hria a. Khung Aizawl central jail te pawh a hlauhawm em em tawh a, a thawktute tan pawh hlauhawm khawpa awm hi hma lak a chakawm hle mai. Pu Speaker, Forensic Science Laboratory pawh district tinah hian awm se a thain ka hria. Helai kan hmasawmna a lo tarlang te pawh a lawmawm ka ti a, a thawktute pawh khu an chak a ni. Amaherawhchu, manpower leh khawl leh district dangah bun theih ni se a lawmawm hle ang a.

Tin, point 32-naah zirtirtu lak chungchang a rawn sawi a, heta a rawn sawi zirtirtu an lak zawng zawng a total 1369 a ni a, heti chung hian kan la indaihlo em em a. Sorkar hmasa in SEDP teacher a lakte kha ban anni tawh a, an aia lak a ni maithei a, heng mi 1369 te pawh hi. Chutichung chuan ka bialah pawh zirtirtu pakhat chauh awmna sikul te a la awm nia maw le! Heng te hi min ngaihtuah that sak ula. Sorkar tan pawh heng aia tam zirtirtu lak dan te hi la awm se, tih kha kan sawi duh a.

Tin, electric vehicle te pawh hi air pollution chungchang thil tha tak a ni a. Tin Incentive Cash Award sorkar hmasain a lo pek tawh chhonzawm zel a ni te hi a lawmawm ka ti a. Vawikhatah thil zawng zawng hi tha-felfaiin a tih theih lova. Kan sorkar kal mek pawh hian heng hi han enawna, han tihchangtlung deuha, a aia tam inpek dan te pawh hi awm zel se a tha hle ang a.

Pu Speaker, a tawpna atan point 54-na, ruang phur chungchang kha – Hei, ruang phur hi, ni e, keini bial angah te chuan lawnga inphurh te a ngai a ni a. Chuvang chuan, lawng rate te hi min siamsak ula, lawng hman te hi min phalsak ula tha hlein ka hria a.

Entirna pakhat chauh ka han sawi teh ang. Aizawl ah Mauzam khaw mi a boral a, Aizawl atangin Marpara ah motor in kan inphur thla a. Tichuan, New Sachan lamah lawngin kan lut chho a, New Sachan atangin motor awm remchang kan hire leh ta a, Mauzam thleng. Khatianga lawng hire hnua motor hman lehna ang kha bill theih zel se, tih kha ka rawt belh duh a ni e. Pu Speaker, ka lawm e.

SPEAKER : A lawmawm e. Tunah chuan Member zahawm tak Pu Robert Romawia Royte ilo sawm ang u.

PU ROBERT ROMAWIA ROYTE: Pu Speaker, ka lawm e.

Pakhatnaa ka sawi duh chu - nikum December ni 13,2023 (nikum ti ila, kan budget session hmasa zawk) a kan Governor thusawi leh tuna mi hi an rawn compare fo a, enkawpin khang ZPM sorkar hnua Governor Speech hmasa zawk leh ZPM sorkar chhung tho Speech hnuhnung zawk kar hi a hla khawp mai, tih kha an rawn sawi tawh na a, ka rawn sawi leh duh a.

Entirnan: ZPM sorkar hlima Governor thusawi kha chu a *ambitious* viau a, tha pawh kan titlang laih laih hle a. Austerity measure chungchanga sorkar inremchen dan tur te kha a top atanga a hnuai lam thlenga han tih ang chi te, khang kha a tak ram a thleng lo ta viau mai a. Governor kha rubber stamp ang deuha hmanga sawi tir mai mai te pawh kan ang deuh em aw, ka ti a. Kan quarter/bangla han chei dan ang chi te, motor lei chungchang te; tin, entitlement hrang hrang chungchanga sorkar sum hekna, sorkar establishment pangngai nilo, establishment pangngai duhtawk lova, post leh position awm si lova high position tam tak hlawh pek ngai tam tak lak an awm a. Chuvang chuan, Governor Speech hi a hranpain a awm a, sorkar kal dan pawh a hranpain a awm a nih hi maw le, tih te min ngaihtuhtir a ni.

Tin, Governor Speech hmasaah khan ‘*Within this financial year itself*’ tih kan sawi fo kha, he financial year chhung ngei hian ginger, turmaric leh hmunphiah te lei tura sawilan a ni a, kha financial year chhung lei tura tih kha pakhatmah lei a ni lova. Chuvang chuan, Governor Speech pawngsualtu hmasa ber hi ZPM sorkar a ni mai em? Governor Speech ngaipawimawh miah lo hi ZPM sorkar hi a ni mai em? Governor Speech pawh chu

anmahni sorkar ziah vek an rawn chhiar chhuak kha a ni ve mai bawk si a, sorkarin a siam kha kan Governor hian coma pakhat pawh a tidanglam awm si lova, tih te rilru ah a awm a. ‘*Within this Financial year itself*’ a tih kha December ni 13,2023 a ni a. 2023-a ‘*within this Financial Year itself*’ a tih kha, May 31, 2024 ah kha financial year kha a liam a ni. Chuvang chuan, kha mi kum khan lei a awm lo; tuna an lei hi chu tun financial year hran a ni.

Tin *accountability* chungchang hi kan Governor Speech hmasaah khan a sawi uar a, a lawmawm em em a. *Accountability* chungchangah pawh hian, “*RR Agency thiamloh a ni; in thiamloh a nilo; kan thiamloh pawh a ni lo e*” han ti leh mai mai ang chi te kha Governor Speech nen a intuha lo hle mai a.

Tin, ‘CBI ina duh duha a chhui theihna tur *general consent* kan pe ang’ tih leh, pek leh loh lai vel te pawh kha, Governor Speech nen khan a taka kan kal dan a inang lo. Chu chu thuhma ang reng deuhin ka sawi duh a. Kumin hian Governor Speech sei lehzuah, chipchiar lehzuah te kan hmu a. Helaiah hian kan Minister leh kan department te chu an awmin ka hria a. Hei P&E Minister hi a fakawm hlein ka hria. Minister-in Governor Speech tur te chu kan enpui thin tih kan hriat vek kha. Sorkar hmasa hunlaia hmasawna leh hlawhtlinna te pawh en hrang lovin, sorkar hmasa hmingthatna hlau lova a rawn tilang hi a lawmawmin ka hria a.

Tin, Governor Speech-ah Printing & Stationery chungchanga ‘cheng 83.92 lakhs stationery items hralhna atan sorkarin a tum a ni’ tih lai hi, a department a lian lo tih chu kan hre tho nain, Governor Speech hi mithiam ten an lo en thin leh sorkar sorkar documents pawimawh a ni a. Tin, State dang dangte’n kan inentawn a, analyze tute pawh an awm thin; tv-ah sawihona te pawh a awm fo thin a, department pumpuiin nuai 83.92 a lakluh han ziah lana hi ziah lan loh zawk ni se chuan, sorkar leh Mizoram pawh kan mawi zawk awm mang e tih te rilruah a awm a.

Tin, ruang phurh chungchang hi a lawmawm khawp mai a, kan bial te pawh a lawmah kan tang a. Chutih mek lai chuan, ruang phurh hi kan sawi vung ang he-hu in a financial application hi a sang lem lova; nuai 23 sorkarin tun thlengin a la hmang chauh a ni a. Hei hi achievement lian tak anga han sawi hi a fuh lo thei ang em aw, tih kha ka rilruah a awm a. Tin nichinah khan Member zahawm tak, Champhai North bialtu zahawm tak khan a rawn sawi a, “Sorkar sum dinhmun a tha, sum crore 600 sorkar account ah a awm” a tih lai kha; khatah khan loan engzah nge ni kha, sum dinhmun a tha kan tihnaah khan? A loan a kha engzah percentage nge aw, tih kha ka rilru ah a lo lut a. SASCI te pawh hi loan a ni tih kan hria a, kan puk huai khawp mai a. Kan hunlai kha chuan SASCI loan puk kha an sawisel nasa thin nen, tunah chuan kan la bawrh bawrh a. Engpawhnise, a tha thoin ka hria, keima mimal ngaihdanah hi chuan. Finance Department te kan han biaka min han hrilh thinah hian, ‘chumi chin chu; chutah chuan loan engzah nge awm; kan bat rullh leh ngai, engzat nge awm?’ tiin han zawt tel thin ila, tichuan, sorkar sum dinhmun dik tak kha chu kan hrechiang deuh awm mang e.

Tin, ZMC chungchangah a lawmawm lam a rawn sawi lang a, a lawmawm khawp mai a. Mahse, ‘ZMC hi cabinet meeting in central sorkar kuta hlan’ tih te pass a ni tawh a; kha kha chu, ni e, harsatna te pawh a awm a nih hmel a. A hnuah ‘special package kan hmu dawn e’ tih kha he House ngei ah sawi lan a ni a. Vawiinah hian special package ZMC in a hmuh zat hi Governor hian a rawn puanchhuah ka rin laiin, engmah sawilan a awm lova. Helai hi nakinah sawifiah theih a nih chuan a van lawmawm dawn em.

Tin, Disaster Management chungchangah SASCI atangin sum tam tak allocation Mizoram-in kan hmu niin ka hria a, a lawmawm hlein ka hria a, phu pawh kan phu in ka hria. Sorkar leh a dawngtu beneficiary te pawh ka lawmpui duh a. Chutih mek lai chuan, a dang, Disaster Management atanga sum kan hmuh a awm nualin a lang a. Khang hmanna te kha vawiinah hian kan Governor hian rawn sawi lang ta se la. Sum hmuh te pawh hi kan puang chhuak tha lo khawp mai a, a cash a inchawi luk luk te pawh a awm deuh ni te khan sawi a awm a. Engpawh nise, kha lam kha chu ka chiang chiah lova... (**Speaker:** Zo thei dawn tawh em?)

Kam hnih-khat chiah, Pu Speaker, khawngaihin. Chuvang chuan, tun tuma kan Governor Speech hi a tricky ang reng a, eng emaw thil han ziah lan ve tho, a sum leh pai dah lang si lova han ziah ang chi te a tam khawp mai a. Hei hi tihdan hmasa lam nen chuan a inan lohna deuh hlek niin ka hria a, *kalphung-thar zia* te chu a lo ni mai thei a. Mahse, a Governor Speech hrim hrim atang hian sorkar hmalakna fiah taka hriat pawh hi a harsa khawp mai a. Engpawh ni se, kan member zahawm takin a Governor Speech chungchanga *Motion of Thanks* a rawn move hi, a rawn move thiam ka ti a, ka thlawp e. Ka lawm e.

SPEAKER : A lawmawm e. Tunah chuan member zahawm tak Pi Baryl Vanneihsang i lo sawm ang.

PI BARYL VANNEIHSANGI: Pu Speaker, ka lawm e.

Kan hriat angin, politics hi intihsiakna hmun a ni a. Chuvang chuan, kan intihsiakna kawngah hian thu inchuh te, thu belhchian dawl lo te, inchirhthehna te, inpuhmawhna thlengin a thleng nasa em em a. Amaherawhchu, chutiang karah chuan kan ram mipuite pawhin ‘engnge thudik, engnge thu belhchiah dawl, engnge thu tak’ tih te kan zir chho mekin ka hria a. Politics tha zawk kan zirchhuak zel turah pawh ka ngai a. Chutiang tur chuan mipuite pawh lo tang deuh deuh turin a hmasain nangmah kaltlangin kan fuih duh a. Tin, vawiinah hian keimahni sawi ni lovin, Governor in a address ah hian chiang takin sorkar hmalakna te, hmachhawp te, hlawhtling tawh te leh la kal mek te a rawn tarlang a, vawiinah hian chhiar tur, hmuh tur, zir tur a awm a. Hengte pawh hi mipuite’n ngaihven tlang ila, tiin bul ka han tan duh a.

Pu Speaker, kan Mizo thalaite aiawh pawhin sawi ve thei turah ka inngai a. Vawiina ka sawi duh chu, thalaite hmakhua, future nei kan ni a, kan hmalam hun hi kan ngaihtuah ve nasa em em mai a. Chutah chuan, he House zahawm takah hian keimah ngei pawhin, ‘medical student-te engtin nge hma an lak chhunzawm zel ang; Manipur buaiyah te, post-graduate zirna buaiyah te engtin nge ni zel ang’ tiin zawhna te pawh ka lo chhawpchhuak ve tawh a, vawiina Governor’s Address ah hian chhanna duhawm tak kan hmu a. Kan lo en theih chuan, phek 22 ah khan (‘ZMC’ ti khan an la tarlang a, ‘C & H’ a nih tawh kha) ‘Master of Public Health (MPH) zirna hawn a ni a, subject – course dang 5 zir tura hmalak mek a ni’ tih kan hmu a, kan lawm hle a. Vawiinah hian thalaite’n kan duh chu, *kan thlen chin atanga hmasawn* hi a ni a. Nichinah kan memberte’n sorkar hmasa hmalakna an rawn sawi a. Sorkar hmasa hmalakna kha keiniin kan sawi dan chuan, ‘A tha a; chhunzawm tlak a nih chuan, kan chhunzawm zel ang’ tih kha a ni a, vawiinah hian chu thu tihdikna te pawh kan hmu a. Heng politics hi thalai tena kan lo nghahfak a ni a. Party inanloh avanga engmah bihchianna leh zirchianna awm lova thil politicise-a han inpaihlak sak te kha a

fair lo kan ti ve thin a. Chung *unfair means* te chu a tlem ta deuh deuh hi lawmawm hlein ka hria a. Mizo thalaite aiawhin Mizoram sorkar chungah pawh hian lawmthu kan sawi a.

Tin, zirna kan sawi a. Zirna kawngah hian bial tinin chona kan hmachhawn nasa hle mai a. A infrastructure chu sawiloh, zirtirtu indaihlohna hian kan zain min nuai mek a ni a. Chutah chuan kan hmaa Ministry siamtute pawh hian theih ni se chu indaih taka dah an duh ngeiin ka ring a. Amaherawhchu, sum leh pai dinhmun harsatna keini aia chiangin an hria a, an dah vek thei lova. Tichuan, tunah hian Mizoram sorkar - ZPM sorkarin zirtirtu indaihlohna puhru tur leh chhawk zangkhai turin kum khatnaah zirtirtu heti zat mai an la thar hi a lawmawm kan ti hle a.

Tin, Pu Speaker, phok 14-na ah MYC a lo lang a, nichina *Zawhna leh Chhanna* hunah te pawh kan sawilang tawh a, chipchiarin ka sawi lo mai ang a. Unemployment rate te kan hria a, chuta tanga a tlakhniam dan te kan ngaihtuah ve nasa thin a. Chuta a hnuk ber nia ka hriat, MYC leh LESDE te pawhin nasa takin hma an la a. Kha, fiah takin link an neihpuite pawh ziah a ni a. Khatianga hmalakna a awm kha thlalaite kan lawm tak zet zet a.

Tin, phok 18-na ah Co-operation kan hmu a, hei hi ka lawm hle mai a, mimal tak pawhin hre kimlo chung chungka ka lo sawi ve thin a ni a. PACS te pawh kan hmu a, hei, ka bial chhunga Maubuang saw *model village* ang deuh reuha lo hmangte pawh an awm a. An inrelbawlna te, an sum leh pai che vel - an loan pek chhuah te a lo thahnem ve khawp mai a, kan han zirchiang a. Chutiang chuan kuthnathawktu te'n mahni kea din an lo zir mek zel a, hma theihtawpin an lo la zel a. Hengah hian sorkar thachakna nen tangkawp se la, tun ai hian bial tin hi hma kan sawn zelin ka ring a ni.

Tin, phok 18-na, point 97 ah khan kan hmu a, '*e-ram* online portal kha a ni a. Vawiinah hian buaina bakah court case nei tam tak an awmin ka hria a. Ram inchuh, ram fel lo, ram bo zawnchhuah ngai leh eng eng emaw buaina nasa tak kan ramin ka hmachhawn a. Chung tihfelna tur, a solution min rawn chhawpchhuah sak avangin kan lawm em em a.

Tin, hmunphiah chungchang, godown leh an sakna hmun nen lam point 83-na ah tarlan a ni a. Vawi leh khatah engkim a tih theihloh tih chu kan hria a. Mahsela, tun atanga kan thlen chin atanga hmasawn zel tur hian he department changtu pawh hian theihtawp lo chhuah se; duhsakna te pawh nangmah kaltlangin ka hlan a.

Pu Speaker, khawvel a thang zel a, kan nun pawh a thang zel a, a danglam zel a. Hmana tha kha, tunah chuan tha tawklo dinhmunah a lo ding a. Tuna tha hi nakinah chuan kan duhkhawp loh tur a ni a. Chuvang chuan, he House zahawm taka member thu ram-mipui rawngbawltute leh roreltute hian tunah kan mamawh ngaihtuah chungin, nakina kan mamawh turah ruahmanna kan lo siama, ngaihtuahna kan lo sena hma kan lak a pawimawh a. Chung hmalakna tur tam tak Governors Address a kan hmuh te hi a hlawhltin ngei theih nan, memberte'n party bil sawi lova kan inthlawp tawna sorkar tha tichak turin, mipui thlanchhuah, mipui-sorkar tha tichak tura kan in support tawn hi a ngai takzetin ka hria a. Chutiang chu a lo nih theihna turin, vawiina he Governor's Address tha tak mai hi adopt turin ka thlawp a ni e. Ka lawm e.

(Speech not corrected.)

SPEAKER : A lawmawm e. Hei dar 1, lunch break hun kan lo thleng ta a. Ka list ah Er. H. Lalzirliana te, Opp. Leader te, House Leader te kan la sawm tur anni a, rei kan awh tawhlo turah ngai ila. Kan Opp. Leader rawtna kha a zahawm viau rualin, memberte'n an sawi duh miau chuan a buaithlak ve thin a. Amaherawhchu, rei tawhlo turah ngai ila, 2nd session ah kan chhunzawm dawn nia. Thingpui inin i chawl phawt ang u.

(Recess at 1:02 PM)

2:00 PM

SPEAKER : Thingpui in chawlh hma khan *Motion of Thanks* kan sawi kha a ni a. Kha kha kan la wind up chiah lo a, kan sawi chhunzawm ang a.

Chumi hma chuan, chawhma lam khan kan Opp. Leader of Opposition khan photo session-a tlar hmaa thut loh chungchang kha kan han sawi a. Amaherawhchu, amahin 'kha kha chu proceedings atangin expunge mai teh ang' a ti a. Chu chu kan expunge dawn a ni, tih kha House hriatah ka han sawi a ni e.

Aw le, *Motion of Thanks* chungchanga sawi leh turin, Er. H. Lalzirliana, Member zahawm tak i lo sawm ang.

PU H. LALZIRLIANA: Pu Speaker ka lawm e. Vawiinniah hian Governor zahawmtakin a thusawi chung lawmthu sawina - *Motion of Thanks* putluh chungchang sawi theia ka awm leh hi Pathian hnenah lawmthu ka sawi hmasa a.

Hei hi point-wise a a dah a ni a, point 1-137 thleng a ni a. Amaherawhchu, point thenkhat a miscellaneous deuh, introduction ang deuh te leh he sawrkar hmalakna te, a tih tur te leh tih tawh te sawina lam a nih loh avangin, point 132 hi chutiang thil lam chu a ni a. Hemi 132 zingah hian a tam ber zawk (70%) hi chu 'tih tawh; tih tawh' tih deuh vek a ni a. Tih mekte, la tih turte hi a percentage tlem zawk mah a ni a. Hei hian chiang taka a entir chu – 'kan sorkar kal mek hian sorkar hmasate hmalakna leh hmachhawp lo awm mekte tih hlawhtlinpuina kawngah chak takin ke a pen' tih a hriat a, a lawmawm hlein ka hria a ni. Chung zinga pakhat ka sawi duh, hetilai a lang lo, naktuk mai a hawn tur Tuivai Lui Bridge hawn tur hi, hman ve ila, sawmna kan hmuh angin han kal ve te pawh ka chak hle a. He lei hi sorkar hmasa khan a ngaihthuah khawp mai a, a ngaihven nasa a. Khiti laia Manipur te nena kan inkalpawhna kawngpui pawimawh tak a nih avangin. Tender pawh he bridge siamna atan hian vawithum (3) ngawt chhuah a ni a. Tender pahnih phe chu chhangtu an awmluh avangin, khatiang khan response awmlu a ni a. A tender pathumna kha Ministry of Road Transport lam atangin he kawng atan hian sanction hmuh fel te a nih tak avangin, highway ah chuan Bailey Bridge awm a thianga lova, permanent bridge a siam tur a ni a. Hemi chungchangah pawh hian keimah pawh hi ka involve ve nasa khawp mai a. Central lamah te, MoRTH lamah, khumi Bairabi - Mamit Highway thar tur, *Spur of NH-6* kan han tih rual vel khan hengte pawh hi kan han bawhzui tel ve bawk a. A lawm ber te zingah ka tang a. He kawng - Manipur nena kan inkawlpawhna pawimawh tak hetiang hmantlak a lo ni tawh tur te, remchanna, awlsamna a rawn thlen tur hi lawmawm ka ti hle a ni.

Tin point 74-na - 132 kV line, Bairabi - West Phaileng chungchang a rawn lang hi lawmawm ka ti khawp mai a. He thu hi kan CM zahawmtak, kan House Leader pawh Delhi Mizoram House ah ka sawipui tawh nghe nghe a. Sorkar hmasa ah khan forest

clearance atan cheng crore 208 Forest Department in an demand avang khan pek loh theihloh a ni a. Chu chu han clear a ni a, eng eng emaw sorkar sum atangin. A hnu ah NPV nuai 180 chuang an rawn raise leh a, a department pawh an bangbo hle a. Amaherawhchu, hemi tihfel a nih si loh chuan, khulai khu commission ngawt theih a ni si lo a ni. Chuvangin, he thil hi sawrkar pawhin, kan House Leader te, a changtu lam te pawhin nasa taka mutmawh-hnarmawha min neihpui kan duh hle a. Physical job hrim hrim hi chu 90% zawh tawh a ni a. Khulai Mamit thleng ngat phei khu chu sub-station te pawh charge a ni tawh a. Hemi hi tihfel a nih chuan, hman theih mai tura ruahman a ni tawh niin ka hria a. Hei hi khawngaihtakin, ‘tihhlawhtlin thuai ni se’ tih hi ka ngenna a ni a.

Tin School Education chungchanghian hian sorkar hmasa a han upgrade hote, a bik takin Dampui te, Hmunpui te an lawm em em a. Provincialise an han ni ve te, kum eng emaw chen private-a an lo kalpui, khawtlang ten an lo hahpui em em khatianga sawrkarin a han dah khan, an lawma kut an lo ben rin tawh hle lain vawiinni thlengin sawrkarin a taka a la kalpui thei lo hi a pawikan ti hle a. Ka sawi fo angin, Mamit District-a ka bial bikah hian Govt. High School hi pathum chiah ka nei a ni; Lengpui phei chu Aizawl District a ni lehngal a. Chungte a nih chuan, pahnih chiah ka nei tihna a ni a. Heng Dampui leh Hmunpui te hi min han tihfel tlang sak seng chuan pali vel kan nei ve dawn a ni, Govt. High School hi. Chungte chu heta han sawilan loh, han lang tel ve se ka duh em em te zinga mi a ni a.

Hei PWD-a MoRTH hnuaihan 2 ongoing projects a awm a. Chu chu, ‘6.85 physical achievement a awm tawh’ tih zingah hian khulai Tlawng Lei, kan Airport kawng ni baw, Mamit District tena kan hman ber khu a tel em aw ka hre lova; khu khu hmanni deuh lawk pawh khan ka hovin kan en a. Chumi hnuah an han chawi dawh dawn a, eng emaw failure te kha a han awm leh a. Kha kha chu technical problem a ni a, kan sawi theih a ni lo a. Hei hi nasa zawka hmalaka bawhzui ni thei se la kan duh hle a ni.

Hei, Oil Palm chungchang a rawn sawi hi a lawmawm khawp mai a. Keini Mamit District hi Mizoram-ah chuan Oil Palm tharchhuak hnem ber district te kan ni a. Heng kan tharchhuahna - Phaizau te, Nalzawl te, W. Serzawl te hian a phurhchhuahna lam hi kan harsa thei khawp mai a. PMGSY hnuaihan Phaizau khu kawng laih tlang tawh a ni a Congress Ministry hunlai khan. Amaherawhchu, chhunzawm leh theih a ni ta si lova; tikhuan fur lai chuan nal nen, innawr nen, khatiang khan kan la kal char char a ni. Nalzawl hi tunah PMGSY ah a rawn chhuak thar a, tunah hian survey neih mek a ni a. Sorkar hmasa atanga kan lo buaipui chhoh kha a ni a, vawiinniah a hlawhtlinna kan hmu hi kan lawm hle a, an mamawh takzet a ni.

Tin, hei hmanniah Champhai Jail, Pu Laltea chairman-na hnuaihan kan han kal a, mamawh a tam hle mai a. SASCI hnuaihan sum tam tak dah a ni te, central jail thawmna tur leh district jail hrang hrang thawmna tur a han awm te hi a lawmawm kan ti a. Amaherawhchu, Women Jail han tlawh erawh kha chu a remti ta lova, Chairman ber hian hrem tur a ngah lutuk kan hlau deuh a, ‘Women Jail lamah kha chuan i hruai chho lo mai ang u’ kan ti a, kan han kal ta lo a ni. Tin, ruangphurhna chungchang hi, a lawmawm a. Keini hi a chhawr tangkaitute kan ni takzet a. Kan harsatna tawh fo thin te um kiana a awm hi a lawmawm ka ti a.

Tichuan, overall ah Governor Speech hi adopt turin ka thlawp ve a ni e.

SPEAKER : A lawmawm e. Tunah member zahawmtak Dr. K. Beichhua i lo sawm ang.

DR. K. BEICHHUA: Pu Speaker ka lawm e. Kan Governor thusawi hi a tlangpuiin a tha thawkhat viauin ka hria a. Sorkar hmalakna, hmalak tumna chi hrang hrang a rawn sawichhuak a ni deuh ber a; achievement rawn sawichhuah teuhna hun a la ni lo bawk a. Hun a la rei lova, achievement te pawh kan la nei chho turah ngai ta ila. Point by point in department hrang hrang a rawn sawichhuak a. Kan Legislative Assembly Member-te kan chet dan, kan ethics leh kan etiquette te a rawn fak a, a lawmawm hlein ka hria a. Sulhnu tha tak kan hruaitu hmasate'n an lo hnutchhiah hi keini pawhin kan zawm zel tur thil nia ka hriat avangin, a lawmawm ka ti a.

Tin, Mizoram sorkar hand-holding scheme chungchang te pawh a rawn sawi a. *Bana-kaih* kaltlanga kut hnathawktute tana ruahmanna leh chhawmdawlina hrang hrangte pawh a rawn sawi chhuak a, a lawmawm viau a. Chutih rual chuan, a thu rawn sawi hi sorkar thil tum dan a rawn sawi deuh tlangpui a. Achievement ang chi kha chu, kumkhat lek kan la kal chho a ni a, hetah hian sorkar thil tum leh hmalakna te hi 'mipui hian kan lo thlir ran a ni' tih hi sorkar pawh hian min hriatpui se, theihtawp chhuah se. Theihtawp a chhuahnaah hian kan theih tawkin sorkar puih theihna te a awm chuan kan hnial lova. Kan tihtheih zawngte a awm a nih chuan, 'sorkar kut-ke ah kan tang thei reng a ni' tih lai kha ka rawn sawi duh bawk a.

Tin, Home Department chungchanga chhinchhiahtlak tak chu, Forensic Science Laboratory-a hmalakna hi a ni. India rama hmasa ber ni tura case pending awm miah lova hma an han la thei kha a ropui hlein ka hria, Pu Speaker. Chutih rual chuan, Home Department hi department lian, leh ramin a chhia leh tha, kan him leh himlohna inngahna a ni a, a changtu tan pawh thil harsa tak a nih ka ring a. Kan ram tun dinhmun ngaihtuah hian heng ruihhlo, smuggling, kuhva tawlhruk tih te hi a reh hleithe i lova. Chanchinbua hmuh tur a awm fo mai te pawh hian ngaihtuahna a ti kal thui hle a. Hengah hian kan Home Minister chak tak hian theihtawp chhuahin hma la zel ta se, keini a mipui nawlpuite pawh hian theihtawpin kan lo pui ve bawk ang a. Chutiang chuan kal ila a thain ka ring a.

Tin, Police hi tun dinhmunah hian indaihlohna a na viau mai a. Rambuai kan ni lova, buaina harsa lutuk tawh tur kan nei lova. Ka ngaihtuah thin chu, tunah hian kan ramah hian buaina thleng ta se, police indaihlohna hi a nasa angreng si a, kan va buai dawn em, tih hi ka ngaihtuahna a ni a. Chuvangin, kan sorkar thar hian police vacant posts tam lutuk pawh hi hnawhkhah dan ngaihtuah se a pawimawhin ka hria.

Tin, Agriculture and Farmer's Welfare chungchang kha a rawn sawi bawk a. 'He sorkarin a ngaihpawimawh ber chu - *Agriculture* a ni' a rawn ti nghe nghe a ni. Hengah hian kan Agriculture Minister te pawh an tang hle a, nimin lamah pawh sawhthing tam tak an lei sak tih te pawh kan lo hria a. Chungah chuan kan focus deuh bik - hmunphiah, aieng, hmarcha tih te kha chu a la ri miah lova, sawhthing erawh kha chu nimin khan an lei tan tih chu kan hria a. Hengte pawh hi mipui hian kan thlir thup a ni, tih anmahni pawhin an hriatchian ka ring a. Heng atan hian hma theihtawpa kan lak zel hi a pawimawhin ka hria.

Tin, "*Planning & Implementation Programme* hnuaiyah hian mahni kutkawih leh thildanga eizawna bultan turte an hlawhtlin theihna tura an mamawh sum-fai pek annih theih nan

‘Mizoram Bana-kaih Venture Capital Fund’ chu bul tan tum a ni” a rawn ti bawk a, hei hi a ropui hlein ka hria a, a taka kan hmuh ngei pawh hi kan beisei a. Chu chu mipuiin kan thlir dan a ni bawk a ni.

Tin, Finance chungchang ah hian kan Governor hi a sawi inthlahrung deuh hlekin ka hria a. Chhiah tlingkhawm a lo pun zualna turin 3rd September, 2024 atang khan tuialhthei man chu tihpun a ni a. He tihpunna chhiah tlingkhawm hi *Social Infrastructure and Services* pek tur bakah kawngpui siamthatna atana hman tur a ni. ‘Thildang atana hman tur ni lovin, chung thil atana hman tur a ni’ tihlai kha a rawn sawi bawk a. Ka ngaihtuah a, kan kawngpui dinhmun hi keima mimal pawh hian ka vei ve hle a. Kan khawpui internal road dinhmun, thal laia tun ang dinhmun a la ni hi, fur han thleng phei se chuan Pu Speaker, engtin nge maw kan awm ang le? Keima mimalin ka mang a lo ang ve viau thin a ni. Chuvang chuan, kan PWD Minister hian hengah te pawh hian chak takin hma la thei se a chakawm viau a ni.

Tin, Power & Electricity Department chungchang kha a rawn sawi a. Hmar lamah chuan hmun tam takah hmasawmna a awm a. Thenzawl Power Plant te, Chite Solar Plant te, 132 kV line Bairabi – West Phaileng te, Mamit 132 kV tower line km 74 complete a ni tawh te a rawn sawi a, a lawmawm ka ti a. Chutih rual chuan, chhim lama kan tawngkam lar ber P&E Department chungchangah chuan ‘Khawiva line a chhia; Chawnhu line a chhia’ tih a ni deuh reng mai a ni. Chuvang chuan, chhim lama hmalakna a rawn lang lo hi a vanduaithlak ka ti a. Hei hi kan Power Minister pawh hian a theihngihl chu ka ring lova, theihtawpa hma min lo lak sak turin kan inngen ni se. (**Speaker:** Minute 7 a kawka, i zo thei tawh em?)

Pu Speaker, kan zo tawh ang e. Social Welfare Department-ah khan EMRS 11 kha kan hunlaia kan phak tawka kan lo zuk dilchhuah leh kan zawh deuhthaw tawh kha a ni a. Khami piah lamah khan 6 keimah ngeiin ka zuk dilchhuah kha a awm a ni. 11 functional a ni ta a, tunah hian paruk dang hi State hian eng dinhmunah nge a thlenpui tak, tihlaia hi a changtu minister-in min lo ngaihtuah sak ta se.

Tin. Jordan Centre hi ruihhlo ngaite dahkhawmna, kan hunlaia kan siam bawk a ni a. Khu khu *Expression of Interest* in tunah khuan mimal hnena hlanhhawn tumna a awm a, chhangtu pawh tumah an awm lo tih kha a ni a. Hmanni ka zu kala ka zu en chu, a lungchhiatthlak reuh khawp a. *Ministry of Justice and Social Empowerment* atang hian an inhawng viau mai a ni. “Infrastructure Development atan chuan kan ti hlei thei lo ang a, mahse inenkawl na tur erawh chu theihtawp kan lo chhuah ang a, kan lo pui zel dawn che u a ni” tih kha a ni a. Chuvang chuan khungte pawh khu theihtawpin hmalak ni ta se. Department dang dang hi a rawn sawi deuh nual a, ‘project thelulh mek a ni’ tih te, ‘hei hi kan tum a ni’ tih te a rawn sawi nual a. Project tam takte pawh kan thehlut a, a lawmawm. Project thelulh te pawh hi a hlawhtlin theih a, a hlawhtlin loh theih a ni. Chutiang chuan, kan hmalam kan kalchhohna turah hian tih tak takin kan sorkar pawh tang se. Chutiang ni lova kan kal tumdan leh plan te pawh hi mumang aia ropui lo hian a awm ve theih tho a ni tih te pawh kan sorkar hian a hriat ka ring a. Chutiang tur chuan chak takin ke i pen theuh ang u.

Motion rawn puluttu pawhin tha takin a rawn pulut a, han thlawp loh chi a ni lova. Pu Speaker, kei pawhin ‘ka thlawp e’ tih ka rawn sawi a ni.

SPEAKER : Aw le, a lawmawm e. Member zahawm tak Pu C. Ngunlianchunga i lo sawm ang u.

PU C. NGUNLIANCHUNGA: Pu Speaker, ka lawm e. Kha, kan ngaithla teuh tawh ang khan, a lawmawm a. A lawmawm rualin, sawrkar hmasa, hmasa leh atanga hma lo lak tawhte wawiinah a hlawhtlinna kan han hmu chho a; Governor thusawiah a rawn lang te kha a lawmawm ka ti a.

Chutih rual chuan, helai phek 2-na, point 9-na ah hian, Home Department-in a ramri ven chungchangah BSF, Assam Rifles leh Mizoram Police-te tangkawpin hma an lakna te kan ngaithla a, a lawmawm ka ti a. Chutih rual chuan, khawvel a lo changkang zel a, a bikin Myanmar te nen kan inkalpawhna kawng te a lo pawp chho zel a, lehlam lehlam atangin. Chutih lain, Saisihchhuah-ah te hian Police duty an awm tha lo hle a. Tin Assam Rifles lam pawhin Sangau a tanga vil deuh mai a ni a. Kan hriat angin, kan ramah ruihhlo a lo lut nasa em em a ni. Ramriah duty mumal an awm loha duh duha an lo kan thei a nih chuan, ruihhlo luhna a zalen em em mai a. Saisihchhuah, Archhuangkai, Lungbun te, Ainak, Chapui te. Tin, khilamah Zochachhuah ah ngei ah te pawh a ni ang a, hei hi ven uluk, duty dah tam deuh te chu a ngai a ni. Chutilo chuan, kan ramah, a bikin keini Chhim lamah pawh ruihhloin nasa takin kan thalaite a run mek a. Chuvang chuan, alo lut tur hi a theih chin chinah tun aia nasa deuh hian han buaipui ila a zia chho mai te pawh a rinawm a.

Tin, serial no.10, Home Department hnuaiyah tho ah hian, “Police hmunhma leh an hmanrua bakah an awmna hmun thuam-that hna nasa takin a thawk” a ti a. 3rd IR Battalion, Thingkah Lawngtlai ah hian an awm ve a, hei hi ngaihsak an hlawh nep deuh em aw, ka ti a. Hmanni ah an Commandant te pawh an lo leng ve a, MLA fund te min lo dil a ni. An mahni chhungah PCC han tihna turin harsatna lian tak an tawk ve a ni. Fur a tla leh ang a, chungah te chuan keimahni awmna leh battalion chhunga mite inkal pawhna, biakin kawng ang chi te leh hmun hrim hrim a saw. Tin, a kalkawng construction pawh an zo tawh a, IR an awm tawh a. Eng emaw ram buai deuh a awm avangin main road atanga battalion headquarters hmun khi eng emaw chen black-top loh a ni a. Fur ah chuan innam te a ngai a, rikrum thilah police hote kal nan a buaithlak em em a. Chuvangin, khilai khi ngaih pawimawh ni sela.

Vanneihthlak takin SASCI atangin jail te pawh tihchangtlun tur a ni a, a lawmawm ka ti a. Chutih rual chuan kan battalion headquarters hmun te hi a theih chin chinah an mamawh zualpui (an duh zawng zawng phei zawng a tih theih hauh lo ang) hi chu ngaihvena enpui a tha khawp mai. Wawiin nia kan Home Minister zahawm tak pawh hi a hmunah kalin a tlawh tawh niin ka hria a, an dinhmun chu a hre chiang viauin ka ring a. Sawlam, bik takin *Undivided-Chhimituipui* tan 3rd IR Battallion Headquarters kan nei hi kan lawm em em rualin, an tana han chet velna leh han inkalpawh zung zung theihna tur atan pawh a pawimawh hle a ni. Helai hmalaknaah hian a tel lo niin ka hria a, kha kha ngaih pawimawh a tha khawp mai.

Tin, a pathumnaah chuan, oil palm chin chungchangah (phek 4-na) ah hian, keini Chhim lamah pawh oil palm hi, a bikin kan bialah a tha duh khawp mai a. Amaherawhchu, tunah chuan hnawksak a ni ti tih a ni. A hralhna, a herna khawl leh a processing tihna tur a awm ve loh avangin a manganthlak khawp mai a. Lawngtlai West lamah khian a bik takin a

awm hner hnur mai a, a nihna anga hman tangkai a ni ta lo khi pawh ka ti a. Kan sawrkar hian min ngaihpaawimawh sak hram hram sela.

Tin, Transport Department-ah, Lawngtlai hi district kan nih angin MVI kan nei lova, license pek chungchangah kan buai khawp mai a. Kan Minister pawh hi ka zawt thin a, ‘kan la tep; ka la tep’ tih reng a ni mai a. A district veriang ruangin MVI han neih loh chu, MVI hi a test tirtu leh a titu a ni si a. Helaiah hian license te pawh 21,638 lai a awm a, motor 12,216 lai register a ni. Khatiang tho khan Lawngtlai pawh a ni ve a, MVI te an awm loh chuan harsatna tam tak kan tawh tlat a ni.

Tin, PHE Department (Pu Nitea Department) kha chawhma lamah zawhna a lut tawh a. ‘In tin connection pek a ni a, a function a ni’, tih rual khan, plastic pipe sorkar hmasa ah khan kei pawhin zawhna ka siam a, a vanduaithlak khawp mai. An han zam a, vawikhat chu a chhuak mai; mahse a takin a function mumal lo a ni, a tui a awm tawh lo bawh nen. Chuvang chuan, Pu Speaker, helaia Governor thusawiah hian, connection pek vek tawh, tap hmanga tui kal tawh anga a lan lai hian, a takah erawh chun, a ni lo a ni.

Tin, 5-naa ka sawi duh chu, phok 15-na, Soil Department-a hmunphiah lei turah khan Chhim lam kan tel ve dawn lo nge ni; kha, a dahkhawmna tur in te pawh kha khawthlang lam te, hmar thlanglam ah te kan han sa a, sawlamah pawh hmunphiah hi a awm ve teuh a, semrual te pawh a tha lawm maw ni le? ‘Pukzing’ tih te, helaiah hian a awm nual kha. Chuvang chuan, helaiah hian kan Minister zahawm tak hian min hriat sak se.

Tin, Fisheries kha, kan Minister-in helai House ah ngei hian, ‘Tumah thlei bik kan nei lo ang; sangha khawi te kan tanpui ang’ tih khan a sawi a, ama ngaihtuahna ah chuan a dik ang. Mahse, Lawngtlai District ah tun kum kal laia a kal danah erawh chuan, tu emaw recommend loh chuan Aizawl a thleng thei tlat lo; Aizawl a thlen theih loh chuan, hmuh ve ngaihna a awm tlat lo. Sawlai district atanga drop anni a. Chuvang chuan, *kalphung-thar* kha a thar mang tlat lo a ni. Kan Minister zahawm takin “kalphung-thar ah chuan, tumah kan thlei bik dawn lo e, angkhat vekin kan ti ang” a ti a. Sawlam atanga recommend tute an awm loh kha chuan, a dila te kha, “nangni chu in leng lo”, tih kha a ni tlat mai a. kha kha kan Minister pawh ka hrilh tawh na in, min hriatsak ula ka duh a ni. A ti tak tak lem lo, party induhsaknaa kal lo tura kan sawi thina kha, a kalin a lang tlat mai a, Fisheries ah hian.

A tawp ber atan chuan, ruangphurh chungchang hi. Hei keini tan hian a buaithlak khawp mai a, lawmawm em em rualin. Death certificate a ngai a, adhaar card a ngai a, YMA/YLA recommend a lo ngai a, thihna thilah chuan a lo hmanhmawh thlak a. Tunah pawh hian keimahnina kan phurh si, pawisa la pek loh hi ruang 5-6 lai kan nei a ni. A chhan chu, hospital ah death certificate te an thih rual khan an pe mai silo a, a buaithlak khawp mai a. A minister awm se a that tehreng nen. Hei a ngaithla tur lah chu, ‘department lamin lo buaipui se’ tih dawnin, department lam pawh chu an awm lo a, Demand ah te kan la sawi turah ngai i la. Hei hi a that viau laiin, keini thingtlang bialtu tan chuan tlemin Pu Speaker, harsatna kan la nei deuh a ni. Tlemin hei ai zangkai deuha kalpui dan hi awm thei se a lawmawm hle ang.

Vawiinah Governor thusawiah lawmna tur tam tak a awm laiin, tlema duh thawhna deuh han awm te kan sawi thei a, lawmawm ka ti a. He Governor thusawi hi ka thlawp e. Ka lawm e.

SPEAKER : A lawmawm e. Sawi tur kan awm tawh lo a ni ang e. Tunah chuan kan Opp. Leader kan sawm dawn ang a, Leader of Opposition leh kan House Leader te hi chu hunbi kha kan dah pawimawh lutuk lem lo a nih kha, a awm tawh chu an hre turah ngai ila. Tunah Opp. Leader ilo sawm ang.

PU LALCHHANDAMA RALTE, OPP. LEADER: Pu Speaker, ka lawm e. Lunglei West bialtu MLA zahawm tak Pu T. Lalhlimpui'an kan Governor zahawm tak thusawia, *Motion of Thanks* a rawn propose hi, a rawn sawi hlim atang khan sawi a ti chakawm a, a phurawm a, a presentation tha ka ti a. Amah kha mimal tak pawhin kan congratulate hrim hrim a. Tin, kan Governor General VK Singh, Mizoram a rawn awm vawi khatnaa House address nei hmasa ber a ni a, kan han sawi ho hi a lawmawm a. India ram General lar leh Central Minister pawh kum 10 zet lo ni tawh, Mizoram ah Governor a rawn awm tlat mai te pawh hi, a chhan thil tam tak awm turah ngai ila. Chumi in a thusawi kan han sawiho thei hi a lawmawm hle mai. Kan thusawi point hrang hrangah khan kan hlawm deuh ang a. Chutihruah chuan, lawmthu sawina tur tam tak pawh a awm awm e.

Kan Governor thusawi han en hian, “sorkar kum kal lai mek hmalakna leh hlawhtlinna te bakah kum lo kal leh tura sorkar hmahlirte kan ngaihthla ho ta a” tiin a tlipna ah khan a han ti a. ‘Kum kal lai mek leh kum lo kal leh tur atana sorkar hmahlir’ a ti a. Kan sorkar hmalakna tlangpui a sawi laiin, a lehlamah chuan a hmahlir kha a tel tam lo ka ti deuh a. Chuvang chuan, ka thu han sawinaah hian a lanna tlang dang deuh atangin, thahnemngaihna atanga tlema zawng pawh han sawi ka duh a.

Pakhatnaah chuan, *hand-holding* chungchang point 5-8 naah khan a rawn sawi a, a lawmawm viau mai a. Chutihruah chuan, Ni 10.1.2025-ah khan Mizoram State Policy Co-ordination Committee kan Chief Minister hoin an thu a, chu chuan mimal te bana kan kaih chhuah turte hi nimin, ni 20.2.2025-ah kha chuan an kaih turte hming list final thei tawh ang khan Zonet news ah, ni 10.1.2025 khan an rawn puang a. Nimin lama tichhuak tawh tura kan ngaih kha sawhthing hralh deuh chauh a lo ni kha, ‘he hand-holding hi an nghakhlel khawp mai’ tih ka sawi duh a.

Tin, khami huang chhungah vek khan thlai pali thlan bikte hralh chungchang a rawn sawi a, sawhthing nimin lamah a vawikhatna atan an han hralh a. Kan Chief Minister statement ni awm tak ZPM Legislature Party-ah khan, “Mizoram-a sawhthing awm zawng zawng kan lei zo dawn” tih ang khan a rawn chhuak a, kha kha a nih chuan, a lawmawm viau ang a. Chutiang ni lova sawhthing lei hun tur a hmasaa sorkar thuchhuah ah khan ‘January-May thla’ tih khan a inziak a. Tuna mi hi Febuary-March inkarah khati zat chauh lei tur a nih chuan, quintal 2000 chuang chuang thar tur khawtlangah te, niminah khan tlem te te, chhungkaw khatah quintal pawh tling manglo han lei tur kha chuan, sorkar hi na zawka kan kal loh chuan kan kuthnathawktute beidawngah kan siam ang a; a thawm ring deuh hi a zuih tut ang tih ka hlau khawp mai.

Kut-hnathawktute sawhthing kan chin tir a, tibeidawng lova sorkar rate tuk ang aia tlem lova an hralh ngei dan tur; tunah pawh sorkara an rinna a tlahniam lek lek a. Kg ah cheng 24-25 pawha hralh maia cash down theih te pawh hi an thlang lek lek a. A ba in sorkarin a la leh nghal a. Kan House Leader hian nakinah a rawn sawifiah theih pheih chuan, a ba in a han la miah miah a, khangte kha engtikah nge pawisa a pek leh theih dawn? Kan kuthnathawktute hi beidawng lova, beisei neia kan siam a tul mang e. Chutihruah chuan,

ring taka kan sawi tak loh chu, *hmunphiah chungchang* a ni. Tun tumah hian news zawng zawngah hmunphiah hralh chungchangah hmunphiah chinna area an mangang em em a, sorkar inrawlhna avanga hmunphiah hralh thei lova a tawl tam lutuk mai te. Tin, collection center kan siam dan pawh hi sorkar hian ennawn ta se. A aia tam *entirnan*: Kan bial Tuivawl te pawh hmunphiah chin tamna a ni a, phunphiah china eizawng an tam a. Mahse, collection center kan nei ve lova, Saipum lamah phurhthlak a ngai a ni. An hmunphiah tharte motor hire-a phur tur chuan a ngaihna a awm lo reng reng. Chuvangin, collection center hi ka bialah pek ve theih ni se. Vawiin niah sorkar atanga hmunphiah lei tur awm awm si, a tak awm si lo; kan hmunphiah chingtute an tap ngawih ngawih ringawt mai a ni. Chungte avang chuan, hun a la tlai lova, kan Chief Minister statement ah khan, ‘March thla ah pawh kan la lei zel dawn’ a tih avangin, sorkar hian mipuite thlamuan turin handholding kan kalpui mekah hian kan kuthnathawktute beidawng mekte hi an beidawn lohna turin in thla zar zau lehzuat turin ka ngen che u a ni.

A dawt lehah chuan, kan han chhiar nawn thina ka beisei deuh mai, hmuh loh ka neih a awm a, 2023 sorkar tan tirha kan Governor hmasain address-a a sawi len em em pakhat, (Pu Speaker, i phalnain ka’n chhiar lawk ang a) *“My Government is determined to rid the state of the scores of corruption and will have a zero tolerance toward”* tih leh *“the mission to eliminate corruption from public life”* tih a ni a. Corruption nuaibo leh corruption lakah mipuite an fihlim theihna tura zirtirna, ‘he sorkar hian a ngaipawimawh dawn’ tih hi tun Governor Speech ah hian a awm ta miah lo mai hi, ngaihtuah tur a tam hle mai a. Engatinge hun hmasa lamah kha chuan Lok Ayukta tih chak - Lok Ayukta a Prosecution Branch tih changtlun te, heng laka inhnawih te, mantute thuam chak hi sorkar langtlang felfai a nih theihna tur atana ruahman tumna kha a lang ta lo hian ngaihtuah loh loh tur min ngaihtuah tir a ni.

Ka rilrua lo awm tak pheiah chuan, an ziah loh chhan tur nia ka rin deuh pakhat chu - tunhnaiah LADC ah sorkar thar MNF leh Congress te sorkarna kha phehthluk a lo ni a. District and Session Judge Court-in corruption case-a thiam loh a chantir, jail ah te pawh lo lut tawh ZPM party ngeiin ‘bang nghal rawh se; ram hruaitu ni tlak lo’ a tih kha CEM turin an propose leh tlat mai si a, he sorkar hian. Chuvang chuan, ‘corruption kan do dawn’ tih lam hi an ziah ngam ta lo em mi ni ang le? Corruption ti niawm anga puh leh court-in thiam loh a chantir te an chawisang tur hi an ziah lan ngam loh chhan a ni ang em, tih kha ka sawi duh a ni.

A dawt lehah chuan, Pu Speaker, kan Governor thusawi pheh 91 leh 93-naah khan Excise hmalakna hrang hrangte a rawn sawi a. Ruihhlo hrang hrang mante leh zu khap chungchang te a rawn sawi a ni. Mahse, vawiin niah hian thil pakhat sorkarin a tum nia kan hriat an ziah miah loh, he sorkar kal lai hmalak tumna Governor-in a rawn sawi tel an thup tlat si. He sorkar hian he House ah ngei hian zu thlah zalenna bill a rawn pulut dawn niin kan hria a. He thil lian tham tak hi engatinge a ziah ngam si loh? Hei hi an ti dawn nge, an ti dawn lo ka hre lova, sorkarin hmalakna atan a hmang dawn a nih chuan, mihring a nghawng tur te, hnam leh kohhran a nghawng tur te en hian, engatinge a ziah ngam si loh? A phenah hian inthup leh biru a va tam ve, tih hi ka sawi leh duh a ni.

Ka han sawi leh duh chu, kan House Leader pawh a thlavang, kan hauh ngai vein ka hria. A bik takin kan Horticulture Minister te, kan Industry Minister ten kan House Leader tawng in umzui ngai a awm ka tih chu, he sorkar kum thar hmalakna tur leh kum kal laia

kan sorkarin hma a lak nghalna tur, ‘karleh maiah kan ti dawn’ a tih te, ‘nakum lamah hma kan la dawn’, a tih *entirnan*: ‘sawhthing herna ka bial chhungah kan dah dawn a, nakum lamah chuan state pawnah pawh hralh a ngai tawh lovang’, tih anga Thenzawl-a a thusawi, a voice record nen, video nen kan nei thlap a ni. Engatinge horticulture lam khan sawhthing herna an din loh, kan House Leader sawi kha a ni si a?

Tin, ‘mau hriak herna karleh lawkah kan tifel dawn’ tih kha, nikum daih ah a sawi tawh a, July ni 5 khan. Mahse, vawiin thlenga mau hriak herna kan la ti lo te hi; a umzuitu turte khan in umzui lo a ni. Kan House Leader-in a sawi hi chu umzui rawh u, kan ti a ni.

Chu lo lehah chuan, kuhva thatzia, ‘a chhumna tui rawng atan te, a kawr coco peet atan te’ kha a ti a. Thil tha a hmu a ni; vision a nei a ni. Mahse, Industry Minister te khan ‘engatinge khang te kha a umzui loh?’ ka ti a ni. Chungte chu kum kal laiah leh kum lo kal leh turah sorkar hmalakna tur a tarlan naah hian policy a nih avangin a awm lo hi ka vupui khawp mai, ka ti a nih chu.

A dawt lehah chuan, School Education Department kha 32-37 naah khan a rawn inziak a, kan Governor thusawi kha. Chutah chuan, kan memberte pawhin an sawi, ‘sorkar hmasain upgradation’ kan tih te, ‘kan sorkar kal lain a fel lo deuh lai thenkhatte a ennawn dawn nia’ in tih te pawh kha kan hrethiam lutuk. Amaherawhchu, ‘Budget-ah pawh kan dah thlap; a awm sa’ tih kha, hei thla leh chauh a awm tawh si a. Sorkar hian upgrade nghaka awm ngawih ngawihte chungchang hi in tifel tawh em? Rules te pawh kha in rawn siam tawhin ka hria a, tih thuai thuai hi a thain ka hria a. An nghakhlel si a, tun financial year chhungah hian tih hram kan tum em? Mahse, kha kha kha a inziak lang mang si lova.

Tin, Health & Family Welfare Department chungchang, phek 119 - 126 ah kan Governor khan a rawn sawi a, ka chhiar ka chhiar a. ‘Clinic Center, Sub-Center ah upgrade a ni’ tih te pawh a awm a, a lawmawm a. Mahse, a aia lian - Mizoram State Healthcare, ‘Universal Healthcare-in chhungkaw khatah nuai 5 a cover dawn; sorkar kumtharah kan ti dawn’ an ti a, an puang a, kut kan beng. ‘Kan thei leh lo; September-ah kan ti dawn’ an ti leh a, kut kan beng leh a. Mahse, hetah hian ziahlan a ni leh reng reng si lova hi engnge a chhan? Hengte hi, Asian Development Bank-a kan pawisa hmuh turte kan hmu loh avanga kan ti hrih lo nge? Healthcare scheme chhungkaw cover lian lutuk tur ziahlan a ni miah lo mai hi a pawl ka ti khawp mai.

A tawp hnaih lamah chuan, Pu Speaker, kan thianten an sawi tawh, kan House Leader hian Oath taking tlai ah khan a hmalakna hmasa berah Tawngtaina - *Bethel Centre*-ah ruihhlo ngaite a zuk tlawh a, a ti tha ka ti a. ‘Kan sorkar hian kan thalaite natna hi a vei a, nasa takin hma a la dawn a nih hi; kan House Leader hian ram natna hi a vei a ni’ kan ti a ni. Mahse, Sethawn - *Jordan Centre* sorkar hmasa ina a lo sak, mi tamtak enkawlina hmun tur, vawiinah hian a enkawltu tur tu-tute emaw a zawrh kual a. Sorkar hian engatinge a tih mai loh? *Expression of Interest* a ti a, tumahin an chhang baw si lova. Vawiinah hian kan thlaite’n heti khawp hian harsatna an tawh a, mimal enkawl rawngbawlina ngaite hnenah leng leh leng lovin home pakhat a sang telin an inkhung a, mutna pawh an chang mang lo a ni.

Chuvang chuan, enkawlina tha zawk kan miten an mamawh lai hian, sorkar hi tun aia na zawkin kal se; EOI lampang nilo hian, sorkar hian na zawkin hma la se, tih hi; kan Chief Minister ngaihpaawimawh kha a nih avangin a rawn zia a, mahse, a rawn ziah dana

expression of interest an tih hian ka khawp-kham lo deuh a, kan Governor thusawi hi kan sorkar hian ennawn se ka duh a.

Chutah chuan, thil pakhat (a tawp nan tak tak) ka sawi duh chu, VC leh LC te, MDC te bye-election kan neih chungchang (point 105-na) ah kan Governor khan a sawi a, a lawmawm khawp mai a. Kan hmanhmawh lutuk deuh nge ka tih chu, ni 12.2.2025-a LC leh VC inthlan zawh tak kha ziaakah a telh miah lo hi; sorkar hmalakna hlawhtling leh election lian, democracy grass root lian em em, Zoram khua zawng zawng kan inthlanna a han sawi lang lo hi; kan Governor hi kan fin-chhuah lo lutukin ka hria. Chu chang ni lovin, hmanhmawh mang khengin kha inthlan kha, roll te kha a phuai-luai em em; inthlan hma ni 2-1 ah roll a lo chhuak a, zahthlak em em chu - Aizawl Municipal Corporator pawh vote thlak turin a kal a, roll-ah pawh a lo awmlo nia maw le; a phuailuai lutuk a ni. Khatiang pheng-phunga inthlan kan han buatsaih kha a pawiin ka hria a. heta ziahlan ani lo te hi khang vang te pawh kha a ni em? Engpawh ni se, Pu Speaker, thahnemngaih thuah a lanna tlang dang atangin a ziah leh ziah loh te kan han sawi a, sorkarin kum khat chhungin kha chen a hmalaknate pawh kan hmu a, he kum lo kal leh turah hian kan sorkar hian nasa zawkin mipui hnena an intiam ang hian hma a lak chhunzawm kan duhsak a. Kan Governor thusawia *Motion of Thanks* hi ‘kan thlawp a ni’ tih ka han sawi nghal a ni e. Ka lawm e.

SPEAKER : A lawmawm e. Tunah chuan, House Leader sawm ila, tichuan kan *Motion of Thanks* chungchanga discussion hnuhnung ber a ni tawh ang.

PU LALDUHOMA, CHIEF MINISTER: Pu Speaker, ka lawm e. Vawiin chu thutna lam kan buaipui hle mai a, kan Opposition thutna lam kan buaipui a, kan Minister thutna lam buaipui pawlte kan awm a, buaipui tur a tam tehreng nen hian. Member-te hi a thih theih a; seat hi a ruak thei a; an bang thei a, an ban thei bawk a. Tin, member ni hauh lo hi Chief Minister a nih theih a, Prime Minister pawh a nih theih a ni. Chuvangin, a tira chhechham ang ngawt hian thutna hi tih theih a ni lova; party thu thu a ni a. Senior te pawh hian thil hi kan hresual ve thei thin a nia.

An sawi tam tak kha demand discussion-a kan la sawi chhunzawm tur minister concerned ten an la chhan turah te kan khek nual ang a, a theih chin chin chu kan react ang a. Tin, Governor thusawi te kan sawi a, a sawi loh te kan sawi bawk a. Sorkarin a tih tawh leh a tih tur hi han ziah sen chi pawh a ni lova, a huam vek a khang khan. Kei pawh a sawi lohte pawh ka sawi duh ve nual dawn a ni.

Pollution Control hi a buaithlak khawp mai a. Kan intlar put reng mai a; tunhma atangin kei pawhin ka vei a ni a. Mahse kum 20-30 chhunga sorkarin a tih hleih theih loh kha keinin kum khat lek chhung hian kan tifel nghal mai thei lova. Mahse, kan Transport Minister-in tihfel a tum mek a, tun aia ziaawm hian hmun tam zawka tih theih turin ruahmanna tunah hian buaipui mek a ni.

Tin, kan Governor thusawi hi ‘kum hmasa nen a inthlau’ tih kha ka pawm zawng tak a ni a. Kum hmasa kha chu *Year of Consolidation* a ni a, austerity measures kan la bawk a. Austerity measures phei hi chu kan lak chhunzawm zel dawn a, a tul chen chen. Chuvang chuan, nakumah phei chuan a inthlau leh zual dawn a ni. A inthlau chho zel ang a, sorkar hmalakna a tam tial tial dawn a ni. Tuna a speech-ah hian tunhmaa la awm ngailo eng emaw zat thil thar kan hmu bawk a ni.

Tin, thlathar lei chungchangah hian, aieng leh hmarcha ah kan buai lem lo; tunah hian tluang takin a kal mek a. Hmunphiah hi a hring lei kan intiam lova, kan policy-ah pawh a ro a ni lei tura kan intiam ni. Amaherawhchu, kan mite hi an harsa a, an phoro hman mang lova; tlawm deuh hian a hringin an dek ral leh mai thin avangin, a ro lei tur hi a tam lem lova. Hmanniah India rama hmunphiah siamtu company lian ber, kum 80 chhung lo kalpui tawh te nen kan inkawm a. Plastic hmunphiah hi a lo chhuak ta a, ‘hmunphiah pangngai market a tibuai em?’ tiin ka zawt a. Ani chuan, ‘plastic hmunphiah hi keimahni siam tho a ni a, hmunphiah pangngai lei tur kan hmuh zawh loh vanga siam mai kan ni’ a ti a. Mizoram hmunphiahte hi chu tlem a ti em em a ni. Mahse, a roa lei tur kha kan miten an nei hman mang tlat lova, a hring hian an lo hralh leh thin a. Tin, a ro awmchhun pawh a grading an ti thei lova. Kan tih vawikhatna a la ni bawk a, a inpawlh sawp vekin an dah a, Grade A leh B-ah a leituten an thliar bawk si a. A grading hi an tih theih loh avangin, a ro pawh a inpawlh sawp vekin an ti a, a leitu-in a grade leh kha a ngai tho tho mai a, a buaithlak khawp mai a. A rate pawh kha fix a harsa em em mai a.

Chuvangin, nakum lamah chuan tihdan pawh tidanglam ta ila. Kan Serlui bialtu zahawm takin a rawtna ang te pawh kha a tha zawk maithei a ni. A tha zawk kan la zawng chho zel ang a, a grading hi chu kan farmer-te hian an tih theih mai ka ring lova. Grading loh rate hi siamin, ‘a leituin a grading hi chu ti ta mai sela’ tih te pawh a ngaihtuah theih a ni. Chutiang chu hmunphiah chungchangah chuan kan kaldan a ni a. Eng pawh ni se, tuna an hralh bang zawng zawng hi a vaiin kan lei vek dawn tho; chu chu a process theitute hnenah kan pe ang a, an niin an lo process ang a, sum tuak nan te an lo hmang ve dawn a ni.

Tin, sawhthing thartute a thente’n ‘beneficiary’ tiin kan la lam a. Keini chuan ‘beneficiary’ kan ti tawh lova, ‘progress partner’ kan ti a. Heng kan partner te list kha hei, MCC ten min han nan chhoh leh avangin delay loh theih a ni lova. Chuvang chuan, nimin kha a thehluh hun hnuhnung bera kan dah a ni. Department tinin niminah khan Planning Deptt. ah an thehluh ang a, chu chu mipuia la puan theih a ni lo. Tichuan, Planning in kan sum dinhmun nen a en ang a. Kumin chu pilot project a nih dawn avangin tam tak kan cover thei dawn lova, mi-entawntlak zual thlan chhuah tur a ni a.

Tichuan, khang kan partner, department in a thlan hnua Planning in a lo thlitfim leh zawng kha training kan han pe zui leh dawn a ni. Training pe lovin tumah sum kan pe dawn lo. Loan component a ni emaw, GIA component a ni emaw training an pe vek ang a, department in an eizawna turah khan. Chumi hnu sum an dawn hnua pawh a nodal officer ten an la supervise zui zel ang. Tin, loh theih loh thil a nih loh chuan, a project a complete hma chuan a nodal officer te kha transfer loh tur kan ti a ni. Chutiang kalphung thar tak chuan uluk takin kan ti dawn a ni a. Tichuan, an han tihfel hunah training turin a thlan hote kha chu koh tur an ni dawn chauh a ni.

Tin, sawhthing chungchanga ka han sawi lawk duh chu - Reliance Fresh company te nen kan han indawr a, anni hi chuan India ram 5-Star hotel zawng zawngah a fresh in an zuar duh vek a. Sawhthing chauh a ni lova, a dang te pawh a ni vek a. Mumbai-a Pu Ambani-a mo neihnaa kan zuk kal tuma kan inbiakna chhunzawmna a ni a. Tichuan, tunah hian agreement an han signed ta a, kg 1 cheng 80/- in an la a. Ropuiliani Women Farmers’ Association te nen a vawikhatna leh a enchhin nan mt 10 an la a. February ni 20 ah khan Sailam leh Chamring atangin Kolkata ah an thawn thla a, ni 4 a thang a, a chhia a tam em em tih vawiiinah ka dawng a ni. Reliance ho pawh an zahawm ka ti a. Chuvang chuan,

hetiang kan rinawm dawn lo a nih chuan, sumdawna khawvela luh hi a har dawn mang e aw, kan tan hian, tih kha ka rilruah a lo awm a ni. Chuvangin, nimin atanga kan han lakte pawh hi kan rinawm tur a ni a, ‘a chhia kan hralh tur a ni lo’ tih kha, he House kaltlang hian ram pum kan inchah ni sela.

Tin, niminah kan han la tan a, ‘support price in pe dawn em?’ tih kha, tunah hian kan pe sa vek; support price kha. ₹50/- in kan lei a, kha kha ₹50/- aia tlemin kan hralh dawn a ni. Support price a inthulkhung sa vek a a ni. Tin, a man hi kan ba dawn lo; district tinah a man tur kan dah lawk vek a, anni khan an lo pe ang. Tichuan, tuna kan tihdan hi a hautak ta em em mai a ni. ₹50/- in kan laksak a, tunah hian India ramah hian a rate hi ₹30/- vel a la ni tlat a ni. Chuti a nih, chuan kg ah ₹20/- chu kan loss nghal ta a. Tichuan, loading leh unloading vel buaipui nan hian kg ah ₹3/- a lo ni leh a. Tin, a saiip hi ₹10/- man hi a thlawnin kan pe zel a ni. Chu, a han to tawh zia chu! Chu mai a ni lova, a collection center a hla leh a hnai tih kha, a zat a chhut tak tak theih lova. A average-a han lak hian, a kal man, Sairang-a kan zuk phurh thlenna man nen hian kg 1 ah hian ₹80/- vel kan seng tlat mai a ni, tunah hian. A to khawp mai. ₹50/- in kan lei a, ₹40/- vel kan hlauh tihna a ni ta a.

Tichuan, ‘engzatin nge kan hralh leh dawn, tih kha, a la Chiang si lova. Chuvangin, sorkar senso hi a tam dawn lutuk a. Support price pek mai a ni lova, loading leh unloading kan tum sak vek a; saiip leh a phurh man kan tum sak bawk a ni. Hei hi chu kan tlin bik awm lo mang e aw, kan ti a, zanin lamah te thukhawma enthat leh a ngai dawn a. Hengah hian sorkar phurrit a lo nih lutuka, sawhthing-a sum kan bel tam lutuk chuan, hmasawna dangin a lo tuar ve si a. Tlema sorkarin ruahmanna dang a lo siam a nih pawhin, kan insawisel lova, kan inhriatthiam tlan kan ngen nghal bawk a ni.

Tin, a herna hi tunah hian buaipui mek zel a ni a, ka bialah te pawh a hmun te pawh an nei fel vek tawh a. Amaherawhchu, loan puk turte an ni ve a, chuti zung zungin an lo tifel thei bik lova. Tin, mau hriak herna tur te pawh tunah hian beih chhoh zel a ni. Tunah hian nakumah chuan sawhthing herna tur kan inbun fel tawh kan inring a. Tin, a tihrona hi khaw hrang hrangah hand-holding sum 76tanga leia dah thluah kan tum a ni. Tichuan, employment a lo generate ve ang a, mahni khua khan anmahni hmunah an lo tiro ve ang a, chu chuan nakum lamah chuan min chhawk tawh turah pawh kan ngai a ni.

Tin, School upgrade chungchang kha, sorkar hmasain a tih han chhonzawm kha a tha khawp mai a. Amaherawhchu, rules mumal awm lova. Lo tih a nih avangin khatiang ngawt chuan keini chuan kan pal ve nawk nawk thei lova, rules te siamthat a ngai hmasa a, rules siamthat hian a lo duh rei ve phian a. Tin, school lo select tawh ho kha, a dik chia chuan upgrade tlak hlawl loh pawh kha an lo tel a ni. Chuvang chuan, ennawn loh theih a ni lo a ni. Amaherawhchu, sorkar hmasain a lo thlan tawh qualify pangngai chin kha chu tihdanglam a awm vak ka ring lova, kha kha a kaldan tur tlangpui anih chhoh ka ring a; tihngaihna awm hlawl lote kha a lo tel avangin, khang na na na kha chu tihdanglam a ni dawn a. Tin, sum leh pai ruahman sa a awm lova, expenditure sanction pawh a awm lo hrim hrim a. Khati ringawt khan sikul khati zat kha upgrade ngawt theih a ni lova. Sum dinhmun nena tihfel ngai anih avangin tunah hian kan ruahman mek a, kan peih tep tawh a. Tin, EMRS 6 dang sak leh tur a ni a, hei hi *by-nomination* in ZIDCO ah pek a ni a, an ti chho thei mai turah ka ngai a ni.

Tin, ruihhlo ngaite dinhmun hi kan vei tlang a, a lawmawm a. A buaipuitu core committee kha sorkar hmasa kum hnih chung khan vawikhatmah committee an lo nei lova. Chu chu kan din thar leh a, pawisa te pawh neilo chung chungin crore eng emaw zat kan dahbelh a, tunah hian active takin kan NGO te nen kan bei chho a. Amaherawhchu, a harsa khawp mai. He thil kan dova hi chu a hautak khawp mai a, amaherawhchu, kan beidawng dawn lo.

Sethawn hi sorkar kal tawh zawng zawngin tihngaihna an hriat loh tlan vek a ni a, kan run thei lo tlang a ni; dik chiah chuan. A hmunhma leh facilities a tha em em tawh si a, outsource dan ngaihtuah ila kan ti a. Chuta kan han zawrh chhina min chhangtute khan an ngam dawih khawp mai a ni. Engpawh nise, hei Baptist Kohhran te pawhin an rawn en a; hetiang a ti duh awmchhun hi chu sorkar hianin engemaw zat sen belh leh mai ta ilangin, annin enkawl mai sela, tih te ngaihtuah mek a ni a, tunah hian. Kan tuma chu - Sethawn hi ruihhlo-ngaite awmna atan a ni dawn lova, ruihhlo sim tawhte awmna atan a ni dawn a. Hei, kan speaker hmingthang tak Fredericka hian min hrilh thin chu, 'kumina camping kan han neiha kan campers te hi nikum te, nikum hmasa tea chhuak vek tho kha anni; a ngaite vek tho kha an lo lut leh thin', a ti a. Chumi awmzia chu, an han sim dawn thin a, an rahbi a tleu tlat avangin, an tlu lut leh thin a ni. Khangho kha lo chhawmdawlin Sethawn atang te hian skilled-development rawn train chhuakin, certificate te rawn nei ve thlap sela, kan handholding atangin keinin lo tuam hlawm ta i la. Tichuan, mi engemaw zat hi lut tawh lova siam kha kan tum chu a ni.

Tin, CBI general consent pek ni tawh lo ang te khan kan member zahawm tak khan a sawi a; thil hi a hre sual ve ang reng thei khawp a, a ni hi. Kan sorkar tirth te khan CBI consent vawihnih kan pe a. A chhan chu, India rama kan dan pui Evidence Act te, C4rPC te, IPC te tunah a thar India sorkarin a rawn nei a; vai tawngin a awm a, a hriat pawh ka la hre bik lo. Khami dan-pui a thar pathum kan lo neih takah hian CBI consent, kha mi dan hnuaiyah khan kan pek nawn leh a ngai avangin vawihnih ngawt kan pe a ni; kan pe lo ni lovin, kan pe mah mah zawk a nih chu.

Tin, '*corruption-do* a inziak lo' tih kha, Governor ina he sorkar thiltih tum nikuma a sawi tawh zawng zawng han tih nawn kha chu kan ti ngai lem lo a ni. Khang a lo sawi tawh kha 'kan ti tawh dawn ngai lo' kan ti reng reng lo, kan tih zel tur a ni a.

LADC chungchang te kan han sawi a, keinin pressure kan pe miah lova. Ka hnena an rawn sawi pawhin, tumah kan pressure ngai lo; amaherawhchu, miin kan pawla lo awm an duh anih chuan, kan hnar thiang lo; kha kha kan hotute ngaihda a ni. Chuvang chuan, miin sorkar min siampui an duh chuan, lawm takin kan lo pawm lo thei lova. Hman a tha lo kha, kalphung tharah chuan an tha tawh dawn a ni, tih kha hriat tel tur a ni. Hman kha a ang tawh dawn lo.

Tin, Printing & Stationery chungchangah khan, a chhut man ringawtah hian crore 1.32 kumin chhungin an hmu a ni. Kha kha in sawi tel lova; item hralhna kha nuai 83 a ni bawk a ni. Hei hi an rawn dah kher chhan chu, department te reuh te, a changtu minister-te ngei pawhin tunhma a an dawr duh loh department kha a ni a, helai House ah ngei an inpuang a ni a. Chu chu, he sorkarna hnuaiyah hian pawisa an lo hmu hnem ve ta khawp mai kha, Governor hian a chhuang a, a rawn ziak a nih ka ring.

Tin, ‘chhim lamah solar’ tih kha, solar hi kan uar dawn a. Hei, rooftop te pheh hi chu mimal pawh uar turin inzirtir ila. Solar hi a hmun tur a awm phawt chuan, kan minister hian chhim lamah tih kha a hreh ka ring miah lo.

Tin, oil palm chungchang hi, chhim lam kha sorkar hmasa lama an siampuite kha anni a, a zu-zi leh ta si a. Mill kha Kolasib lamah chauh Godrej khan a din a, ram pumpuiin ka ring ta a. Hei hi chhim lam tan chuan ban phak a ni ve ta lova. An lo rah tawh si a, tikhan an kut a durh thlawn leh ta a ni. Hei hi hre reengin, Gitanjali Company nen agreement kan siam a, chhim lamah mill dah turin. Tuna tanga rei vak loah chuan chhim lama mite pawhin a hralhna, a khawl hnai vai ah an neih theih thuai a beisei awm a ni.

Tin, zu chungchangah hian, zu thlah-zalen kan tum pawh lova. Amaherawhchu, wine leh beer hi chu regulate kan tum a ni. Chumi a tan chuan tlemin kan minister hian a Act a kha han amend a tum deuh hlek a ni awm e, tun Session ah hian.

Tin, Kuhva processing hi, *year of consolidation* chhung hi chuan sum hlawn lian hman kan han insum nachungin tunah hian hmun 2 ah tender kan chhuah tawh a. Processing tur hi Zamuang, Bilkhawthlir leh Buhchang ah kan dah dawn bawk a ni. Hei hi an inbun fel hnu ah chuan Kuhva hralhna turah kan buai tawh loh kan beisei.

Tin, healthcare kha ADB loan behchhanin sorkar hmasain a lo duang a, chu chu an lo inpuk tir hman si lova. Kan han bawhzui a, a lo harsa khawp mai a; tunah pawh kan la puk thei bik lo. Chu chu, ADB loan ber kha kan lak theih si loh chuan, a tihdan dang ngaihtuahin Pensioner Association te, kan sorkar hnathawkte, Private Hospital te kan thurualpui a ngai a; hmanni mai khan private hospital te pawh meeting ka neih pui a. Tunah hi chuan ADB loan tel lo, keimahni sum ngeiin nuai 5 chin chu cashless ti thei dinhmunah kan dingin kan inhria a; kan *confi* khawp mai. Chu chu, tun Session chhung ngeia tih a, financial year thar a tanga tih nghal theih kan in beisei a. ADB loan erawh chu a kal kalin a kal ang a, lak theih hun chuan kan la duh mai thei. Amaherawhchu, loan tel lovin tunah hi chuan kan kal thei dawnin kan hria a ni.

Kan private hospital te chuan pawisa kan bat sak ang tih kha an hlauhthawn ber a ni a. Presentation te kan han neihpui a, khalamah kha chuan hlauhthawn tur a awm lo tih kha min chianpui thawkhat viau tawhin kan hria a. Tichuan, kan la inbe leh ang a, kan final-pui thei tawh turah kan ngai.

Tichuan, thupha han chawi duh ka neih erawh chu, tunhma khan healthcare inziah luh hun hawn hun bik hi an nei thina kha, ‘keini chuan kumtluanin kan hawng ang’ kan ti ve pap pap kha a ni a. Mahse, kumtluana hawn chi kha a lo ni hauh lova; kan hriat loh vangin kan lo au sual a, thupha kan chawi ni se. Thlathum chhung kan hawng ang a, thla khat kan chawl ang a, a thla lehah kan hawng leh ang; chutah chuan late fee a awm ang a, chu bak chu kan hawng dawn tawh lo. A chhan chu, mi, kum tawpah an dam lova, an rawn in-register chawp ringawt mai a, sorkar a hek lutuk a ni. Hetiang ringawt hi chuan healthcare hi a kalpui theih loh a ni.

Aw le, Pu Speaker, he sorkar tum ber chu ‘*moral reform*’ a ni. Kan thinlung lo kal dik tawh lo siamthat leh siam ngil hi a ni a, ‘*kawng dik emaw kan tih, dik lo si hi rinna mitin min hmuhfiah tir ang che*’ tih hla ang deuh khan, kan hmu chho zel a. Kan ramah hian a

dik lo si, dik anga kalpui hi a lo tam hle a, chumi siamdik chu kan tum a ni a. Sorkarin *Dan leh Hrai* system te a han change-a, chumi paha a tum chu, kan chhungril siamthat hi a ni. ‘Aikal engatinge kan tih tawp’ kan tih chuan, chhungril siamthatna a ni. ‘Bio-metric attendance te kan tih chhan chu, *punctuality* – ‘a hun takah a hmun kan thleng tur a ni’ tih kha a ni a. Kan sorkar hnathawkte hi mipuiina thlatina an hlawhtur kan chhiah atanga kan tum sakte anni a, ‘a hun takah an hnathawhna hmun an thleng tur a ni’ kan ti mai. Chungte pawh chu kan insawisel sak duh zel a, thil tha kan tih ve ang chhun chhun te lama min sawisel sak hi a tha lo viauin ka hria.

Tin, *service review committee* din vek tur kan ti a, sorkar hnathawk thawk thei tawh lo kha chu lungawi tak leh hmemhnang taka a chawlh theihna tur *Special Voluntary Pension Scheme* kan siamsak a. Chawl mai rawh se, a aiah midang tha tak tak lak tur an tam a. Sorkar hnathawk quality a chhiat chuan, kan ram hian a tuar a ni. Heng te pawh hi thil thar a ni. *Right to Public Service Act* hnuuia service te pawh tunah hian kan tipung a, hlawhtling takin kan kalpui a. Hei keimah hianin department zawng zawngte review meeting ka neihpui thin a, zing atanga zan thlengin. Kan thim deuh ziah a, kan chau ngai lo. Kan hlim em em a, kan phur a, “hetiang kan la hre ngai lo” an ti a ni. Chuvang chuan, kan sorkar hnathawkte an phur a, tikhan department ka tlawhchhuah hunah a bul atangin ka tan leh thin ang a; tiang chuan theihtawpin kan tang mek a ni.

Tin, projects hi kan *centralized* ta a, a chhan chu - department te tein project a hrang te tea an kalpuia, inhre pawp tawn lova kan kal khan, ‘hetah kan mamawh’ pakhatin a lo tiha kha hre hauh lovin mi dangin a ngai tho an lo tih ve leh khan, sum kan seng thlawn a. Khatiang avanga project kan abandoned tam tak a lo awm phah a. “Heng hi a tha lo e; ram pumpui mit atanga kan thlir theihna turin i centralize ang” kan ti a. Planning chuan a lo thlifim a, a department-ah a pe leh mai a ni. Tin, agreement diklo a lo tam em em mai a, tunah hian contractor ban ngai eng emaw zat kan nei a, ban kan han tum a. Mahse, ‘Court-ah min khin chuan kan hneh lovang’ tih hi a lo ni deuh vek mai a ni. Khatiang agreement, rilru diklo hmanga duan, contractor duhsak nei sa rana duan, a hlawkna eitawmpui duhna avanga duan kha he sorkar-ah hian a awm kan phal tawh lo. Tin, project SoP mumal tak neilo reng reng chu pakhatmah kan approve dawn tawh lo. Chowkidar pakhat pawh dah thei leh miah lo tur, a recurring nature expenditure pawh cheng khat mah neih miah lo tur enkawl thei si loh te kha a lo tam lutuk; kha kha kan awih dawn tawh lo a ni.

Tin, thil thar, *Integrity Pact* te pawh kan ti a, kan Governor-in a sawi khan lova, hei hi. Contractor/Supplier zawng zawngin an hman tur a ni a; hei hi kan hmang tawh dawn; pafa contract lian pui pui inpek hi a awm dawn tawh lo. “Mipui Aw”, te kan ti a, mipuiin sorkar an biakpawh theihna tur, complain an thehluhna tura tan duan a ni. Tunah hian industry lama tih tak tak kan tum avangin, *Sustainable Investment Policy* la awm ngai lo te kan siamthar a, ram kan zawng mek a. Chutah chuan SIP kan din dawn a, Land Bank kan la neih ngai miah loh pawh tunah hian kan lo nei ve ta a, buhhum te pawh kan lo lei ve thei ta zel a ni. A lawmawm kan ti a, dashboard chi 2 kan siam a, pakhat chu - a mamawhte tana an information leh resource dahkhawmna tur a ni a, pakhat chu - CM room atang pawha department hnathawh leh project zawng zawng te supervise theihna tur a ni. Central-ah chuan PMO atanga supervise vek a ni a, chutiang chuan CMO atang hian kan department leh project pawimawh zawng zawngte keimah ngeiin kan supervise theihna tur dashboard tunah hian kan inchoawp tawh a ni. Chutiang chuan, - Eng vangin nge a delay;

contractor thiamloh em ni; engatinge an muan; puih an ngai em ni, tih te kan hre zung zung ang a, an harsatna te kan enpui theih nan kan ti a ni.

Tin, Monitoring Committee kan din hi a tha em em a. Chutah chuan, vawiina lo kal te hian aiawh kan nei vek; kohhran, NGO te nen pawh kan thawk ho a ni. Kan ramah project a chhiat tawh loh nana kan tih a ni. Project 40 vel endik a ni tawh a, amaherawh, sawi hreawm tak chu, hun hmasa lam atanga a bul tan lo diklo laklawh tawh, a ler atanga thuai that theih loh a tam hle a, a contractor-te pawh hun hmasaa mite vek anni.

Nizanah khan Biate kawng chhiatzia a video rawn viral kha kan han chhui chiang a, contractor tunhma ami bawh kha a lo ni a; tunah hian kan tihthat tir leh mek a ni. Chuvang chuan, sorkar thar atang hi chuan contractor khatiang kha kan duh tawh lo a ni. Heng hi tha lo thei lo turin Monitoring Committee atang hian kan nawr tlang dawn a. He committee-ah hianin kan vaiin kan tel a, ruling chauh kan ni lo. Chuvang chuan, vawiinah hian kan bial theuha project awm te i monitor tlang ang u; MLA ten a mawh lain, i tang tlang ang u; a thalo chungah chuan action kan la tur a ni, tiin kan insawm nghal duh a.

Tin, kan tihtheihloh tura kan ngaih Assam Rifles te an chhuak dawn ta hi kan lawm em em a. Pathianin min awmpui niin kan hria a, kan sawi rik ngam loh a ni. Tin, compensate two-entity-ah kan pe thei lo tih avangin Vairengte chho zawng zawng kutthlak thei lovin a awm a. Mahse, hman deuh khan meeting lian takah MoRTH Minister te nen kan meeting tlang a, an pahnih – “land-owner leh NHIDCL te hi in pek ve ve mai loh chuan cheh khat mah in chek thei dawn chuang lo, nangni hian. Dan kalh ni mah se, min tihsak rawh” tiin ka ngen a, meeting ah la la min tihsak tur thu a puang a. A record ah erawh chuan an fimkhur em em a, ‘under process’ tiin a record tir ngat nghe nghe a. Tunah hian compensation sum chu an sem mek tawh nghe nghe a; crore sang chuang a ni, land owner-te ipte a lut tur kha. Hetah NHIDCL ho kha crore 100 chuang an pe leh dawn bawh a, an inseng nasa dawn khawp mai. Kan beisei phak loh a ni a, heng te hi. Amaherawhchu, thil pakhat – Forest lamin clearance an pek theih tlat loh avangin Ministry of Road and Transport khan a pawisa kha an tum ta ringawt a ni. Tuna compensate la ho hian 15% theuh sorkar-ah an chhunglut a. Term hmasaah pawh khan chhungluh a ni a, a sawiseltu berah ka tang a, “pe let leh vek rawh u; mi compensate engatinge in lo eipui ve”, ka ti a. Court-ah khan a lut ta a, pe let leh vek tura tih kha a ni ta a, sorkar hmasa khan an pe let leh vek a ni. Mipuiina an inhmun man compensate an dawn sorkarina an lo eipui ve ringawt kha a dik khan kan hre lo a ni. Mahse, kha tih laia sorkar khan 15% kha a it viau a ni ang; kan Revenue Act, 2013 kha an lo amend a, ‘compensate late chuan 15% sorkar-ah an thehlut tur a ni’, tih *Dan* kha an lo siam leh hman der tawh mai a, chu *Dan* hnuaiyah chuan tunah hian kan awm a ni. Chuvang chuan, sorkar hmasa *Dan* hmangin 15% chu kan laksak ve a ni. Chuvang chuan, inchhuahchhalna a awm maithei a. ‘Dan an lo siam miao si a; tihngaihna a awm lova, kan la ve mai’ tih kha ka’n sawi a ni.

Aw le, Pu Speaker, ka titawp mai ang a. Governor Speech-a *Motion of Thanks* kan MLA zahawm takin inpuahchahna tha deuh maia a sawi kha ka thlawp e.

PU C. NGUNLIANCHUNGA: Pu Speaker, LADC chungchanga kan House Leader-in, “Tumah kan be lo; kan tiam lo”, a tih kha, CM nen an indawr a, a case chungchangah pawh theih tawpa tan lakpui te, District Council-a officer post 20 lak that te, provincialized school helaia kan sawi kan sawi thin, ‘*dual-function*-a awm’ kan tih te kha, ‘CEM lakluh

niah ka rawn kal ang a, ka puang ang,' a tih te kha, khawlaiah a va ri nasa ve! Thu awm loin puan a awm dawn em ni?, hei hi khawngaihin min hrilhfiah teh se.

SPEAKER : Ngawi teh! Pu Ngun, i zahawm viau na'ngin, khatiang speculation deuh hlek, material evidence awm si lo kha chu tun hnuah chuan sawi remlo angah ngai ta ila; anmahni inkar indawrna te pawh a ni mahna le.

PU C. NGUNLIANCHUNGA: Pu Speaker, "Tumah engmah kan tiam lo e" a tih si chuan, khawlaia titi tam taka kha, awm lo se chuan a ri mai dawn em ni? Khawngaihin he House-ah hian sawifiah mai se la. "Ka tiam lo e", a tih chuan, patling, kohhran-upa; thudik hi he House-ah hian sawiho ila a tha ang a.

PU TBC LALVENCHHUNGA: Pu Speaker, khawngaihin - House Leader puhna ang zawnga khatiangha han sawi chhuaha kha chu, evidence a awm si lova. A ngai anga kal theih ni se.

PU C. NGUNLIANCHUNGA: Ka puh a ni lova; an sawi ri hi 'a dik reng em?' ka ti a ni. Kei hian, 'I tiam em?', ka ti a ni lova, 'sawi rik a va tam em em ve' ka tihna zawk a ni. Chief Minister ka atanga sawi a ni em; thudik a ni reng em? tiin ka zawt a ni.

SPEAKER : Aw le, a lawmawm e. Ni e, ti-ti chu eng pawh a awm thei a. Amaherawhchu, material evidence kha a awm thei a nih si loh chuan, kan House Leader pawh insawifiah tura tih kha a tul lem pawhin ka hre lova. Amaherawhchu, amahin a duh a nih chuan, nakinah sawina hun a la tam ang a. Mahse, sawi han phut kher kha a tulin ka hre lo a ni.

Tin, kan *Rules of Procedure & Conduct of Business* No. 310 (sub rule 2) ah khan en ula, ka han chhiar nghe nghe teh ang - "*A Member, while speaking shall not make a personal charge against a Member*", a ti a ni. Chuvangin, personal taka in tih hi, ram-rorelna hmun a ni a. Mimal lutuk ang chi kha chu pumpelth hram hram ila, tih khan i duh tawk ang u.

Aw le, tunah chuan a *Motion* neitu, Member zahawm tak Pu T. Lalhlimpua sawm ila, sawitur tul a tihte sawi sela, adopt lo dil nghal se.

PU T. LALHLIMPUA: Pu Speaker, ka lawm e. Hun tawt leh chep tak karah hmanhmawh takin *Motion of Thanks* kha ka rawn pulut a ni a, Member zahawm tak tak ten thutakah min han neihpui a, ka lawm em em a. Kan rilru kan seng zung zung a, kan insiam fel zung zung niin ka hria. Tin, House Member-te kan puitlingin kan smart hlawm hle tih pawh kan thusawi atangin a hmuh theih a.

Hetih rual hian hmasawna kan neih beisei chungin duham ve deuha han tarlan ka duh chu - Sorkar hmasa thil bawhzui hlawhtlingte pawh kan tarlang thiam hle a. He House zahawmna tura kan practice thinte pawh a tha lai chu kan hauh tlat thu leh, *Motion of Thanks*-ah pawh chungte pawh chu kan han dah leng leh ta zel a. Tin, *best practice* a ni em, tih ngaihtuah pawha kan hmuh thiam loh tur subject thenkhat te tunah pawh khan kan tarlang mek bawk a. Governor thusawi chungchangah lawmthu sawina karah mimal taka thu han zeh zeuh boruak te pawh a awm a. A ti hot tu leh tih light-na lam thu te a that viau laiin, mimal thil taka a leng thin erawh hi chu hun lo awmzel tura sulhnu kan hnutchhiah

tur kan ngaihtuah erawh hi chuan, kan inngaihtuah ve deuh hi a tulin ka hria a ni. House chhunga kan practice hian social media-in mizote min nghawng nat zia a tilangin ka hria a. Kan ram sukthlek a nghawng a, mimal insawi bawih-bawih te thil thianga tunah hian kan chhuah mek niin a lang a ni. Chuvang chuan, *zonun-ze-mawi* kan chhuan em em ti dal tur hi chuan, he hmun atang hi chuan bul tan tum loh hi avan tha em, tih hi House Member zahawm takte ka ngenna ni se.

Tichuan Pu Speaker, ka hriatsual loh chuan, Constitution (Article 74 leh 163) ah a tarlan danin, Governor Speech hrim hrim hi format mumal tak, chutiingin tight taka ziak tur tih a awm hranin a lang lova, sorkar hmalakna kal mek leh hmathlir buatsaihte tarlan emaw sawi chhuah mai tur kha niin a lang a, sorkar hmasa tih dan tha kan tihte pawh tarlan a thianga vek awm e. Chutihruah chuan, sorkar hmasa lama Governor Speech-ah (nichina kan House Leader-in a sawi tawh ang) khan Printing & Stationery Department-in pawisa a thawhchhuah tam lo tak tarlan angin kumin hian tarchhuah a ni a. A hunlaia *tha* ti deuhthe pawh khan, i vei lama an thut hnu chuan *tha* an ti leh ta lem lo ni te pawhin a lang thei a. Eng pawh ni se, Governor Speech ah hian a leng chin tura kan duh kan lentir a, kan duh loh kan lentir lo mai niin a lang mai thei em, tih te pawh rilruin a ngaihtuah a. Eng pawh ni se, kan rilru azir hian heng thil hi a lengin, a leng lo mai ni te pawhin a lang a ni.

Aw le, Governor Speech chungchanga lawmthu ka sawina hi (ka hriatsual loh chuan) House member mi 15-in min sawipuiin, min thlawp a. Sorkar lai mek hmasawna tur leh thuanawpna, duh khawp lohna te pawh positive takin House member te'n smart taka kan sawi chhuak te hi lawmawm hlein ka hria.

Vawiinah hian he Zoram, ram te tak te kan neihchhun hi hma a sawn leh hmasawn loh kawnga mawhphurtu hi tute nge ni ang; tute nge mawhphur lian ber tih hi ngaihtuah ta ila, keni mi 40-te hi kan ni, tih hre thar leh ta ila. Warren Bennis-a chuan "*Leadership is a capacity to translate vision into reality*" a tih angin, kan ngaihtuahna, kan hmathlir te a taka chantir hi he House member mawh a ni, tih hre chungin, vawiinah hian Pu Speaker, Governor thusawi chungchanga lawmthu ka sawina *Motion* hi he House zahawm takah hian min adopt sak turin ka ngen a che. Ka lawm e.

(Speech not corrected.)

SPEAKER : A lawmawm e. Member 16-in kan sawi a, a move-tu nen chuan member 17-in kan sawi a ni. Aw le, Governor thusawi chungchanga lawmthu sawina motion, "*That the Member's of the Mizoram Legislative Assembly assemble in this Session are deeply grateful to the Governor for the address which he had been pleased to deliver to the Assembly on 19th February, 2025*" tih chu kan sawiho ta a. Adopt remti apiangin 'remti' ti rawh ule. (**Memberte:** Remti)

Remti lo kan awm em? Kan awm chuan, 'remti lo' ti ula. Kan awm loh chuan, kan motion sawiho chu lungrual takin he House hian a adopt ta a ni.

PRIVATE MEMBER'S BUSINESS:

Aw le, tunah chuan, kan nghahlelh em em *Private Member's Business*-ah kan kal ang a. Hei, dar 4 a hnai ta riau mai a. Tunah chuan kan dan 27-na (within bracket 1-na) angin, *Private Member's Business* kan tih ni a ni a. Vawiin, February ni 21, 2025-ami tur January ni 23, 2025 (chawhnu dar 1:30) khan Under Secretary office, helai Assembly Secretariat-

ah ballot a ni a, a indawt dan chu Bulletin Part-II (Number 68 of 14th February, 2025) ah kan inhriattir tawh kha.

Aw le, Resolution kan la ang a, “*Mizoram Sorkar-in Lengpui Airport Indian Airforce kuta hlan/hralh tuma hma a lak mek hi tha kan ti lova, ti tawp rawh se*” tih a ni a. Resolution neitu Member zahawm tak Pu K. Laldawngliana move turin ilo sawm ang u.

PU K. LALDAWNGLIANA: Pu Speaker, ka lawm e. Vawiin-ah ka Private Resolution sawihona nei tura hun tha tak ka nei hi Pathian hnenah leh zoram mipuite hnenah lawmthu ka sawi e.

Mizoramin hmasawna ruhrel kan neih langsar berte zinga mi, damlote hmunpui pan ngai, zirlai leh sumdawngte khualzinte’n kan tangkaipui em em; khawvel dang nen boruak hmanga inkalpawhna kan neihchhun Lengpui Airport chu Mizoram sorkarin Indian Airforce kuta hlan tumin thui tak hma a lo la reng mai tih, tunhnai-ah zoram mipuite’n kan lo hre ve ta a. Hei hian inhniaalna pawh a titamin, tunlai zoram-khawvel ti-ti luahtu ber a ni mek a ni. Dodalna nasa tak karah pawh sorkarin a thil tum hi nawr tlang luih a tum nia a lan avangin, vawiin-ah hian Pu Speaker, zoram mipuite aiawhin he ka resolution “*Mizoram Sorkar-in Lengpui Airport Indian Airforce kuta hlan/hralh tuma hma a lak mek hi tha kan ti lova, ti tawp rawh se*” tih hi, House zahawm takah hian ka rawn pu lut a ni.

Pu Speaker, Lengpui Airport hi kan ram hruaitu hmasate khan hmathlir thui tak neia an lo din, harsatna karah pawh an lo enkawl hram hram leh a theih ang anga an lo tihchangtlun chhoh a ni a. CM lo ni tawh pathumin kut an lo thlak - Brig. Thenphunga Sailo khan a ngaipawimawh hle a, Pu Laldenga khan nasa takin central sorkar kara, hlawkna um lova Mizoram State din tira a mamawhna leh, zoram mipuite tana hmasawna a thlen turte ngaihtuah zawk turin central sorkar hotute a nawr a, a hnu Pu Lal Thanhawla hunah Lengpui Airport hi a lo puitling ta a ni. Ni 12, December, 1998-ah LK Advani (khatih hunlaia Deputy Prime Minister) in a hawng a, kum 26 laia upa a lo ni ve ta reng mai a ni. Vawiinah damlo, zirlai, sorkar-hnathawk, sumdawng leh khualzin ten kan tangkaipui takzia te han en hian, kan hruaitu hmasaten hmathlir thui tak neia hma an lo lakna zawng zawngte kha a ropuiin an fakawm hle a ni.

Khatieng taka kan ram hruaitu hmasaten harsatna tin reng paltlanga an lo din Lengpui Airport hi, a enkawl hautak chang awm mahse, Zoram mipuite tana a tangkai em avang leh, a bikin damlo hmunpui zawk pan mamawhte tan a tangkai em avang hian sorkar lo awm tawhte pawhin harsa tak chungin an lo tichangtlung hram hram a. Hmarchhak bial bik Airport ho ah chuan a tir bultan atanga sum senna tlemna ber crore 213 a nichungin, runway pawh ft 8200 leh ft 145 niin, sei ber dawttu a ni a. Chutieng chung chuan khualzin lut leh chhuak zat pun chhoh danah Lengpui Airport hi Hmarchhak bialah pakhatna a ni pha a. Tunah chuan kum khat chungin passenger lut leh chhuak nuai 4 chuang daih kan awm tawh a ni.

Hmarchhak bial Airport zingah pawh passenger lut leh chhuak tam lamah pangana lai kan ni tawh a. Guwahati, Imphal, Agartala leh Dibrugarh te lakah Lengpui Airport hi a awm phak tawh a, heta tang hian Zoram mipuiten kan chhawr tangkai zia chu a lang chiang hle a ni.

Pu Speaker, hetiang taka mipuiten kan chhawr tangkai a nih avang hian, tihchangtlun zel hi kan vaiin kan duh vek tih a chiang a. Hetih lai hian tuna kan sorkarin mipuite hriat loha Indian Airforce kuta hralh then tur leh hlan tura ruahmanna a lo siamfel deuh vek mai hian min barakhaih tlang a. He hmalakna hi tun din hmunah sorkarin sum leh paiah a hlawkpui hle dawn a ni thei a, chutih laiin hun lo kal zel turah Zoram mipuite tana thil tha zawk tur lam aiin harsatna min thlen tu tur a ni tih a chiang em avangin, he House zahawm tak pawh hian a dodal a ngai tak zet zet a ni.

Pu Speaker, tuna kan sorkar dinglai lakluh hlim (Ni 14 December, 2023) ah khan Council of Minister thukhawm chuan Lengpui Airport chu AAI hnena hlan tura hma lain, a rel nghal a. A hnu lawkah kan House Leader, Chief Minister zahawm tak Pu Lalduhoma'n kum 2024 kum tira Delhi leh Kolkata a tlawh tuma Aizawl a lo let leh (Ni 6 January, 2024) ah chanchinbu mite kawmin, "AAI emaw, Adani Group kutah emaw kan pe dawn a, Civil Aviation Ministry in min buaipui dawn a; tun hnenah nge pe ila tha zawk ang tih kan zirchiang dawn a. Adani Group phei chuan DO Letter an rawn ziak tawh a, a rang thei ang berin hlan kan duh" tih a sawi leh a nih kha. A hnu lawk (Ni 10 January, 2024) khan Lengpui Airport hi AAI emaw, private company emaw hnena hlan tura hmalatu tur working committee chu House Member zahawm tak Pu TBC Lalvenchhunga kaihhraina hnuaiha din a ni ta a.

Mak deuh mai chu, Pu Speaker, working committee hian a tira sawi rik ni miah lo, Indian Airforce kutah hian hlan an lo rawt ta daih mai hi a ni. A tir atang phatin Lengpui Airport hralh then tur leh IAF kuta hlan tur sorkar hmalak dan hi a langtlang lo tlat mai a. Ni 6 October, 2024 a Council of Ministers thukhawm thutlukna kha engmah puanzar a ni lova, Council of Ministers thurel a enga mah puanzar loh vawikhatna a ni hial ang em aw, ka ti a. A hnua kan hriat leh tak danah chuan, khami tum khan tuialhthei chhiah tihsan te, cess lak leh airport chungchangte hi rel a lo ni a, working committee in IAF kuta hlan a rawtna chu a thuphunga pawmpui a lo ni der tawh a ni. Heti hian mipuite hnenah engmah puanzar mumal awm lovin Mizoram sorkar chuan ni 20 November, 2024 ah working committee chu tinung lehin, IAF kuta hlan dan tur Memorandum of Agreement draft duang turin a ti a. Tunah hian draft agreement chu a lo sign fel vek tawh tih, tun hnaiah tv talk-show atangin mipuiten kan hre ve ta chauh a ni.

Chuvang chuan, Pu Speaker, Lengpui Airport hralh then leh IAF kuta hlan tura hetih taka langtlang lo leh, a ruk a ral ang zia-zanga kan sorkar hmalakna lo kal thui hman lutuk hi *engnge a chhan ber ni ang* tih zawhna hi, a chhanna dik tak hriat a chawkawm hle mai. Sorkarin langtlang lo em emin hma la mahse, hriat ve chin a lo awm lo thei lova, mipuiten kan aiawha kan pawm thin leh vawiin thleng pawh a kan aiawha kan la pawm MUP te, MHIP te, MZP te leh MSU te tel vekna Central YMA kaihhruai NGOs Co-ordination Committee Ni 9 August, 2024 a thukhawm chuan "*Mizoram kan thil neih hlu em em leh neih chhun Lengpui Airport hi IAF kutah hlan kan remti lo*" tih an lo pass daih tawh a. Sorkar hmalakna a thawi thama lo hre ve tu eptu-party te pawhin kan duh loh thu press-conference kovin kan puanzar ve nghal mawlh mawlh a nih kha. Hetiang hian hma takah dodalna awm mahse, sorkarin a lo bawhzui lui ta zel a. NGOs co-ordination committee pawh tunhna maiah thukhawm lehin, Lengpui Airport hi IAF kutah hlan a remtih loh thu an sawi nawn leh a, an thutlukna pawh Chief Minister hnenah an thlen nawn leh bawk a ni.

Hetiang boruak karah hian political party a inhnamhnawihna nei reng reng lo, Zoram tana mi-thahnemngai pawl te lo penchhuakin ‘Airport Forum’ tih an indin a. IAF kuta Lengpui Airport hlan a pawl dan tur tlangau puin sorkar chu a hmalak mekna chawhhsan turin an au lawm lawm mek a nih hi. Pu Speaker, hetiang dodalna nasa tak karah hian IAF kuta hlan tura inremna duan lawk draft agreement hi la hmu ve lo mah ila, a zirchiangtu - Working Committee hotu ber chuan ‘Airport hi hralh kan tum lova, hlan kan tum hek lo. IAF kaltlangin changtlung zawka siam theih dan kan dap mek a ni’ tih a sawi thu kan lo hria a. Hetih lai hian kan Chief Minister zahawm tak Pu Lalduhoma erawh chuan tv lamah interview-ah thudik zawk a rawn sawichhuak ve leh ta a, “A ram khu kan insem then dawn a ni. A runway lehlam, terminal building lo lam zawng, (a ramhnuai lam zawng) annin an chang ang a, chu chu a man kan chhutchhuak ang a, an lei ang, a leiin; chu ringawt pawh chu kan thlahlel ve a ni, a man kha” a ti a ni.

Chief Minister sawi dan atang hian tuna sorkarin hralh then a tum dan chu a chiang hle a. Chumai ni lovin, “IAF te hian ram mamawh belh an neih pawhin kan sorkarin a buaipui ang a, a man chu IAF in an pe zel dawn” tihna a ni. Tun ami bakah an ram mamawh belh te pawh lei belh zel phalna pek kan tum a lo ni reng mai a. An duh zat zat ram an lei belh anga, Lengpui Airport than zelna tur chu hmehpin hmiah a ni kumkhua tawh dawn a ni. Pu Speaker, hei hi a him lo tak zet a, ram leh hnam pawikhawihna lian tak thleng tur hi he House zahawm tak hian a dodal a ngai takzet zet a ni.

Pu Speaker, Lengpui Airport hi airport thangduang tak a nih avangin, a sum thawhchhuah hi a pung ve zel a. Runway leh ruhrel pawimawh dangte tihchangtlun ngai lo phei se chuan amah leh amah intum thei dawn a; hlawkna pawh thawk chhuak thei leh thawk chhuak mek a ni tawh a. Hetih lai hian, runway leh ruhrel pawimawhte tihchangtlunna tur sum a hautak tih erawh chu kan pawm tlang vek a ni. Hei vang tak hian sorkar lo awm tawh te pawhin midang enkawl tir dan tur te an lo dap tawh thin a. Congress sorkar hun lai pawh khan AIF te hian Mizoram sorkar an lo dawr tawh a, zoram mipuite tana a him loh theih dan ngaihtuah chungin an lo hnawh leh a nih kha.

AAI kuta hlan pawh thaa hriatna a awm a. Mizoram sorkar leh AAI pawhin a pawm theih, amaherawhchu, inrem tawna a la awm thei rih lo mai a ni. Inbiakna kal lai a ni a, AAI lamin 2022 June thla-a MoU draft an rawn thawnah khan Mizoram tana pawm chi hauh loh thil phut thenkhat an rawn nei a, “Airport hmun leh a hmaa awmsa zawng zawng a thlawn vekin neitu nihna AAI kuta kumkhua atan hlan nghal vek a ni ang a, a hnu zelah pawh rambuai a awm a nih chuan, compensation pek ngai zawng zawngte, court senso zawng zawngte Mizoram sorkarin a tum vek ang a; central sorkar emaw, AAI atangin emaw a dil let thei lo ang” tih te, a hnu zelah “Airport tihhmasawna tur emaw tihlenna tur emaw atana ram mamawh belh a awm chuan, Mizoram sorkarin a thlawnin a pe ang a; Lengpui Airport venhimna chungchangah mamawh leh mihring mamawh te Mizoram sorkarin a tum ang” tih ang chi te a tel avangin, a ngai ang ang chuan Mizoram mipuite tan pawm chi a ni lova, inremna a la awm thei rih lo. Inbiakna kal lai mek a nih kha.

Pu Speaker, tuna hmanhmawh tak maia Indian Airport kuta hlan, dodalna karah pawh tihtlang luih tuma a ruka ral deuha hma an la ngar ngar mai hi, ‘a phenah thil inthup a awm a ni lo maw’, tih hi zawhna pawimawh tak a ni. Mipuite pawhin kan pawm tlang thei tur zawk nia lang AAI kuta hlan tura inbiakna kal lai kha tih tak takna nena bawhzuina awm kan hre bawh si lova.

AAI hi Civil Aviation hnuai a awm a ni a, hetiang a nih lai hian Chief Minister hian Prime Minister a sawipui tawh emaw, lehkha hmanga a dawr thu emaw, Civil Aviation Minister a nawr thu emaw sawi awm si lova. Kan hriat angin Civil Aviation Secretary September, 2023 atanga awm mizopa Pu V. Vualnama, IAS a awm tawh bawk a, ani tal pawh hi a biak pawh emaw, inrem tawwna anga AAI kuta hlan tumna emaw pawh a awm bawk lova. Political level-a indawrna awm miah si lova Indian Airforce tinzawn ngar ngar, dodalna karah pawh kan sorkarin hma a la lui ngar ngar mai hi a vanduaithlak tak zetin ka hria a. He House zahawm tak hian nasa taka dodal a ngai hle a ni.

Pu Speaker, keiniin kan ngaih pawimawh ber tur zawk chu - Lengpui Airport kaltlanga damlo, zirlai, sumdawng leh sorkar mipawimawhte bakah khualzinte zalen tak leh buaina awm lova a hun taka an zin veivah theihna tura Lengpui airport tihchangtlun zel a nih laiin, IAF te hian an ngaih pawimawh ber chu venhimna security a ni thung dawn a, kan ngaih pawimawh a inperhsan phawt mai a ni. Civil thlawhna chet vel dan enkawltu Directorate General of Civil Aviation (DGCA) -in thlawhna phalna Flight Information Clearance (FIC) a pek tawhah pawh Air force lamin Air Defence Clearance (ADC) an pek ve zel a ngai thin a. A tawi zawng chuan, DGCA lamin thlawhna phalna approval pe eng ang mahsela, Indian Airforce lamin security chhuanlam hmanga air defence clearance a pek loh chuan eng thlawhna mah a thlawk theilo tawp mai a ni.

Hetiang hi thil awmdan a nih avangin Lengpui Airport hi IAF hnenah hralh a nih chuan, a tuartu tur chu zoram mipuite kan ni dawn tih a chiang em em a ni. Tun dinhmunah Mizoram hian military target kan nei rih lo niin a lang a. IAF kuta a awm chuan, military target a nei hma ber a ni dawn tih a langchiang bawk ang. IAF te hian Lengpui Airport hi min tihchangtlun sak an chak em avanga rawn duh an ni lo tih a chiang a ni.

Pu Speaker, Lengpui Airport hi sorkar lo awmte pawhin 1998 - 2023, kum 25 lai sum harsa chung chungin mipuite tan an lo enkawl hram hram a. India ram Prime Minister Pu Modia'n RCS-Udan hnuai a India ram state zawng zawng inelnaah Lengpui Airport chu - *The most proactive state under RCS Udan Scheme* trophy hi ni 25 March, 2022 khan Mizoram aiawhte hnenah alo hlan tawh a nih kha. Sum leh pai hlawkna ngawr ngawr aiin damlo, zirlai, sumdawng leh khualzin te tana motor kawngpui pin chang pawha an luh chhuahna hmun awm chhun, khawvel dang nena kan inpawh theihna awm chhun a nihna hriain an lo enkawl a ni. Kan sorkar pawh hian IAF kuta hlan a him loh dan te mithiam zawkte thlir chung leh zoram mipuite hmasawwna ruhrel pawimawh kan neih zinga lian bera chhal ngam *Lengpui Airport* hi tangkai taka kan chhawr chhunzawm zel theihna turin, Pu Speaker, ka resolution – "*Mizoram Sorkarin Lengpui Airport Indian Airforce kuta hlan, hralh tuma hma alak mek hi tha ka ti lova, titawp rawh se*", tih hi he House zahawm tak hian min pawmpui turin ka ngen a ni e. Pu Speaker, ka lawm e.

SPEAKER : Aw le, Resolution neituin a rawn move ta a, kan sawiho ang a. Minute engzat nge kan inpek ang? Minute nga nge minute sawm? (**Memberte:** Minute 10.) Aw le, Member pakhat minute sawm zel kan inpe ang a, minute 9-ah bell ka rawn hmet ang a, minute khat kan la nei tih hria ila. Kan hnunga miten an sawi duh ve zel a ni tih kha hriain, hun vawn dik hram hram tum ta ila a tha ang e.

Member zahawm tak Lt. Col. Clement Lalhmingthanga i sawm hmasa ang.

LT. COL. CLEMENT LALHMINGTHANGA: Pu Speaker, Member zahawm takin Private Member Resolution - “*Mizoram Sorkarin Lengpui Airport Indian Airforce kuta hralh/hlan tuma hma a lak mek hi tha ka ti lova, titawp rawh se*” tih, Member zahawm tak Pu K. Laldawngliana’n Private Resolution a rawn putluh hi, a heading hrim hrim pawh hi a dik tawh lova. Kan sorkar hianin khu kan Airport neih chhun tun aia changtlung zawka chhawr a nih theih nan lo zirchiang turin Working Committee a din a. Chu chuanin hralh tum leh tum loh lam ai mahin, zirchianna a ni a, midang kuta hlan tura thu pass a la awm lo reng reng a. Hei, ka bulah hian working committee chairman ngei a awm a. Kha kha eng chen nge an kalpui tih a la rawn sawi duhin ka ring a.

Airport Authority of India nena Joint Users Airfield (Airport nilovin, *Airfield*) neih chungchang a ni a, hetah hian *Airfield* chiah sawi a ni a. Tin, ‘Airport’ tih hian hlawm hnih – City-site tih leh Air-site tein then theih a. ‘City-site’ tih hian *terminal building* te, *Apron refueling* tihna te, *loading leh unloading* tihna hmun te, *aircraft maintenance* tihna hmun te leh *ancillary* hrang hrang te a kawh a ni. Khu lampang khu tuna kan sawi ah hian a tel lova. He laia Study Team - Working Committee in a an lo ruahmannaa agreement siam a nih leh nih loh te, tunah agreement siam a awm pawh hriat a ni lo hrim hrim a. Chutih laiin agreement lo sign tawh anga sawi te kha, kha thil la awm lo a nih hmel a. Tin, khalai kha chu nakinah Working Committee Chairman-te pawhin an hmalakna kha chu an la sawi lang duh ang a. Chuvangin, khalam kha chu rawn sawi vak ka tum lova.

Indian Airforce te Joint Users Airfield neihpui kha a him leh him loh zir chianna leh, Airport Authority of India nen a joint-authority/joint-operation neih a him em, tih zirchianna a ni a, chu pawh chuan hlan leh hralh a la kawh chuang lo a ni. A feasibility leh ‘a eng ber nge kan sorkar leh state tan tha ber ang’ tih zirchiang turin study team siam a ni. Chu chuan, ‘Indian Air Force hi Joint Users Airfield neih pui ta ila a tha ang e?’ tih zir chian mek a ni a. Hetiang joint-user Airfield hi Northeast ah - Bagdogra leh Silchar ah te neih a ni a, India ram hmun dangah te pawh a awm a. Chutiang Airfield, Indian Air Force nena inhmantawm hi sawi tur a tam mai a ni. Airfield intawm vangin Indian Air Force khan authority engkim an chuh dawn anga sawi hi a nih dan a ni reng reng lo a ni.

Anni chuan airfield chin chiah joint-users nih kha an interest a ni a, tuna kan neih mek Lengpui Airport-a kan airfield-a khu, Pavement Classification Number (PCN) ah tunah hian 36 chauh a ni leh nghal a. Chuvangin, khu khu thlawhna full-load tum theihna tur atan leh passenger leh cargo tum theihna atana quality a mamawh chu 48 - 55 tal a ni tur a ni. Tichuan, tuna kan airfield neih meka khu cargo te rawn tum thei turin leh mipui tena a aia tangkai leh man tlawm zawka thlawhna chuan theihna tur te bakah, bungraw phur cargo a lo tum theihna tura upgrade a ngai a. Chuvangin, kan Airport ti changtlung tur chuan Indian Airforce te nena kan inkawp a thatna tam tak a awm a. Anni chuan Airfield chin chiah leh a perimeter security te, ATC te khu an chang ang a. Joint-venture lo neihpuiin leh anni nen inthurualin khu airport khu lo enkawl dunin, hmundang tam taka an tih angin lo ti ve dawn pawh ni ila, keini tan hlawkna tur tam tak a awm a ni.

Nichina kan sawi tak ang khan, a PCN number kha tihchangtluna, thlawhna full load, take-off weight/all-up weight nena tumna tlaka upgrade chu thil tha tak a nih hmel a ni. Indian Air Force nen Joint-Users Airfield ni tura agreement te kan siam a nih chuan, international standard, baka hniam khan an ni chuan an chhuah dawn lova. Chutah chuan tuna kan airfield-a kan thlawhna thlawk mekte pawh aircraft full-passenger an phur thei tawh ang a,

thlawhna ticket leh bungraw phurh man pawh nasa takin a tlawm theih phah a rinawm a ni.

Tin, chutianga Indian Airforce-in an hmang a nih chuan, Instrument Landing System (ILS) tuna kan neih lai te khu category-I a ni a khu khu approach light a tel loh avangin zan lama landing a theih ta lova. Tichuan, Indian Airforce-in category an neih chu ILS category-II a ni a, chutah chuan visibility metre 1700 tal ngai thin a, ILS an rawn hman tur ah chuan metre 400 chauh pawh a tum thei dawn a. Chuti anih chuan, night-landing pawh a theih dawn a, zing lamah chauh ni lo tlai leh zanah te pawh thlawhna a rawn tum thei dawn tihna a ni a, kan tan a chhawrnahawm dawn a ni.

Tin, lo ti dawn ta pawh ni ila, Airforce lamin security a chan dawn a, security lam zawng zawng an rawn maintain dawn avangin, public tan pawh a him a. Tin, Airport- hrim hrim hi Indian Airforce-in rawn luah lo mahsela civil mite tan duh duha luh leh chhuah theih a ni lo hrim hrim a, *restricted area* a ni hrim hrim a, amaha security in maintain tur a ni a. Chuvangin, Indian Airforce nen joint-venture lo nei dawn ta pawh ni ila, chumi anih avanga public an chepna tur a awm lova. A leh lamah chuan, indo lo awm sela hmelma ten target-ah min rawn neih phah ang tih te kha a ri a. Hmelma tena target-a an rawn neih tura chu, a khawilai pawh kha a ni mai a; chumi an rawn neih dawn avanga khang thil te kha lo neih ngam loh phah phei chu a dawihzep thlak dawn lutuk a. Indonaah te chuan kan lo *sepui-ruah-do* ve ngawr ngawr tur a ni chuang lova, kan sipaite pawhin an lo kap ve dawn a lawm le. Indona a thlen tawh chuan engkim mai kha target a ni vek tawh dawn tho a; churang ringawta kha asset pawimawh tak kha kan neih ngam loh phah te a nih phei chuan. Nge, Sipai hrim hrim hlauhna thinlung a awm nge ni? Helaiiah military force an rawn tel ve dawn avanga public min nekchep vek tur anga ngaihdan siam kha a dik lo; public tan hlawkna tam tak a awm zawk a ni. Tin, Air force ho thlawhna an maintain-na hmun Silchar-ah te, Bagdogra-ah te leh Leh-ah te kan hmu thin a, public area nen thlawhna te pawh kha an in park tawm ngai reng reng lo; an awmna a hrang; accommodation leh office hrang an nei thin.

Tin, terminal area leh public chenna hmun reng reng chu State sorkar ta, public ta vek tho a ni a, khatah khan air force lam an rawn interest ve vak lova, khatah khan buaina tur a awm lo. Chuti a hnehin khulaiiah an rawn inbun dawn a nih phei chuan, public tan school zirna tha tuna KV school te, hospital te tan hmasawna tur a rawn keng tel dawn a, khulai hmun khu nasa takin a than phah dawnin a lang nghe nghe a. Hei hi chu, '*a rana rana lova buana hmaa kherh*' tih ang deuh a ni e. Chuvangin, helai hmunah hian agreement siam a awm nia hriat a ni lo hrim hrim a.

Tin, airforce nen lo tangkawpin, join-users airfield ah lo chantir dawn ta pawh ni ila, a neitu nihna kha chu a eng pawh ni se, public tan kan chhawrna tur a tam zawk a. Chuvangin, kan sorkar hian agreement lo siam dawn ta pawh nisela, kei chuan hei hi chu thu lawmawm takah ka ngai a ni. Pu Speaker, ka lawm e.

SPEAKER : A lawmawm e. Dar 4:00 PM a ni a. Kan chhunzawm dawn nge, hun dang atan kan dah dawn le? Memberte engnge kan ngaihdan le? (*House-in chhunzawm a remti a..*) Aw le, sawi leh turin Er. H. Lalzirliana, member zahawm tak kan sawm e.

PU H. LALZIRLIANA: Pu Speaker, ka lawm e. Ka bial chhung thil, Airport chungchang a nih avangin ka sawi ve ngei a tulin ka hria a, i phalnain han sawi ve ka tum a ni.

Pu Speaker, vawiinah hian he ram roelna sang bera sawiho tur Private Resolution – *“Mizoram sorkarin Lengpui airport IAF kuta hlan/hralh tuma hma a lak mek hi tha kan ti lova, ti tawp rawh se”*, tih Tuirial bialtu MLA zahawm tak Pu K. Laldawngliana put luh sawiho a han ngai ta mai hi a lungchhiat thlakin ka hria a. He kan airport neihchhun ngawih ngawih, ka constituency chhunga awm leh nghal midang kuta thu neihna hlan tumna boruak awm hi kei leh ka bial mipuite, a bik takin Lengpui khawtlang te chuan na takin kan dodal tlat a ni, tih he House zahawm tak hi ka hriattir duh a ni.

Pu Speaker, tunlai Zoram ti ti pui ber chu Lengpui airport chungchang hi a ni awm e. IAF te kuta thuneihna tam tak hlan tumna thawm-thangva avanga ‘Working Committee on Lengpui Airport’ ten hmalakna chak taka a kalpui te hian dodaltu pawl lian tak *Lengpui Airport Forum* te hial a lo ding ta a.

Heng avang vek hian ‘Lengpui Joint Action Committee’ te dinin, he thil hi ngun taka ngaihtuahna te neih a ni. Working Committee te nen pawh January 17, 2025 khan Lengpui khuaah hian joint-meeting te pawh neih a ni. He meeting ah hian working committee te hian *negotiating tools* hrang hrang hmangin Lengpui Joint Action Committee te convince tura hma lain an indawr a. IAF kuta Lengpui airport a awm chuan, Zoram mipuite leh Lengpui khua mipuite ngei pawhin sum leh pai bakah ham thatna tam tak an hmuh tur zia te an fah a, *“Airforce hospital te, Airforce school te din a ni ang a, chu chu Lengpui khaw mipuite leh zirlai naupangten an chhawr tangkai dawn a ni”* tih te leh thil eng eng emaw working committee te hian an fah bawk a ni.

Pu Speaker, All NGOs Coordination Committee, Central YMA, MHIP, MUP, MZP leh MSU ten he thil avang hian Chief Minister zahawm tak pawh hmuin, Lengpui Airport IAF hnena hlan tumna awm chu ngaihtuah nawn leh tura an ngen thu pawh kan hre bawk a nih kha. Central YMA pawhin thuchhuah siamin, Mizoram sorkarin Lengpui airport IAF kuta hlan tumna chu an duh loh thu leh an dodal tlat thu an chhuah ve bawk a ni.

Lengpui Airport Forum chuan Ni 24.1.2025 khan thuchhuah siamin leh press conference te pawh nei nghalin, (hei hi an booklet a ni a), hetah pawh hian sorkarin IAF kuta Lengpui airport hlan tura a tih chu hnuk kir leh turin leh, Airport Authority of India kuta hlan a nih theih nana hma la turin sorkar an phut bawk tih kan hria a ni.

He issue avang hian chanchinbu hrang hrang, social media, news channel hrang hrang bakah literature eng emaw zatah Lengpui Airport chanchin ziahna a lo pian chhuah phah ta bawk a. Mipui nawlpui pawhin tun hmaa kan hriat loh tha tha kan hriat phah ta nual a nih hi. Eng pawh ni se, bengvarna tha tak pawh niin a lang e.

Pu Speaker, he kan thu khel mek tobul nia lang chu - Mizoram sorkar thar lo piang chuan Council of Minister meeting hmasa ber December Ni 13, 2023-a neih, DIPR website a press release no. 3047/2023-2024 Dt. 14.12.2024 thuchhuah point no.16-na a a tarlanah chuan heti hian a inziak a - *“Nimin khan Ninth Mizoram State Legislative Assembly Council of Minister thukhawm hmasa ber Assembly Recess Room-ah Chief Minister Pu Lalduhoma kaihruaiin neih a ni a, an thu pawm te zingah hengte hi an tel: Point 16-na Lengpui airport chu Airport Authority of India hnena hlan turin hmalak a ni ang a. Chutiang bawkin, Zoram Medical College (ZMC) pawh central sorkar kuta hlan tura hmalak a ni ang”* tih hi. Lengpui airport hi kum 26 dawn lai Mizoram sorkarin a lo enkawl

hnuah Airforce kutah hlan tum a nih thu hriat a lo ni ta a, chu chuan zoram mipuite - chhim leh hmar, chhak leh thlanga mite min barakhaih hle a. He thil hi zoram mipuite tan thil tha ber a ni em; a him ber em; tih ngaihtuah chian a ngai hle.

Lengpui airport hi India rama commercial airport 133 zinga State enkawl awmchhun a ni a, December, 2023-a ZPM sorkar a lo pian khan Lengpui airport hi a ngai pawimawh hle a, sorkar thar a lo din veleh midang kuta hlan chhawng turin hma a la ta nghal ta a ni. Airport enkawl hi a hautak a, India rama airport tlem te bakin hlawkna an hmu lo tih pawh kan hria a, hlawkna nei tak tak tur chuan passenger, traffic pawh a tam angai; mi nuai 10 vel tal kum khatah traffic passenger neih a ngai tih te pawh kan hria a ni. Airforce leh Civilian Airport an inhman tawm reng rengin civilian ten harsatna an tawh tlangpui thin. Airforce te hian an thil tum bulpui ber chu *Venhimna* (security) a nih avangin, civilian te mamawh aiin venhimna an ngaipawimawh zawk thin. Airport tihlen leh tih changtlunna, *International Airport hiala siam* tih te chu IAF te kut atang chuan beisei miah loh chi a ni ang.

Lengpui airport hi IAF hnena hlan a nih chuan, civil mite'n harsatna tam tak an tawh ngei dawn a. A bik takin airport bul vela ram, in leh lo, huan neite chu a victim hmasa tur chu kan ni dawn tih a chiang reng; vawiinnia kan zalen ang hian kan zalen tawh lovang. Kan duh hun hunah kan feh thei dawn tawh lo tih kan han hriat pheih chuan Lengpui khaw mipuite hi kan lunghnur takzet, tih zoram mipuite hian min lo hriatsak se ka duh a.

Tin, Pu Speaker, Indian Airforce te, airport leh a chheh velah hian rawn inbun ta rup mai se mipuite leh force te kan inpawlh nuk tawh dawn tihna a ni a, chu chuan thil tha tam tak pawh a thlen ngeiin ka ring. Chutih rual chuan, zoram mipuite chek ngeih loh zawng thil tam tak a ken tel nual ka ring a ni. Zoram mipuiten kan experience tlan vek, Aizawl khawpui chhunga Assam Rifles awm hi a hunlaiin thlamuanpui viau thin mah ila, hun lo kal zelah harsatna tam tak min thlen tih kan hria. Intihbuai nikhuaah silai chelek mai an hreh lova, civilian ten an kut kan tuar fo tawh a nih kha. Kan Minister zahawm tak official tour lai pawh zah pah lo taka harsatna lo siam sak hial khawpin an huangtau chu a nih kha. Keini mizo-tlangval tlailam luhai nei ve thin bawh te hian engtik lai pawh '*achha, hazur, ok sir*' tih reng hi kan tlin loh chang te pawh a awm dawn a, chung hunah te chuan han rik deuh rap rap chang te pawh a awm ve dawn a sin.

Tin, Mizoram awmna lai hi *international-border* a nih mai bakah khawchhak lamah India ram hmelma lian ber China, khawvel economy lian ber te zinga mi, sipai leh ralthuam lama khawvel hriat tham khawpa ropui ni bawh si an awm a, engnge kan hma hun tur kan hre bawh lo. Kan thenawm Myanmar lah khi ti mai khi an dinhmun a ni bawh a, kan tualzawl hi ral beihna hmun pui a ni lovang tih tunge sawi thei? Chutih hunah chuan, 'Indian Airforce hmunpui chu target hmasak tur a ni dawn', tih hi dawt a nih ka ring lo. Mizoram buai lai khan a ram mite ngei, kan Mizoram khawpui thlawhna hmanga bomb tute kha Indian Airforce te hi an ni a; anni bawh hian he airport atang hian kan khawpui hrang hrangte hi min bomb sak duh leh lovang tih tu nge sawi thei le?

Tin, vawiin nia Air-force kuta kan hlan hi, kan duh hun hunah kan la let ngawt thei lovang tih hi rin nghal tur a ni. Assam Rifles Aizawl khawpui chhunga inbun nghet sawn chhuah har zia te atang hian experience kan nei a ni lawm ni, Pu Speaker? Zemabawh-a kan helipad neih ve thin te pawh tunah chuan kan hman thei tawh lo; chung zel chu a lo ni tawh. Chuvangin, hun eng emaw chhung atana agreement siampui khan, 'nakinah chuan keimahni kut zalah a la

awm leh ang' tih hi chu a hlat hle ka ring a ni.

Entirna: Bangalore HAL Airport te, Bagdogra Airport te Jorhat Airport te, Silchar Airport te, Kumbhigram Airport te, Goa Dabolim Airport te hi an ni a. (Pu Speaker, hun tlem te min pek belh turin ka ngen che a ni.) Hei, Mizote hian international airport kan mamawh hun a hnai tawh hle a ni. Tunah pawh hian kan Airport khuan min dawl zo tawh lo hle ni tein a lang a. Mizote hian khawvel kan dai pawp nasa tawh a, tun hma ang khan khawvel kilkhawr pakhat thlawh pawh harsa tak dinhmunah khan kan ding tawh lo. Mizoram-a tourist population pawh kum telin a tam tulh tulh a, hun reloteah tourism hi mizo nula leh tlangvalte eizawna pawimawh tak a lo la ni chho dawn; international tourist mai bakah, India ram state hrang hrang atangin domestic tourist te an lo kal nasa tulh tulh dawn. Chutiang atan chuan tuna kan Airport neihchhun hi tun dinhmun ang hi chuan a tih tlak dawn loh a. Runway siam that leh siam belh a, a awm sa upgrade te, building tha te, passenger lounge changkang te, restaurant amenities te, parking bay te, aerobridge te, apron te, ATC tower thar te, ILS changtlung zawk te, Runway End Safety Area (RESA) changtlung zawk leh thil dang tam tak kan la mamawh dawn a ni. Zoram mipui tena kan mitthla leh kan nghahfak, chu hun thlen hun tur tlumte tlira kan thlir, kan hruaitu hmasa te'n harsa tak chung a an lo dawm hram hram he airport hi, IAF te chuan kan mitthla ang hian min thlen lul lovang. Chutih hunah chuan, thamral lo mitthlaah a thamral riari riari tawh mai dawn a ni.

MNF Legislature Party te'n tun ni 08.02.2025, (Saturday) khan sorkar officials te, media leh journalist te nen he hmun hi tlawh a ni a. Chutah chuan infrastructure hrang hrangte leh hriat tur pawimawh te department leh airport lam hotute hnen atanga hriat a ni. Sorkar hmasa hunlaia ngaihtuahna lo hman tawh ruahmanna pawh eng emaw chen kalpui tawh ni a lang, additional runway siam theihna tur hmunhma te pawh a hmunah thlir ho a ni a. Department lam expert-te atang pawhin additional runway, tun ami aia meter eng emaw zata sei zawk siam hi thil theih a nih thu te pawh hriat a ni. Kan sorkar chak tak hian neih sa hralh ral ringawta hma la lo hian central lam funding te zawngin heng siam belhna tur te hi hma han la thei zawk sela a va tha dawn em; chu chu zoram mipuite duh dan a nih ka ring tlat a ni.

A eng a pawh chu ni sela, hetia sorkarin hma a lakna hi thatna leh hlawkna sawi tur tam tak pawh a awm ang a, thil tha lo hul hual chu a ni tawp lovang. Hetiang zawng hian ngaihtuahna han seng chhin ta ila - hemi chungchangah hian cost and benefits analysis te han exercise ta ila. A hmasain he RAF airport kuta a hlan hian engte nge a man kan pek ngai; eng nge te Airport atang hian a cost kan pek ngai; engnge benefit kan hmuh tur tih te a physical, a software leh hardware ang zawng pawhin a awm ka ring.

He Airport maintain hi a harsa kan ti; civil infrastructure atan sum tam tak sen a ngai; Airport Security ah installation leh maintenance equipment, fire fighting system, trolley, conveyer belt devour leh thil hrang hrangte, building leh runway sanitation hrang hrang, power and electricity te, a cost kha awm vek a ... (**Speaker:** Minute 12 a kawka ta a, i zo thei dawn tawh em?) Pu Speaker, ka bial chhung thil a nia ka tui lo thei lo a, ka bial chhung te an tap mek si a. Chuvangin, an mittui hruk hulna pakhat te pawh a lo ni mahna; minute hnih-khat chiah ka'n dil belh che a ni Pu Speaker. Chu mai bakah a physical - a hardware bakah, a software, social cost-in a a ken tel - zalenna lo bo tawh tur te, sense of ownership (neitu nihna) a ral tur te, an tlahniam tur te. Tin, *'time is money'* tih a ni a, heng military

exercise leh drill te an neih huna kan hun hlauh tur te, khang zawng zawng te kha chhiar tel ngai niin ka hria a.

Tin, a benefit lam pawh sawi tur tam tak a awm ang a. Hei tunah phei chuan kar khatah thlawhna vawi 37 vel hi a tum tawh a ni. Landing cost per flight-ah ₹15,000/- bawr vel a ni a. Thlawhna te a tet avangin tunah hian ATR charge a ni lova, chutiangah chuan thla khatah ₹17,64,000 vel lut thei tura ngaih a ni a. Tin, airlines fee - route leh navigational charge AAI kuta pek rih te, 'watch-hour extension' tih ang zawng zawng te, service fee te, car parking fee te, airport room rent te, ads display te kha Mizoram-in kan la chan theih a ni. Tin, Airlines bungrua, khawl leh lirthei airport huam chhunga dah man te pawh a la lak theih a ni. A social benefit-ah chuan, he airport hi zoram-mipuite leh sorkar kuta a la awm hian kan chet velna te a lo awlsam a, neitu nihna kan la nei reng ang a. Patient, students, government officials, tourists, businessmen zawng zawngte tan remchanna a la ni zel dawn a ni.

Tin, *profit and loss* kan calculate naah hian tuna kan infrastructure din zawng zawng te hi profit and loss chhiar nan hian a tlak dawn em ni? Infrastructure kan din a, khatah khan sum tam tak, a crorepati a lut a, chu chu *profit and loss* chhut nan hian a tlakin ka ring lo. Sikul kan din a, hospital kan din a, Aizawl leh Lunglei kawng kum khatah pawh vawi eng emaw zat kan siamtha a. Chutah chuan eng zah nge lut? Chu chu infrastructure investment a ni a. Sawmi Lunglei - Aizawl kawng atang hian sorkarin eng zat nge sum a hmuh? Airport a nih tak avanga civil infrastructure tihna zawng zawng tea *profit and loss* calculate-na tur a criteria-a kan hmang a nih chuan, a fuh dawn em ni? (**Speaker:** Le, minute 15 a kawk ta e.)

Engpawhni sela, Pu Speaker, a tawpna tak tak atan. Sorkar hian kan *profit and loss* measurement unit atan hian engnge kan hman? Engkim teh nan hian *money, money, money*, ringawt hi kan en tur a ni dawn em ni? Mipuite avangin sorkar chuan a tul a nih chuan a hloh ngam tur pawh a ni ang a, a tul a nih chuan bat pawh kan huai mai tur a ni dawn lawm ni? Tun hma sorkar kal tawhah eng hunlai emaw khan Air Force lo sawi rik deuh te pawh a lo awm a ni mahna. Amaherawhchu, IAF hnena hlan tumna a awm thawm ka hre lova. Tuna kan hun tawn mekah hian zoram mipui, civil societies te hian thil tam tak kan zir phahin, kan hriat zau phah nasa hlein ka hria a. Hmun hrang hranga experience lo awm tawh atang hian, hun lo kal tawha thil awm tawhte theihngihla, he kan sorkar hian mipuite leh NGOs hrang hrangte ngaihnan te zaha, he movement awm mek hi zoram mipuite hmakhua ngaiin, 'AIF te kutah hlan kalpui lo se' tih hi ka ngen a, kan Resolution hi he House-a pass ngei turin ka ngen tak meuh a ni. Ka lawm e.

SPEAKER : Member te'n *minute 10* kha kan duh dan a ni a. Ni e, bialtu a nih angin kan han ngawi deuh a. Kha, minute 17 vel chu a hmang e. Eng pawh ni se, kan kal zel ang. Tunah member zahawm tak Pu V. Malsawmtluanga ilo sawm ang.

PU V. MALSAWMTLUANGA: Kan Sorkar chuan *punctuality* te, *time management* te kha kan kalpui avangin tawi fel thei ang ber tura ka hriat angin kan rawn sawi ve dawn a ni.

Hei, kan hriat angin *Private Member Resoultion*, kan member-pui Pu K. Laldawngliana hnen atangin a rawn lut a. He Resolution hi engti hawi zawngin nge ka sawi ang aw, tih te rilruah a awm a. A chhan chu, kan hriat angin, Air-force kuta Lengpui airport pumpui hlan

tumna leh hralh tumna anga hriatna atanga he resolution hi rawn lut niin a lang a. Tin, a rawn puluttu Pu K. Laldawngliana, a mizia te ka han thlir a, a ni pawhin hreh tak chungin; ama duhthlanna pawh a nih ka ring lova. Party lamin an nawrna avanga a rawn pulut ni te pawhin a hriat a.

Engpawh ni se, keini chu expert kan ni ve lo a. Tun hnaiah Wing Commander leh Surgeon, a field a cheng, experience nei leh expert ten civil mite tan a him zia leh Mizoram tan pawh a that dan tur Social media-a an kawmna te pawh kan lo hmu tawhin a rinawm a. Khalam zawng kha chuan keichuan ka sawi duah dawn lo a ni. Nia kan hriat angin ZPM sorkar, Pu Lalduhoma kaihhruai sorkar chuan, kan ramin hma a sawna, state dangte ruala ke kan pen ve theihna turin ngaihtuahna a seng a, ruahmanna tam tak zamin, a kalpui mek a. Chung zingah chuan Lengpui Airport kan state-a airport kan neih chhun hi tun aia changtlung zawk, hmasawn zawk, damlo leh zirlaite pawhin tangkai zawka kan hman theihna turin engtin nge hma kan lak ang, tih ngaihtuahna a lo piang chho a, working committee din a lo ni ta a ni. Tichuan, Working Committee in research-based in hma an la chho a. Chutah chuan, state sokar sum kal ral tamtak, tun ang lo deuh hian sum hi inrenchem te kalpui a lo nih takah chuan, insensona te a ziaawm theih nan, tiin ruahmanna a lo siam ta a.

Tichuan, Working Committee chuan ngun taka a zir hnuah sorkar kal ta te hma lo lak tawhna a nihna chen pawh a awm a, chung zingah chuan ‘Indian Airforce nen hian airfield *runway* hi inenkawl tawm mai ila; join-users in kal ta ila’, tih te rawtna a rawn awm chho ta a ni. Tichuan, kan hriat angin sorkar chuan theihtawp chhuahin hma a la mek laiin, Pu Speaker, thudik tawk lo deuh hi mipui ah hian kan thehdarh ni te pawhin a lang a ni. Hei hi a vanduaithlak hlein ka hria. Kan sorkar chuan kan Airport hi hralh a tum ngai dawn lova, a hralh ngai dawn bawk hek lo a ni, tih hi he House zahawm takah hian ka sawi duh a ni. Tin, ZPM sorkar Pu Lalduhoma kaihhruai hian Mizoram tana thil chhe tur hi a rel dawn lo a ni, tih hi vawiin hian ka sawi duh a ni. Tin Pu Speaker, vawiina Airforce kuta hlan duh loha sawi sawite zingah hian, kan hriat angin Airport ram chhung acre 32.66 chu kum 50 chuang Airforce kutah a lo pe daih tawh a ni. Engpawh ni se, Pu Speaker, “he ZPM sorkar hian Indian Airforce kutah Airport hi a hlan dawn lo” tih kha kan sawi nawn duh a ni.

Tuna kalpui tum danah chuan, *joint-users* mai a ni dawn a, a airfield laia khu min rawn enkawlpui dawn a, chu chuan kawng hrang hrangin tuna kan harsatna tam takte min sutkian sak thei dawn a ni tih a Chiang em em a ni. Tin, kan hlauh em em, ‘IAF kutah a lut a nih chuan, terminal te, arrival leh departure te hi, duh angin kan lut tlang theilo ang’ tih te leh harsatna hrang hrang awm thei te kan sawi a. Heng hi chu social media ah te kan lo hmuh tawh ang leh kan House Leader te pawhin an lo sawi tawh angin, heng hi chu ‘Security Agency hran daih a ni’ tih hi he House zahawm takah hian kan sawi nawn duh a.

Tin, Pu Speaker, IAF join-users Airport hi tunah hian 39 vel lai a awm a. Chungte chu keini State aia hausa zawkte, khawsak lamah leh kawng hrang hranga develop zawk te an ni. Tin, Pu Speaker, flight schedule chungchang hi, ‘Airforce in Aiport a enkawl chuan, an duh hun hunah an hmang ang a, mipui tan harsatna a thlen ang’ tih te a riin kan lo hria a ni. Kan hriat theuh angin, flight schedule reng reng chu a Airlines te leh Airport ten Directorate of General of Civil Aviation (DGCA) ah a thehlut a, chumi mil chuan DGCA hian thla ruk chhung atan flight schedule ticket mumal takin a siam a ni. Tin, International Airport chungchangah thenkhatin “International airport-a siam mai theih tawh hi IAF kuta kan pe a nih chuan, hmasawna kan hmu thei lo ang” tih te pawh a awm a ni. Kan hria ang

a, tunah hian heng - Pune te, Chandigarh te, Bagdora te, Srinagar etc. ah te pawh international flight IAF nen join-users-in a thlawk mek reng a ni. Kan hriat angin, Pune phei chu India ram puma Airport lun ber *pakuana* a ni pha hial a ni.

Tin, kan hlauh leh nia lang chu - *military exercise* chungchang a ni. Nichina sawi ang khan, DGCA-in flight schedules a siam tawh chu Airforce lam atanga tihdanglam hriat a la awm ngai lo a ni. Tin, hei hi dan a ni chiah lo bawk a ni. Tin, Mizoram hian hmasawn se kan ti a. Hei ka bial chhung leh bial dangte pawh ‘engnge an hmasawna’ tia kan sawi chuan, *kawng tha* tih te, *school tha* tih te a tel a ni. Tin PHC te, health sub-centre te kan nei a, heng sub-centre te pawh hi changtlung se, tiin khawtlang mipuite chuan theihtawpin kan tlangaupui a, an bialtu MLA ah te an rawn thlen thin a ni. Chutiang chiah chuan, IAF kutah a awm a nih chuan, (Member zahawm tak Pu Clement-an a lo sawi tawh) medical facilities tha zawk medical center te, school tha zawk te kan nei thei dawn a ni. Chu chang a ni lova, local employment generate-na kawngah te, local business kawngah te pawh tun aiin hma kan sawn hle dawn a ni. Tin, ka MLA-puite pawhina kan sawi fo thin pakhat chu - *CSR fund* a ni. Heng tamtak te hi hamthatna kan neih phah dawn a, a hlu dawn hle a ni tih hi he House ah hian ka han sawi bawk a ni.

Pu Speaker, kan hriat angin flight ticket man a sang em em a, nei leh nei lovin puk chawp te’n kan thlawk fo a ni. Hei, Pathian leh mipui zara MLA ka lo nih hnuah pawh hian flight ticket man, (damlohna chu thuhra) zirlai tam tak ticket man to avanga flight man tur nei lote an awm a ni. Chungte chu ka hnenah an rawn tlu lut thin a ni. A then chu kan pui a, a then pui theihloh chang te kan nei a ni. Ka han sawi duh zawka chu, IAF kuta a awm a nih chuan, runway te pawh tun aia changtlung zawk turin hma lak a ni dawn a. Chu chuan kan economy a nghawng ang a, flight ticket man te a tlawm dawn a ni, tih te kan hriat tawh kha.

Pu Speaker, a tawp bera ka sawi duh chu, mi thenkhatin, ‘min bomb tute ngei kuta hlan chu’ tiin mipuite ah zirtirna dik tawk lo deuh tunah hian a kal mek ni te pawhin a lang a ni. Zoram mipuite’n he zoram kan hmangaihna te, a hnam anga dinchhuah kan tumna thinlung te hi chawh tho tumin, ‘min bomb tute ngei IAF kuta hlan hi a tha lo a ni’ ti tawk te kan awm a ni.

Pu Speaker, he House zahawm taka ka han sawi duh chu, IAF te kha hmanrua ve mai a ni. Central sorkarin a ni, a order petu kha. Kan hriat angin, March ni 5, 1966 ah khan Prime Minister Indira Gandhi khan order a pe a ni. IAF te kha hmanrua mai an ni. Vawiin niah chuan remna leh muanna a awm a, *Remna Ni* te kan hmang fo a, kan lawm fo a ni. Pu Speaker, hetiang zawnga mipuite zirtirna dik tawk lo, felhleh deuh a awm thin hi paw ka ti hle a ni. Engpawh ni se, kan member-pui zahawm tak Pu K. Laldawngliana Resolution rawn putlul, “*Mizoram sorkarin Lengpui Airport Indian Airforce kuta hlan/hralh tuma hma a la mek hi, tha ka ti lo a, ti tawp rawh se*” tih hi, kei chuan resolution puitlingah ka ngai lova. Thil eng emaw hriatsual palh leh thil kal lai mek a ni a. Zahawm viau mahse, kei chuan ka thlawp thei lo a ni. Ka lawm e.

(*Speech not corrected.*)

SPEAKER : Tunge sawi leh ang? Member zahawm tak Pu K. Hrahmo a phar a, i sawm ang aw.

PU K. HRAHMO : Pu Speaker, ka lawm e. Hei social media ah, ‘Lengpui Airport

khu AIF hnenah hlan tumna a awm a ni' a thenin an ti a. A thenin, 'AIF ni lovin, Indian Air Force hnenah hlan tumna a awm' an ti bawk a. Ka rilruah ngaihtuahna thui tak a kal a, hei hi engnge a chhan niang aw; State airport tha tak kan enkawl mek hi Airforce kuta dah kan tum hi, engnge a chhan ni ang, tih te; min tibuai khawp a. State authority lam atangin engmah insawifiahna a awmin ka hre bawk si lova. Mahse, kha, House chhungah ruling MLA pathumin an sawi a, 'sum awm loh vang; sum problem vang a ni' tih an sawi atang khan a Chiang a, paw ka ti khawp mai.

A tha ber chu, State hian enkawl chho zel ila, State ta ni zel se la, State-in 100% control kha a tha ber ang a. Mahse a enkawltu ber sorkarin, 'kan ti thei tawh thlawt lo a ni; kan tlin lo a ni. Chuvang chuan, Agency dang AAI a ni emaw, IAF a ni emaw kuta dah hi a tha zawk e' an tih si chuan, a enkawltu an ni a, an thu ni sela. Airport hi State control a ni emaw, AAI control a ni emaw, IAF control a ni emaw, civil tana hlauhawm ber nia ka hriat chu Indian Air Force control airport a nih lain, kan Lengpui Airport Indian Air Force kuta hlan an tum erawh hi chu a paw ka ti khawp mai. AAI kutah tal awm thei zawk se, chutiang tur chuan kan State sorkar hian AAI authority te a dawr tawh em? Hmanni Delhi kan zuk kala Civil Aviation Minister ka zawh khan engmah a hriat loh thu a sawi bawk si a. Minister level emaw, Secretary level emaw ah indawrna pakhatmah a awmin an hre si lova. Khulaia office-a thawk ve LDC level emaw te an dawra harsatna an lo siam avanga an beidawngin Air Force lama tuan an ni thei em, tih te rilru ah chuan a awm a ni.

Chuvang chuan, kan duh ber, a tha ber no. 1 chu – '*State control ni reng se*' tih hi a ni. Mahse State berin a ngam loha, 'kan hloh nasa mai' an tih si chuan, 'enkawl ngei ngei rawh u; enkawl hram hram rawh u' tih chi lah a ni si lova. Enkawltu hram hram ta se, engtikah emaw chuan abandoned (hluihlawn) airport a ni mai dawn si a, chu chu a tha bawk si lova. Engpawh ni se, Air-force kutah ni lovin, AAI kutah dah rih mai se. Hei, Pathian zarah State ah hian BJP kan la sorkar dawn a, chumi huna khul let mai turin ti ila a tha lawm ni, tih te ka lo ngaihtuah a. Kan khul let mai bakah, chhim lamah pakhat kan siam belh dawn a ni.

Pu Speaker, engpawh ni se, IAF kuta awm hi tha ka ti lova. A theih chuan, 'AAI kutah dah rih ni se' tih hi kei ka ngaihdan a ni a. A tha ber erawh chu, State-owned airport ni zel se, tih kha. Chtiang chuan, hei ka thenawm-pa, MLA zahawm tak Pu K. Laldawngliana Resolution hi a support zawngin ka lo sawi ve a ni e. Ka lawm e.

SPEAKER : A lawmawm e. Tunge sawi leh ang? Aw le, Member zahawm tak Pu Ramthanmawia ilo sawm ang.

PU RAMTHANMAWIA: Pu Speaker, ka lawm e. Vawiih Mizoram sorkarin, "Lengpui Airport Indian Air Force kuta hlan/hralh tuma hma a lak mek hi tha ka ti lo a, titawp rawh se" tih resolution kan member zahawm tak Pu K. Laldawngliana, Tuorial bialtu rawn putluh sawiho a ngai ta hi, paw ka ti hle mai a. Heng te hi sawiho ngai lovin, a that lohzia chu kan sorkarna chelh mek tute pawhin an hrechiangin ka ring a.

Kan sawi tak ang khan, sum harsatna kara kan runway upgrade tir beiseina avangin 'Air Force hi zakzeh tel ta ila' tih ngaihtuahna a awm thin niin ka hria a, thutlukna tak chiah erawh a la awm lo niin ka hria a. Chuvang chuan, tun hi a ngaihtuah hun tak, a sawiho hun tak niin a lang a ni.

A that leh that loh chungchangah chuan, Lengpui Airport hi Mizoram hian Air Force kutah kan la hlan chhin loh avangin, keini chuan experience kan nei lo tih a chiang a. Amaherawhchu, Air Force tena an lo enkawl airport eng emaw zat hmarchhakah pawh a awm a. A hria tena an sawi, sipai nena intawma kan neih chuan, khu airport kan neih chhuna khu civil tan tun anga zalen taka kan luh/chhuah emaw kha kan duh hunah te a thlawh emaw, a luh emaw te kan thei dawn lo, tih a chiangin ka hria.

Tin, kan ngaihthlak tak ang khan, civil leh IAF te lo intawm airport eng emaw zat a awm a – Pune Airport te, Dabolim Airport, Goa te etc. Anni te hi intekhkhin chi an ni lo, State hausa an ni a. Air Force nena harsatna an neih thin avangin civil, an duh hunah te an thlawk thei lova, zan laiah te, zingah te thlawh a ngai a. Chuvang chuan, airport dang te an siam phah ringawt mai a ni. Chutiang chuan keini State chuan kan ti ve thei dawn lo a ni.

Pu Speaker, Mizoram-ah hian hun rei tawh tak atangin Lengpui Airport anga hmun remchang kan nei hauh lo a ni. ‘Hmun dangah kan siam ve leh mai ang; remchang a awm tho a lawm’ han tihna tur hi Mizoram hian kan nei tlat lo hi a pawl em em a ni. Chuvang chuan, kan neih chhuna hi chu a theih chhung chu la hum ila; kan lo insen belh deuh a nih pawhin, lo inseng belh mai ila. Tunah sorkar chak tak, *sorkar a ngaihna hria* kan hrawn mek a, zoram mipuiin kan thlir mek che u a ni. He Airport ina harsatna a tawh te chu sorkar hmasa pahnihte pawhin an lo paltlang ve tawh tho kha a ni a, harsatna an tawh lo a ni lo a. Chuvang chuan, Pu Speaker, tuna an hmalakna, ngaihtuahna an hman meka hi sut leh se la, ngaihtuahna thar siamin kawng tha zawk, mipuite tan pawh a ngaihthatna, mipui tan pawha he kan airport neihchhun, kan rohlu tak hi *Lengpui Airport* la ni zel se, tih vawiina Pu Dawngtea’n a rawn move hi a tha ka ti a, ka thlawp a. Hei hi party thil a ni lova, party- a lak chi pawh a ni lovin ka hria.

Sawrkar hmasa ah khan AAI te pawh kan sawi ri a. Amaherawhchu, AAI lamin an duhdan kha Mizoram tan chuan pawm chi a ni lova, pawm a ni lo bawh a. Harsatna tawhna tur a nih avangin vawiin hi kan thlang a ni. Pu Speaker, sawi tam ngai lovin, hemi chungchangah hian kan sawrkar hruaitute pawh hian vawiina kan han sawi atang te pawh hian, ‘kan thuchai hi a dik tak ang a’ ti thei ila. ‘Kan tih chu, kan tih’ ti lovin, a tha zawk zawng chhuak tlang ila. Ram tana him, tu leh fate pawhin nakin a min dem lohna turin ngaihtuahna seng tlang ila, tiin Pu Speaker, ka rawn ngen duh a ni.

Sipaite nen a intawm thil chu a buaithlak a ni. ‘Airforce te chu chuti khati; kan tan a pawina a awm lo; harsatna a awm lo’ kan han ti ngawt a; a ni lo tih chu kan hria. Lammual kan intawm te pawh hi, Assam Rifles ringawt pawhin harsatna min siam a ni, tih Zoram mipuiin kan hria a ni. Mipuiin kan hman duh pawhin an hnena dil a ngai reng mai a; hetiang *intawm* hi tih chi a ni lo a ni. Heng airport leh thil dang dang te pawh a ni ang. Chuvang chuan, hei hi chu intawm lovin keimahniin, a tir atanga kan hotu kal hmasate, kan ram hruaituten a an ngaihtuahna zawng zawng an senna vawiina a rah kan chhawr mek te hi tidanglam lovin, Mizoram tan ni reng se la, theihtawpin tan han la leh se la. Tunah phei chuan hma kan sawn zel a, passenger te pawh lutchhuak an tam zel avangin kan hloh te pawh a tlem tial tial a ni.

Tin member zahawm tak takte sawi ang khan, sawrkar hi sumdawng tur pawh kan ni chiah lova. Department zawng zawng hi ngaihtuah ila, a tam zawk hi chu hlep tura tih an ni lo a ni. Chuvang chuan, airport a nih avanga help tur emaw, kan hlohna kha pawl ta viau leh

chumi avanga midang kuta hlan tumna ang deuha a kal a nih phei chuan, hei hi a paw ka ti a. Transport te pawh a ni a. Tunhma atangin Transport Department chu hloh zawngin kan kal a ni. Amaherawhchu, mipui tan a nih avangin, a hlohna kha hlepah kan chhiar a ni, sawrkar kalta te pawh khan. Chuvangin, airport ah te pawh kan lo hloh a nih pawhin, *Mipui ta, Mipui tan*, mipui tana sawrkar kan nih miau avangin.

Hei hi, Pu Speaker intawm lovin, Lengpui Airport hi Mizote ta a nih reng theih hi a tulin ka hria. A thatloh dan kha keini chuan kan hre lova, mahse a hria ten an sawi atang khan leh helai Lammual te, sawlai Zemabawk helipad hmun civil-in kan hman theih tawh loh dan atang te pawh hian, sipai hi chu an lo danglam a ni. Civil te chu a chaklo zawk leh a hnungtawlh zawkah kan tang lo thei lo a ni. Tuna Assam Rifles insawnehhuahna turah te pawh kan hria a. An va awm phei a, Zemabawk rama loneitute pawh an lo ah te kal an phal lova, kan buai kan buai kha.

Chuvang chuan, civil hnaiha sipai an awm reng reng hian mipuiin harsatna kan tawh ziah a ni, tih hi tlang hriat a ni. He kan airport, Airforce kuta hlan hi a tha nge, thalo tih lo zirna niin ka ring a; tunah hian thil thui tak a la kal lova. A lo thalo a nih chuan, a aia tha zawk la zawng ang u, ti tlangin, Vawina Pu Dawngtea'n a rawn move hi kan zavai hian pawm mai ila. He sorkar pawh hian a tha lo chu, *'tha lo'*, tha chu, *'tha'* tiin kal thei ila. He resolution hi thlawp theuh turin ka ngen a, ka thlawp bawka ni. Ka lawm e.

SPEAKER : A lawmawm e. Tunah chuan member zahawm tak Pu Lalramliana Papua i lo sawm ang.

PU LALRAMLIANA PAPUIA: Pu Speaker, ka lawm e. Tuna kan sawi tur Private Resolution lo lut hi sawi thui ngai vak turah pawh ka lo ngai lo a. Kan ti tawp dawn ta mai emaw ka ti a, mahse hei, rin aiin kan han fan leh ta zawk a. Lengpui *"Airport IAF kuta hlan tumna hmalak mek hi tha ka ti lo va, tihtawp ni rawh se"* tih resolution lo lut hi, thuthang kan han hriat dan hi a chianglo ka ti a. Hei hi kei pawhin tha ka ti lo; Lengpui Airport khu hralh ka phal lo reng reng. He Resolution hi tak tak a niha, Lengpui Airport hi kan hralh dawn a nih chuan, keipawhin tha ka ti lo a ni. *"Hralh kan tum em' tih hi sorkara hmalatute hian chiang takin sawifel law law se tha ka ti a. Kan tum a nih chuan, a sawidan tur pawh kan thiam thei deuh ang a. Thil ni lo pui, resolution ah khan sorkar kha hma la anga puh a nih si chuan, sawi thui pawh a ngai lem em ni? "An lo hresual palh a nih hi; he resolution hi sawithui a ngailo e"* tia chinfel mai kha kha a tha maiin ka hria a, kei chu. Chuvang chuan, kan hotute, a chin hria leh hmalatute pawh tuna he House chhunga kan memberte zingah hian kan awm ngei ang a. Kan House Leader ngei te pawh leh, chumi lovah pawh, hemi chungchanga hmalatu kan member a mawhphurtute pawhin, he resolution in a puh ang hian thil a lo ni reng em, tih kha fiah deuhin min hrih sela. Tichuan, he resolution pawh hi sawizui dan thiam a awl zawkin ka ring deuh a, keima lam atang chuan.

Tihian, rinthu bawlin kan insawisiak a. Mipui, chinchang hre mang lote ngaihtuahna kan ti chia hlein ka hria a, tunlai chu. Hei, kan tawngkam hman dan te pawh hi, broiler pum hralh a hralh tur ang te hian kan inchan deuh niin ka hria a. Tin, Mizoram House hralh tur angah te kan inchan deuh niin ka hria a. Khatiang anga mipuiin ngaihkan kan neih kha chuan, kan hlauthawna a nasa ang a, kei ngei pawh ka hlauthawng a ni. *'Chutiang chuan sorkar hian hma a la reng em' tih hi chiang deuha hriat ka duh a.*

Tin, sipai hlau ta reng reng hi kan ni a. Chuvang chuan, tunah pawh hian a sawithaih zawnga kan insawithaih chuan, rambuai lo tawng hrep tawhte kan nih avangin, kan nu leh pa, khami hre pha chin pheih kha chu, *a sipai-insawithaih* zawnga kan tih pheih chuan, tunah pawh hian an thiphu a rang mai a ni. Khatiang a nih avang khan, thil nihna tak pawh hi kan hriat chian a ngai a ni. Military Exercise-in min tihbuai tur zia kan han sawi ang chi te pawh kha a hlauhthawnawm a ni. Zing Sipai Lammual bula exercise laten min tibuai viau turah sawi ta ila; chutiang ang deuh te pawh chuan ka han tehkhin a. ‘Thil ni thei a ni em, tak tak thleng thei a ni em’ tih ang chi te pawh kha, keimahni experience vak lo tan chuan hriatthiam har ka ti a.

Engpawh ni sela, Pu Speaker, ka sawi duh tak zawk chu - Hmalatu, kan hotu, he House ah pawh hian sawifiah thei an awm chuan, he resolution-in Lengpui Airport hralh tura sorkarin hma a la ni anga a sawi hi, ‘a lo ni reng em’ tih min hriahfiah thei sela. ‘Kei chuan hralh ka phal lo’ tih kha, keimah mimal ang pawhin ka sawi duh a. Hemi chungchang hi Chiang taka kan hriat chuan ngaihdan te pawh kan sawi thei ang a. Chutiang chuan he resolution pawh hi sawizui fe pawh chu a lo ngai mai thei a. Chutiang a lo nih lem loh pheih chuan, “he resolution thu ken hi hriatsual palh a ni e. Hei hi chu sawi zui ngai lovin; ti hian pass lem lovin i kalpui mai ang u hmiang” tih te pawhin hahdam takin kan kal mai thei turah ka ngai deuh a ni.

Chuvang chuan, Pu Speaker, tuna private resolution kan sawi mek - Lengpui Airport IAF kuta hlan tura hmalak mek ni anga sawi hi, hmalak a ni tak tak em, tih pawh kei chuan ka chian loh avangin, pass pui-turin ka pawm thei rih lo a ni e. Ka lawm e.

SPEAKER : Member zahawm tak Pu TBC Lalvenchhunga ilo sawm ang.

PU TBC LALVENCHHUNGA: Pu Speaker, ka lawm e. Vawiina Resolution – “*Lengpui Airport hi Mizoram sorkarin Indian Air Force hnena hlan tuma hma a la mek hi, tha ka ti lova; tihtawp ni rawh se*” tih han sawiho hian, a sawi tur awm tak ni angin min enrawn deuh ni te pawhin ka hria a. Lengpui Airport enkawl dan tur chungchangah hma la tura sawrkarin a ruat chairman ka nihna angin, “he resolution hian behchhan a neih loh avangin, ka thlawp lo” tih kha a hmasain ka sawi duh a.

Pu Speaker, a history (han ti ve khanglang ila) kan hriat ve atangin tawite han sawilan hmasak ka duh chu - he Lengpui Airport hi kan hnam rohlu a ni a, kan pawm vek a ni. Vawiina i dinglama thute pawh hi he Lengpui Airport a hmuna kawh hmasatu, a zuitute leh vawiin thlenga sulsutute zinga mi an ni a. I veilama thute pawh ni sela, he airport kan neih theih nana thawh hlawk tak an ni a, an hmalakna te hi thangtharte hian kan theihngilhin ka ring lova.

Chutiang bawkin, Congress Party-in Pu KC Pant 1994-a a rawn kala, civil hospital tlang atanga Lengpui a han kawh hnu lawka vaibelchhe 50 kan han hmu te kha tumah hian kan la theinghilhin ka ringlo a, he hnam rohlu hi. Amaherawhchu, hei leh chen enkawl a ni chungin harsatna sum leh pai chungchangah te kan tawh nasa a. Chumi piah lamah, a hma kha chuan a hausa leh a neinung deuhte vai ram hla deuha kal turte tana hman tur deuha ngaihna mi nawlpuiin kan nei deuh a, Thlawhnaa chuang phak ve ah kan inngai ngai lo a ni. Chutiang taka kan ram hnam rohlu a ni hi keini thangthar leh zualte vai rama kan awm ve lai pawhin kan chuang pha bik lo a ni. Amaherawhchu, thangthar zelah khawvel mitin

mamawh leh mi tin ban phak a lo ni ta a.

Tuna kan Lengpui Airport dinhmun hian kan mamawh a phuhruk pha lova, hei aia changkang zawk leh changtlung zawk kan mamawh ve a. Chumi enkawl na kawngah chuan wawin sorkar lo ding hian changtlung zawk leh enkawlnahawm zawk, a chhawrtute pawhin hei aia changtlung zawk, mihring ngawr ngawr nilo, kan thlai thar chhuah agricultural produce te hmundanga thawnchhuahna te, foreign thleng pawha bungrua han inthawn ve zung zung theihna tura *Airport Postal Service* kan mamawhna te; chumi piah lamah khulaia Cargo-bay kan mamawhna te, cold-storage kan mamawhna leh kan airport mamawh hrang hrangte bakah kan ram sum dinhmun hre chungin. Kum 30 teh meuh mai State kan nih hnuah pawh member te atanga kan hriat chu, khawvel ram dang kan pan theihna awm chhun a ni; Silchar kawng a pin apiangin. A bak kawng dang nei miah lova.

Kum 30 kan kal tawh hnuah changkang hleithei lo, license pawh renew hleithei lo kan nih tak hnuah hian, he sorkarin ngaihtuahna hmanga a han din kha a lawmawm pawh ka ti a. Ka kovah a mawhphurhna min han pek pawh khan lawm takin ka pawm a. A lo changtlun theihna atan airport siam a lo nih dawn khan thangtharte chu kan nuih a za deuh mai thei a. Keini ho tan chuan ‘*choak bak a tum lo ang*’ han tih te, ‘khulaiah khuan thlawhna a rawn tum hun chuan, in arpui ten artui an awp keu thei tawh lo anga, a nghawr a na si a’ han tih te, ‘Lengpui khawtlang chuan tar bengchhet in ngah ngawt ang, a bengchheng si a’ tih te kha tawng tlanglawn la rei lo tak a la ni vek a ni. Kan intihthaih a, kan intihder a. Kan ram hmasawna tur kan ngaihtuah dan hi a hunlai milin; hmalatute kha an fakawm zia wawinah hian ka rawn sawi duh a. Huai takin; tha nia an hriat kha an kal tlangpui a. Lengpui khawtlang tan eizawna chhenfakawm ni bawk, *Zoram-mipuite Kawtchhuah* a lo ni ta a ni. Chumi rilru atang chuan ka member-puite wawinah hian rilru seng turin ka ngen duh a.

Kum 1993-a Assam Rifles Lammual-a PV Narashimharao rawn kal tum khan, Congress leh PC tangkawpte campaign-na ah khan he airport hi min tiam a nih nghe nghe kha! Kan la hre vekin ka ring. Wawinah a taka changtute vek kan ni. He hnam rohlu hi tuman a bo kan phal lo ang a. Amaherawhchu, tlabal lutuk, function hleithei lo, mipuiin kan chhawr hleihtheih loha awm leh, chumi tuaihnum tura kan sum leh pai neih te thlirin, ‘eng tiangin nge enkawl ila’ tih kha kan sorkarin ngaihtuahna a hman a ni a.

Pu Speaker, chutah chuan tawitein, mipuiin rinthua kan sawi lohna tura han sawi fiah duh ka nei a; i phalnain, Pu Speaker.

Working Committee sorkarin a din khan tih tur ‘*terms of reference*’ panga min tuk a ni. Chu chu mipuiten hre law law se ka han duh deuh a: -

1. ‘To undertake a holistic assessment of the present operation and maintenance of the airport and its future requirement’ tih a ni. Lengpui Airport tuna a awmdan, a dinhmun leh enkawl mek dan leh hun lo kal leh zel tura a mamawhte zirchianna kha kan hna a ni.
2. ‘To study the operation and maintenance of airports in other states especially in the Northeast with special focus on the performance and experiences with Airport Authority of India or any private company or consortium’ tih a ni. Hei hi special focus bik Northeast Airport dinhmun bik zirchianga enkawl tura zir tur min pek a ni.
3. ‘To examine the viability of handing over Lengpui Airport to Airport Authority of India or any private company or consortium and the preferable entity, AAI or other private company or consortium to hand over the airport’ tih a ni.

4. 'To examine the process that would have to be followed by the Government of Mizoram to handover the airport to another entity' tih hi a ni leh ta a ni. Hei hi kan recommendation atanga sorkar hmalak zel dan tur thlenga zir tura min tihna te a ni.
5. 'To assess the feasibility or possibility of operation and maintenance of the airport in the hands of the State Government as before' tih a ni. Pawimawh deuh chu, kha terms-ah khan sorkar hian khatiang rilru ngawr ngawr kha a pu lova. Chu chu State sorkarin a enkawl ngai anga enkawl zel tura zirchiang tura tih kan ni.

Chu parameter hmang chuan Working Committee hian zirchianna hrang hrang kan han explore a; Lengpui Airport te nen te pawh vawi tam sawi a ni tawh a. AAI leh khang zawng zawngah te 'kum khatah vaibelchhe heti zat kan loss' kan tih thin te, khang zirna zawng zawng kha vawiinah hian sawi chhuah rem vek lo mah se, AAI-ina an chan tur hi a vaiin pe dawn ta ila, tuna an demand ang hi chuan engmah chan kan nei dawn lova. Chutiang bawkin, hmun danga an tih dan te enin privatize lehngal mai turah pawh sorkarin sawi nei thei tawh lo khawpa *agreement* kha kan member, i vei lama mite pawhin an sawi tawh ang khan, keini pawhin tha kan ti bik lova. Chairman, Airport Authority of India nena kan indawrna kal mek a ni a. Kan lehkha hnunng ber 7th June, 2024-ah khan heng terms kan meeting-a kan sawite hi 'kan pawm thei lo e, reconsider leh ni se' tiin point paruk kan thlen leh nghe nghe a ni. Chutah chuan, theihpatawp kan chhuah a, option hrang hrang kan enin (a tawi zawngin); he Lengpui Airport Committee hian sorkar hnenah hian recommendation kan thlen ta a. Hetah hian 'comparative analysis' kan ti a, chi hrang hrangin lo ti dawn ta sela, enkawl zui dan tur hi sorkarah hian fiah fel-fai takin kan thlen a.

A summary tlangpui ka sawi duh chu, Pu Speaker, i phalnain - Kan recommendation 5.45 table-ah hian 'the Working Committee recommended that the state Government may make an informed decision on the basis of the above assessment considering various factors pertaining to operations, security, infrastructure development, revenue sharing including the emotions of the local populates' tiin sorkarah hian report kan theh lut a ni. Chu report atanga en dan chuan, summary report atanga en hian kan hloh/help zawng zawng chhut te, mahni enkawl tura a harsat zia te ngaihtuahin, he Airport hlutna ngaihtuah chungin leh kan hnam rohlu ngaihtuah chungin tu kutah mah hlan kan phal bik lova ni, he Committee hian. Chuta kan recommendation ah chuan – "A engpawh ni sela, Indian Airforce nena join-users Airfield-a kan chhuah theih a, mawhphurhna kan intawm a; Airport atanga sum lut zawng zawng kan la chan theih a; a lehlam zawng zawng khu agreement felfai tak neia kan chan theih si chuan, hei aia hlu a awm dawn em ni" tih erawh chu kan ngaihda a ni a.

Heta kan report tawp berah hian pakhat han chhiar chhuah leh ka duh a, Pu Speaker, I phalnain - Kan report submission last paragraph-ah hian "A comprehensive memorandum of understanding duly agreed between the Government of Mizoram and the other entity is the essential requirement for ensuring proper handing over of the Airport. The draft MoU be duly vetted by the Law & Judicial Department before the same is approved at the highest level" tih a ni. Hei hi Committee-in kan report and recommendation-a kan thehluk hnunng ber kha a ni a.

Chuvangin Pu Speaker, wawiinnia kan zir chianna atanga sorkarina recommendation a rawn din leh khan membortena hriatchian kan duh laia kha; heng hi thuruk a ni lova. Committee a din te, heng zawng zawng hi sorkarah, DIPR ah chhuah vek a ni notification hi. Kan *terms of reference* te hi hmuh theih vekin a awm a, a ruka rala thil tih pakhat mah vawiin ni thlengin

a la awm lova. Chu chu sorkarin ngaihtuahin, “Indian Airforce nena tih hi a tha lawm ni” tiin zir chian dan tur, hmalak chhunzawm dan turin Committee min rawn din thar leh a, chuta chairman turin min rawn ruat chhunzawm leh a. Hetah hian *terms of reference*, tih tur min rawn pe leh a, hei hi mipui, public domain-a awm chiang reng a ni a. Ngaihndan, rinthua kan lo neih nasat ema vang hian hei hi hrechiang nawn leh ila ka duh tel a.

Pakhatna: ‘to explore the feasibility of the handing over Lengpui Airport to the Indian Airforce’, to explore the feasibility a ni. *Pahnihna*: - ‘to prepare a draft memorandum of agreement for handing over Lengpui Airport to the Indian Airforce’. Draft Memorandum prepare tura tih kan ni. Heng zawng ti tur hian working committee kan thut leh hmasa berah khan hemi kawnga hre awm leh ngaihtuahna hmang thei nia kan hriat te kan han en a. Chutah chuan, kan Principal Consultant rei tak lo ni tawh, GAD Aviation Wing-a Controller hun rei tak lo chelh tawhtu kha lehkhah kan thawn hmasa ber a, “I expert opinion kan mamawh e” tiin Wing Commander, Pu J. Lalhmingliana DO letter hmangin kan zir chianna te pek a ni a. Chu chu December ni 24 ah min rawn chhang a, min chhanna sorkar thurawn a neih chu – “Indian Airforce nen hian draft agreement felfai tak neih phawt ni rawh se; Indian Airforce hnen atangin dil ni phawt rawh se”, tih kha kan dawn chhun a ni. A that lohna lemaw, eng emaw pakhatmah kan dawng bawkw lova, chumi ti tura hmalakna kal mek chu a ni a.

Hetianga politicized anih takah hian Pu Speaker, khawngaihin inhrilhfhahna atan hun tlem kan la deuh a. Thil, a nihna dik tak kan hriat theihna turin Mizo mipuite, Lengpui mipuite, NGO CC te, mi ka va demna ni lovin, mizo mipuite hian heresay (khawilai ti-ti) leh khawtlang ti ti kalphunga thutlukna kan siam a, boruaka mipui kan chhahih chi-ai thin hi titawp ila ka ti tak zet a. A chhan chu, August ni 31 ah committee in report kan thehluh a, August ni 4 (nili chhung) ah Indian National Congress Mizoram (MPCC) te an vigilance cell hovin press conference hmachhawnin, Airport Airforce kuta hlan an duh loh thu an rawn sawi ringawt a ni. Hlan tumna a awm tih pawh an hre lova, a boruaka an sawi atangin an hria a.

Chutiang bawkin, August ni 9-ah NGO Co-ordination Committee in resolution an rawn siam ringawt a, August ni 14 ah MNF Party - Publication Board-in press conference kovin, sorkar thil tih engmah la awm lova kha an duh loh thu mipui tihchiai nan an rawn tlangaupui ta vak mai a. Hetah hian hruaitu hrang hrangte pawh thurawn ka pe a, “sorkar document a ni a, report thehluh a ni tawh a. RTI-in dilin zir chiang hmasa ula”, tiin. Vawiinah hian CC Chairman te ngei pawh phone-in kan inhrilh tawh a ni. Amaherawhchu, vawiin ni thleng khan RTI-a rawn dil emaw, zir chian tum emaw pawh an awm lova. ‘An hlan dawn; an hralh dawn’ tia, Airport khu lak bo daih tur emaw, khatiang zawng khan mipui kan inzirtir ta vak mai a, a pawl ka ti hle mai a.

Pu Speaker, thil nihna tak tak kan hre duh a nih chuan, kan zir chhuahna atanga lang reng chu - kum tin revenue kan loss piah lamah hian capital investment mamawh tur kan ngaihtuah a, sorkarin cheng vaibelchhe 80, tun dinhmunah recarpeting atan a dah belh leh ringawt a ni. Tum thei dawn lo dinhmunah a ding a, khu Airport khu kan hmang tangkai thei dawn lo tak ngialin a lang a. ‘Lei te chu ba ang hmiang ..’ te min lo ti, lehlamah chuan an sawi hi a dikna chen te pawh a awm mai thei. Amaherawhchu, kum 20 chuang Airport kan neih tawh hnuah, kum 10 liam taa kan budget atanga 25% kha deficit grant, a hlawmin kan la dawng a ni.

Chuti khawpa budget surplus kan neih thin lai pawha an ngaihsak loh leh, engti kawng maha an enkawl tawh loh kha, tun dinhmuna kan budget vaibelchhe 15,000 chuang a nih tawh hnua *revenue deficit grant* kan neih hi vaibelchhe 580 chauh a ni tawh, kumin ah. A hun lai, Mizoram ina sum kan neih lai ber leh kan hausak lai ber pawha kan tih theih loh kha, khawi atangin nge maintain se min tih? ‘Central ah dil ni se’ tia PM-DevINE an dilna vaiin an hnawl dan zawng zawng hre chiangtu, central sorkar lai nena thawk dun pawhina kan dil chhuah theih tawh loh, ‘*mipui hnenah chuti chuan ti rawh se,*’ tih ang chi te kan sawi vak vak mai lai hian ngaihtuahna a tithui hlein ka hria a.

Zirchianna kan neih kawngah hian vawiin nia kan Airport – ‘runway parallel’ kan tih te pawh mipuia hian han sawi chian ka duh a. Kan sorkar hmasa a kum tawp lamah khan *concept-note* a lo siam ve a, vaibelchhe 500 man. Chu chu NESIDS_hnuai DoNER ah a lo zu dil ve ngei a, mahse hnawl a ni a. A chhan chu, *technical viability* study, ‘thlawhna a tum thei reng em’ tih a awm lova. Khatiang te avanga an rawn hnawl piah lamah khan, khatih laia pawimawh ber kan sawi duh chu Pu Speaker, (khawngaih takin rei lote) vaibelchhe 600 PM-DevINE-ah pawh allocation kan nei reng. Kan hnam rohlu kan airport heti khawpa kan ngaih pawimawh hi chawikang duh ni se, kha vaibelchhe 600 khan an ti thei reng. Mahse, kan ngaih pawimawhah vawikhat mah kan la telh ngai loh, State-normative allocation chhunga heti zat awmah hian kan tih ngai loh thil a ni.

Vawiin niah revenue deficit em em, sorkar sum indaih lovin austerity measures la a, sorkar tharin kan sum dinhmun siam tha tura a hmalakna kawngah hian, vawiin nia proposal kal mekah, join-users airfield kan neih chuan mipuite tan a hlawk zawk ni lovin, tuna Airport apron helam pang zawngte, Mizoram sorkar ta a la ni dawn; tu ta mah a ni dawn lo (**Speaker:** Minute 17 a kawt tawh a...)

Aw le, Pu Speaker, ka han titawp dawn hnai ang a. Tawitea han sawi lan hram ka duh, kan thil tiha kan chian ngai em em chu - engvangin nge vawiinni thlenga khatiang sum leh pai mamawh hre reng chung sia kan tih loh? Vawiinniah kan airport khuti ve reng-ruang, ‘kan ta; kan hmangaih’ kan tihah khuan Air Ambulance rawn tum thei pawh ni rawh sek sek; (Kan hre chiang tiraw), Ambulance pawh a tlan lut thei lo a ni, vawiin niah kan Airport-ah khuan. Chutiang dinhmunah chuan kan Airport khu kan chhuah a. A thawktute zingah lah permanent employee pakhat mah an awm baw lova. Wing Commander - kan Principal Consultant phei chuan “*step-motherly treatment* hei leh chen min pe a ni,” tiin mipui hmaah thu a sawi a nih kha. Heti khawpa kan hmangaih leh kan hnam-rohlu *step-motherly treatment* pea kan lo enkawl kha vawiinniah he sorkar tharah hi chuan, join-users airfield ah chhuah ta ila; a revenue vawiin niah vaibelchhe 14-15 kan beisei hi sorkarin a la chang vek tho si ang a; heng zawng zawng tichangtlungin zofate tan, zoram tan, he hnam tan, changkang zawk leh changtlung zawk airport a neih theihna turin eng vangin nge kan hnam himna atan agreement hi kan ziahpui theih loh ang? India ramah 60 chuang the meuh mai join-users airfield operation a awm.

Vawiinniah kan opposition memberte zinga lar tak pakhat pawh hi, (ka’n sawi tlang ang e.) Indian Civil Aviation-a pilot kan neih senior berte pahnih hi chuan a that zia hliir a la sawi a ni; kan hre chiangin ka ring. Joint-user airfield a harsatna an tawh loh dan an sawi pawh hi an la sawi deuh deuh dawn. Media kan play dan a dik lova, vawiinniah mipuite kan hrilh dan a dik lova, ‘*hralh dawn; hlan dawn*’ tiin; la bo daih dawna kan ngaihna hi, hei aia changtlung zawk hian he sorkar hian khu airport khu buatsaih a tum zawk a ni. Kan sum

sen tlem zawk si, hlawh chhuak tam zawk bawk sia mihring chuanna chauh nilo, kan thlai tharchhuah te pawh thawnchhuah theihna tura tangkai zawka hman theihna turin Indian Airforce nen tunah hian *agreement* kalpui mek a ni.

Hetiang khawpa Indian Airforce kan duh loh lai hian Pu Speaker, MPCC an sorkar khan kum 2012 ah khan Airfield sir hmun hnihah khan *blast-pens* tur vawiinnia ‘development daltu ber’ an tiha kha acre 32.6 teh meuh mai, kum 50 atan (kum khata cheng 1/- chauhin an hralh a ni. A hralhtu chu tunge? Indian National Congress Mizoram te an ni. Acre 32 chuanga zau kan airfield chhungah khuan kum 50 atan cheng 1/- in kan hralh duh a ni. An cancel reng reng lo ania; a lehkha a la awm vek a ni. Kum 2019 ah heti khawpa Lengpui mipuite hnenah ‘Airforce an rawn awm chuan...’ tia tihthaihtute hian kum 2019 ah acre 144 a zau Lengpui mipuite ngheng turin; vawiinnia proposal pawh ni lo mipui behchhanin acre 144 a zau, cheng vaibelchhia 248/- a lei turin *No Objection Certificate* party te hian an lo pe fel tawh a ni. Kha kha kan ngaihtuah tel em? Eng hi nge kan hlauh bera, eng hian nge mipui hi daw-at kan tum? He ram siamthatna tur a nih chuan chan chin a awm ang a, hlawk chin pawh a awm ang. Zir chiang hmasa ang u.

Vawiin nia kan Opposition party he resolution rawn puluttute hian, kan duh tak zet a nih chuan he report leh committee kalphung hi zir chiang hmasa sela. Sorkar inhawng em em a nei a, tlangkam ti-ti ringawt ni lo, a zirchianna atangin he kan airport enkawl zui dan tura hmalakna vawiinniaa kal mekah hian; *draft-memorandum of agreement* lo ti thain working committee hian lo submit pawh ni ila, a thuneitu, a hmala tur chu Council of Ministers te an la ni chauh a ni. Chumi hma chuan legal vetting; Zofate himna lo chuan kan siam lo ang. Khu airport khu keini chuan hlan kan duh lo; AAI kuta pek kha kan duh lo, a thlawnin. He Bengal Eastern Frontier Regulation in min humhalhna te, India Inner Line Regulation in min humhalhna te thiat veka, permanent ownership AAI kuta pe tura min nawrtute hi Mizo mipui hmaah insawifiah ve se ka duh a ni. An phal reng em chu chu? Ngaihtuahna tam tak a awm thei awm e.

Amaherawhchu, vawiinniah hetiang teh meuha resolution a rawn luh takah chuan, hun a chep hle nachungin khang te kha ka rawn sawi theih tawk ni sela. Vawiinnia kan private resolution a hi kei chuan pawm emaw, pawm loh emaw lam ni loin, thu awm lo a nih miau avangin hnawl tlak niin ka ngai a ni.

SPEAKER : A lawmawm e. Pu Rohmingliana; chumi zawhah Pu Laltea, Pu Ginzalala te kan sawm leh dawn nia.

PU R. ROHMINGLIANA: Pu Speaker, ka lawm e. Pu Speaker ka hma chiah ah khan minute 20 chuang daih a hmang mai a. (**Speaker:** A ni kha hei, kan Opp. Leader hian min support thovin ka hria a. Ani kha working chairman a ni a, Lengpui Airport ah khan. Khami anih vang khan kan han ti deuh hlek a nih kha. Hrethiam ang; request a nih kha.)

Pu Speaker, thui deuh sawi tur ka neih rualin, ka hmaa thusawi atang khan thui tak sawi ngaiin ka hre lem lova. He Private Resolution, “*Mizoram sorkarin Lengpui Airport Indian Airforce kuta hlan/ hralh tumna awma hmalak awm mek hi a tha kan ti lova, tihawp ni rawh se*” tih laia hi ka rawn thlawp a; ka hmaa thusawitu pawh khan a thlawpin ka hria a. He Resolution hi ni 13 ah khan kan pawt chhuak fuh hlauh mai a, a lawmawm khawp mai a. Tichuan, thawhtan hmasa ber (ni 17) ah khan Pu Speaker, ZPM party office a thusawitu,

Adviser to CM pakhat khan hemi kan pawh chhuah kar chiah ah khan (Pu Speaker, i phalnain) hei, *Vanglaini* chanchinbu zahawm takah pawh, “*Lengpui Airport hi Indian Airforce kutah hralh kan tum lo e*” tih a sawi ngeia kha rawn ziah lan a ni.

Tichuan “he airport hi hralh kan duhlo tlang a nih si chuan..” tih kha ka rilru ah a rawn lian a. Chutiang a nih theih dawn chuan sawi vak pawh a ngaiin ka hre lova; sawi dawn ila sawi tur a tam em em lawi si a. Chuvang chuan vawiina kan resolution hi ka thlawp a. Pu Speaker I ding lama thusawi tute pawh khan hralh an remtih loh chuan thlawp ve mai sela, ; ‘he resolution hi i pass mai ang u hmiang’ tih kha, Pu Speaker ka rawn sawi hmasak duh a ni.

Pu Speaker, hemi kan sawi rual hian thil han sawi ve lawk ngaiin ka in hria a. 12th Dec, 1998 ah he kan airport, kan ram rohlu hi hawn a ni a. He kan airport neih theihna tur hian kan ram hruaitu hmasate he airport atana theih tawp chhuahtute hi vawiinni ah hian lam chhuah ngei ngei thain ka hria a, an hmingin kan lam zo seng dawn si lova. Khang kan hruaitu hmasa, airport kan neih theihna tur atana hma latute zawng zawng chungah he House kaltlang hian Pu Speaker, thinlung takin lawmthu ka sawi a, vawiin ah hian ka fak bawk a ni.

Tin, Pu Speaker, airport kan sawi hian sum kan hloh nasat zia sawi tel a awm fo mai a, hei hi ‘eng term-in nge kan teh’ tih laia hi sawichian a tulin ka hria a; ‘eng ang chiahin nge kan hloh, he airport ah hian’ tih lai te pawh hi. 1st April, 2024 – 31st Jan, 2025 (kumin) inkar ka chhut vena leh source rintlak nia ka hriat atanga han tih ve hian, Lengpui Airport atanga kan sum hmanral zawng zawng hi crore 5.41 a ni. Heti chhunga kan lakluh zawng zawng hi crore 13.47 a ni. Chuvang chuan, kan hloh lo a ni, hetah hian. Lengpui Airport ah khuan thlawk chhuak turte ticket pakhat manah ₹973.5/- Mizoram sawrkar ah hian a lut zel a ni, Aviation Security Fee (ASF) ah ₹200/- sorkarin kan dawng a, User Development Fee (UDF) ah khuan ₹625/- kan dawng bawk a, a belhkhawm chu ₹825/- a ni. Chuta tanga GST 18% chu ₹148.50 a ni a, a belhkhawm chu sorkarah a lut a. Ticket pakhat kan lakin ₹973.50 Mizoram sorkarin kan la a ni. Chuvangin, helai kan sum hman zawng zawng belhkhawm crore 5.41 a nih laiin, kan lakluh hi crore 13.47 a ni, a sum ringawt chhutin.

Amaherawhchu, tam takin police 67 te hlawh leh anmahni enkawlina kha kan chhut tel sak tlat thin a. Tin, CRPF te hlawh leh anmahni enkawlina kan chhut sak bawk a, chu chu crore 4.49 vel a ni, kum khatah. Khatiang kan chhut tel chuan, ‘loss’ kan tih zel ka ring. Pu Speaker, kan Chief Minister zahawm tak hlawh zatah hian CMO office te, inlam te, police duty hlawh te, CRPF duty hlawh te kan chhut sak ngai lo a ni. Khatiang zawnga kan chhut chuan, kan loss fo in ka ring; kan chhut dan a inan loh chuan. Chuvang chuan, kan chhutna chi hrang hrang hi kan enthiam tulin ka hria a.

Hei, Mizoram zirna kan neih sang ber MZU-a mite khuan - ‘Lengpui Airport ah hian kan loss nge, kan hlep’ tih laia hi sociological studies nei ta sela, ‘kan hlep’ an tih ka ring a ni. Amaherawhchu, runway repair te a lo ngai ve thin a, khung a building 1998-a zawh tawh te kha repair te a lo ngai ve ang chu. Khang zawng zawng kha kan telh zel a nih chuan, ‘loss’ tiin kan sawi thei ngawtin ka ring.

Ka hriatsual loh chuan tun hnai 5th February, 2025 khan crore 80 kan sorkar hian Lengpui Airport-runway thuamthat nan a sanction niin ka hria a. Hetiang a nih pheih chuan engatinge ‘*hralh tum; hralh tum lo*’ tih velah kan la buai kan la buai? He crore 80 hian tuna kan Lengpui Airport-runway pavement classification no. 35 vela khu 50+ ah kan kai theih ka ring a.

chutianga a niha, 50+ a PCN kan kai theih chuan, engnge maw helaiah hian kan hlauhthawn viau lem le? A building ni se, thum that mek a niin ka hria a.

Chuvang chuan, tun dinhmunah chuan hralh tumna awm anga lo lang te pawh hi, *'kan tum lo e'* tiin he Resolution hi pass ta mai ila. Opposition Party ten mipui fuih khawlo ang ziazanga kan sawi fo hi dik lovin ka hre bawk a. Hmanni lawkah MNF Legislature Party ten Lengpui Airport kan zuk tlawh a, a hnuah chuan Joint Action Committee ho kan tlawh leh a. Kamrula, sorkarin a rawn hruailuh ve tum khan; kha kha kan hruai ni lovin, sorkar lamin a rawn ken tel a ni; official-ah pawh an dah kha, thlalak en pawhin. Khami Lengpui khua Joint Committee te kan zuk kawm tum khan, sorkar lam hotu lian tak takte an zuk kala an lo sawi chu - "Hei hi Indian Airforce kuta kan hlan chuan damdawi-in thate in nei ang a, helaiah hian eng eng emaw facilities tha, school te in nei ang a" tiin an lo thlem niawm tak a ni, an sawi danin. Khatianga inthlem a awm a nih chuan, "hralh tumna a awm a ni" tih kha mipuiah chuan a ri lo theilo a ni.

Tin, Mizoram-a kan NGO liante pawhin an hria a, heti khawpin an dodal tawh a, chumi karah Mizoram tana theihtawp chhuahtu intelkhawm Lengpui Airport FORUM din te pawhin an duhlo a ni a. A thatlohna hi vawiinah hian sawi dawn ila sawi tur ka ngah khawp mai a, helaiah pawh hian ka ziaik teuh mai. Chuvang chuan, Pu Speaker, hralh tumna hi chu a awm a ni. Mahse, engatinge he resolution, ni 13-ah pawh chhuah kha ni 17-ah ZPM office-ah 'hralh kan tumlo' tih sawi a awm leh tak? Engahnge chanchinbu ah te a rawn chhuah leh tak; engavngin nge vawiinah pawh helaiah sawi a awm leh tak? Kha kha anih si chuan, a hma daih khan youtube inkawmna te khan mipui hmaah kan puan mai loh, kha kha hralh tumna a awm loh chuan? Mipui hmaah *'hralh tumna a awm lo e'* ti ila, tua te pawh kan hlim tlang ni mai tur. Chuvang chuan, vawiinah hian hralh tumna hi a awmlo tak tak anih chuan, he resolution hi min pass pui sela, min thlawp sak sela, kei pawhin ka thlawp a. A move-tu hi kan zavaiin thlawp ila, i pass mai ang u. Pu Speaker, ka lawm e.

SPEAKER : Member zahawm tak Pu H. Ginzalala kan sawm ang a, chumi zawhah Opp. Leader kan sawm leh ang a, a zawhah House Leader kan sawm dawn nia. Member zahawm tak Pu H. Ginzalala ilo sawm ang.

PU H. GINZALALA: Pu Speaker, resolution mak tak mai a lo lut a, *'thu mak ka sawi nin theih loh'* tih mai te pawh a chakawmin ka hria a. Sawi pawh thiam a har a, sorkarin thu tlukna a siam hmain resolution khan a rawn luh khalh a ni a, a pawi khawp mai a. A awmzia ber nia ka hriat chu – chhungkaw-pa berin kawmthlang ram hman tangkai dan tur – 'vawkin sak nan nge ka hman ang a..', ti tein a ngaihtuah tan dek dek a, kawmchhak-pa in a complaint ang deuh kha niin ka hre ber a.

Vawiina Resolution hi a lo luh pawh khan ka ti a, sawi tur hi a awmlo a ni. Sorkarin thutlukna (decision) emaw, commitment emaw ala siam lo reng reng. Amaherawhchu, resolution a lo luh takah chuan public domain ah sawi nasat a lo nih tak avangin, 'sawi chu a tha e' tiin keimah ngei pawhin ngaihtuahna ka nei ta a ni.

Resolution chungchanga thil awmzia dik tak nia ka hriat chu, (uluk takin he House Member-te hian min lo ngaihthlak sak ula) - He Resolution hi *misconception*, bul leh bal neilo a ni. *Misconception* awmzia chu (dictionary lamah te ka han thlir deuh a) – *'opinions that based on faulty understanding'* tih a ni; *kan thil hriatsual based-a opinion siam* a ni

ta a nih chu. He House zahawm taka puluttu khan min lo hrethiam sela, sawi tlak chiah pawh a la ni lovin ka hria, faulty understanding avanga ngaihdan awm mai mai a ni. Faulty understanding avanga opinion nei mite ka ngaihtuah chang chuan pharisaite hi ka ngaihtuahnaah a lo lut a. Heng pharisaite pawh thu tak hrihl thin mah ila an hrethiam tawh lo reng reng; an pawm duh tawhlo a ni. Hetiang te pawh hi kan ni lek lek em aw ka ti deuh a ni. Chuvangin, misconception-a inngat a nih zia chu, kan tawnga lar ber chu, ‘*hralh*’ tih te, ‘*hlan*’ tih te, ‘*pe*’ tih te a ni a, hralh ni turin khawiah nge sorkarin decision a siam? Sorkar atangin engmah decision siam a la awm lo.

Amaherawhchu, ‘zir tan dawn ta ila’ tiin theihtawp an chhuah a, in hre vek a. Kum khat leka upa kan ni a, a *word* leh a *term*-ah te kan sawi soal nawk nawk ve ang chu. ‘*Outsource*’ tih te chu lo hmang ila chuan inhrethiam deuh ang a, decision siam hma te chuan ‘*outsource*’ aiin ‘*hralh*’ tih te pawh kan lo hmang pawlh nawk nawk a ni maithei, inzir tan chauh kan ni a, engkim mai hi kan thiam tan chauh a. Member zahawm tak Pu Muanpuia phei chuan, ‘traffic police min salute hi kan chhang thiam tan dawn chauh a ni’ a ti a ni. Chutiang vel chu kan la ni rih a, kum khat chauh kan la ni. Chuvangin, a *word* kan lo sawi soal te kha thu tak khukin in lo khuk pui ve bawk a, a zialo khawp mai.

Tin, leh lamah chuan, ‘outsource’ tih tawngkam te lo hmang ila chuan in hrethiam zaih maithei a, tute emaw hnenah ‘he hna hi lo thawk teh; lo in hlawh teh’ tih khan an duh miah lova, ‘he hna hi lo contract teh’ tih chuan an duh leh em em ang deuh hi a ni a, a *word* mai mai kha kan buaina a ni a. Outsource theih dan zir te hi a sualna chu a awm reng reng lo. I zir zel teh ang u, i kal zel teh ang u. Dik taka sawi chuan he kan airport hi ‘*white elephant*’ a ni, zep lovah chuan. Eng sorkar mah hian an enkawl tak tak thei lova, kan future a ni hrim hrim. Vawiinah hian ‘outsource kan phal lo; chuti khati’ kan ti bur bur a nih phei chuan, generation lo kal turte chuan min la nuih sawh maithei a ni. Kan duh emaw, duh lo emaw outsource hi kan la tih tho tho a ngai dawn a ni. Sorkar te ber kan ni a, tihdan dang a awm chuang lo; kan future chu a ni ringawt mai a ni.

Tin, ka duhdanah phei chuan, kan hotute bulah, ‘airport mai ni lo, thil dangte pawh hi i out-source teh ang u’ ka ti a ni, tunah hian *aviation sector*-ah zirbingna kan han nei tan a. Amaherawhchu, sector dang dang - *education sector* ah te pawh kan inzira, out-sourcing policy kan neih chhoh zel a ngai. Tin, *energy* chungchangah te pawh kan out-source zel a ngai; *public utility* ah te pawh out-source hi kan kalpui zel a ngai a ni. *Entirnan*: Energy sector pawh keima ngaihdan chuan, P & E Department te pawh hi nakinah chuan kan privatize a ngai dawn a ni; corporatised a ngai dawn a ni. Central sorkar pawhin min la impose dawn hrim hrim a ni, nakin ah. Helai ah hian energy bill te pawh a lo tlawm deuh a nih pawhin, a tlawm theihna turin sorkarin a subsidised a cheng maktaduai a seng tho tho. Helam, a lang lang lampang kha kan hria a, a lang lo lampang hi kan hre lo tlat. He House zahawmtak hian hei hi kan hriat a ngai a ni. A lang chin chauh hi kan ngaihtuah tur a ni lova, a lang lo lampangah pawh kan ngaihtuahna kan sen a ngai a ni.

Mita hmutu, Thoma te kha vannei kan ti mai thei. Mahse, kan Lal Isua chuan, “*hmu lova ring apiangte chu an vannei*” a ti zawk a ni. Mita hmuh theih, kuta khawih theih ringawtah hian kan buai tur a ni lova, a langlo phenah hian he House hi kan buai a ngai tawh a ni. Chuvangin, energy sector lam te kan out-source a ngai ang. Education lam te pawh hi, tih tak takah chuan a hautak a ni. Kan buget zawng zawng, kan resource zawng zawng kal ralna chu *education* ah hian a ni tlat a ni. Sorkar-hnathawk zirtirtu hlawh hi thla khatah

nuai chuang te a ni a. Amaherawhchu, private anga an hlawh chu ₹15,000/- te, 20,000/- te a ni. Sorkar-hnathawk zirtirtu hian a thlakhat hlawh hian private sector ah mi 5 aia tlemlo a ruai thei a ni. Chuvangin, zirna lamah pawh hian *privatization policy* hi kan kalpui loh chuan, kan ding chhuak lovang. Zirna *quality* te pawh a tha dawn lo. Manipur kan unaute zirna a thatna em em chhan chu - private college, private school vek a ni. Chuvangin, kan future hi outsource ah a innghat a ni. Chuvangin, ‘*i zam lovang u, i kal zel ang u*’ tih hi ka ngaihndan a ni.

Aviation sector ah airport te pawh privatise hun kan neih a ngai dawnin ka hria. Ngaihtuahna zau tak lo pu teh u. Khalam atanga thlir lovin, helam atang hian han thlir ve teh u. Rawn phei dial ula, helam atang hian thil i thlir teh ang u; in thlirna tlang hi a diklo a ni. Chuvangin, kan future hi kan ngaihtuah tlan a ngai hle a ni. Airport chungchang han sawi phei hi chuan, Sipaite rilru ah an lo lang a. *Sipai* hi kan hlau deuh hrim hrim em aw, ka ti; *Sipai hlauhna thlarau* hian min man deuh nge ka hre lova. Chuvangin, Sipai hi kan hlau tur a ni tawh lo reng reng. Pu Papua’n, ‘Mizoram House hralh tawp anga hralh tur a ni lo a ni’ a tih te kha a dik khawp mai. Kha kha sorkar thinlung pawh a ni lem lo a ni.

Awle, Pu Speaker, chu chu ka sawi theih tawh ni sela. He Resolution hi ngaihtuah chian poh leh ‘ngaihtuah tur hi a lo awm lem lo a ni’ tih hi kan sawi ve leh duh a ni. Ka lawm e.

SPEAKER : A lawmawm e. Tunah chuan, Opp. Leader zahawm tak Pu Lalchandama Ralte hi a lo chhuak rih a ni maw? Kan House Leader han sawi hmasak tir chu a dik chiah si lova. Hemi zawhah hian ka ko dawn em ni? Aw, a lo lut e. Tunah Opp. Leader i lo sawm ang.
(*Interruption.*)

PU LALRINTLUANGA SAILO: Pu Speaker, sawi duh kan awm lai chuan engah nge i tih tawp ang?

PU LALCHHANDAMA RALTE, LEADER OF OPPISITION: Pu Speaker, Congress Group atang te, BJP Group atang te pawhin an la phar a; khawngaihin, thusawi hun pek a tha lo maw aw? Pu Chhhanzova pawhin a phar a nia. Tukin zing khan nangmahin, “kan memberte’n an sawi duh chuan, hun pek ka duh” i tih avang khan kei pawhin zunram ka va thiar lawk a. Amaherawhchu, kan hotute Congress Legislature lam atang pawhin an phar malh malh a, ila koh ka’n ring deuh a ni.

SPEAKER : Congress leh BJP ten an phar lo. Tun maiah khan a ni. Pu Rintluanga chuan a phar. Nichin khan “Pu Laltea kan ko ang a, .. (**Pu Lalrintluanga Sailo:** Pu Laltea din hma khan ka phar tawh.) a dawtah Leader of Opposition, tichuan kan House Leader in a wind-up ang” ka ti a ni. Khami hnua phar chu heta tanga ruling kan pek tawh hnu anih ka ring; kha kha chu a stand tawh lo. Chuvangin, khawngaihin Leader of Opposition kan sawm ang. Ka hmulo che u a ni mai thei e. Wawi tam tak ka call a, vawikhat lai phei kha chu, ‘kan sawm tawh mai dawn em ni ang?’ ka ti a nih kha; kha hun kha a awm a ni. Leader of Opposition te phei chu a ding uau uau tawh a ni. Tichuan, a hnua kan sawichho zel a. Hun en ila – khi, dar 5:30 a pel tawh a ni; dar 4 a tawp tur kan ni. Tichuan, ‘Pu Laltea’n sawi se; Leader of Opposition sawm ila, chuan kan CM-in windup se’ tih khan ruling ka nei ta a ni. khami hnua, ‘kan phar, kan phar’ tih kha chu a pawmawm chiah tawh lo a ni.

PU LALRINSANGA RALTE: A danah chuan, dar 4 pawh ni se, member la sawi duh kan awm a nih chuan kan kaltlang thin mai kha a ni a. A darah buai lo ila, ram tana thil pawimawhah hi chuan. Helaiah an lo phar a, ilo en lo a nih chuan, patlingin House chhungah meuh, ‘ka phar’ an tih chuan, dawt an sawi lovang. Chuvang chuan, BJP Legislator party leader te, kan Congress te; tin, Pu Rintluanga pawh Pu Latea hmaah khan a phar a ni. Pu Latea hmaa phar hote kha chu sawitir phawt ta la, avan tha awm ve. Ram tan a pawimawh si a. I dinglamte’n sawi zui an hreh viau te a nih loh chuan sawitlang a tha ang.

(Speech not corrected.)

SPEAKER : Pu Laltea hmaah khan ka hmu lova; amaherawhchu, House ngaihndan engnge?

PU LALDUHOMA, CHIEF MINISTER: Kan practice dan tlangpuiah chuan, Speaker-ina “Leader of Opposition ka sawm tawh mai dawn em ni ang” a tih tawh hnua sawi duh kan lo la awm a nih chuan, “E.. kan la awm a lawm,” kan ti thin a ni. Mahse, vawihnih lai chance I pe a, an phar miah lo a ni. A hnua ruling i neih tawh hnua ‘ka phar, ka phar’ an ti leh a. Kha kha chu, nichina Speaker-in tih a tum lai khan lo sawirik awm tak a nia; ‘kan *after-thought* deuh em aw’ ka ti a. *Speaker ruling* thu kha kan zavaia kan zawm tur chu a ni mai a. Amaherawhchu, tun hma pawhin Leader of Opposition sawi tawh hnua pawh phar an awm thin a, Speaker hmasa te khan a’n hau thin a ni; hun pawh an pe tawh ngai lo. Khatianga *Chair* atanga rorelna a awm tawh hnua hi chuan kan zawm mai thin chu a ni a. Amaherawhchu, sawi zel kan tih chuan, a pawh pawh ka ti chuang lova keichuan. Chu chu Speaker thu thu a ni.

SPEAKER : Engpawhnise Pu Laltea... *(Interruption)*

PU LALCHHANDAMA RALTE, OPP. LEADER: Pu Speaker, rawtna kan siam mai ang a, I chair a zahawm a.

Ni e, hei keimahni lamah pawh kan lo insawi dan chuan, kan Dy. Leader Pu Roberta leh Pu Rintluanga te la sawi turin kan ti a. Mahse, i ruling a zahawm a, anni pawh ka rawn tawh lo nangin, sawi tawh lo mai se. Amaherawhchu, Congress leh BJP Legislator aiawhte’n sawi ve an duhna hi chu khawngaihni i la pek theih chuan, han pe hram la, keiin chumi hnua chuan sawi ta ila. Keini MNF legislature lam hi chu Leader ka nih angin an ai ka awh tawh mai ang e, i remtih chuan.

DR. K. BEICHHUA: Pu Speaker, he House ah hian i lal ber a, nangina ‘ka ti’ i tih chuan, i ti a ni mai; i tilo a nih, chuan i tilo a ni mai. Min hruai chinah hian i dam a, i tha a; memberte i zahder thiam a, a ropui ka ti. I thutlukna siam mai teh.

SPEAKER : Ka ngen duh che u chu - ka sawi mek lai kha kan chhunzawm lawk ang a. A hun laiin i awm teh ang u. Sawm tur kan nei tawh lova, ‘tunge sawi leh ang?’ ka ti a; hun rei tak kha kan inpe a ni. Khatah khan, ‘kan Leader of Opposition a awm a, kan sawm tawh mai dawn nia’ ka ti hman hial a ni. Khami hnua phar leh kha chu ‘ka hmu tawh lo e’ pawh ti ila, sawi tur a awm tawh lo a ni, ka ngaihndan chuan. Amarahchu le, tunah kan Leader of Opposition ngenna kha zahawm ka ti a. Congress leh BJP lam atang khan sawi duh kan neih chuan han sawi ila, chumi hnua chuan Leader of Opposition kan sawm tawh dawn nia.

PU C. NGUNLIANCHUNGA: Pu Speaker, ka lawm e. Kan tihpalh a ni, keimahniah. Kan lo phar ve kha kan lo inhmu lo palh a ni e. Keimahni thiam loh zawk a ni ang. Hei, Speaker hi kan lo hrawn ve nual tawh a, i zahawm a, membrete i ngaipawimawh thin a. I thu Chair atanga i puan tawh hnu pawhin membrete ngenna i pawm thin a, a lawmawm ka ti khawp mai.

Ni e, helaiah hian han sawi ve ka duh chu Pu Speaker, hethyl hi tunlainn youtube ah te a nasa em em a, kan ram, kan khawpui a nghawr takzet zet a, tun hunah hian. He thilah hian youtubers te interview kan lo thlir a; kan Chief Minister interview pawh kha vawihnih-vawithum ka lo ngaithla a. Helaiah Working Chairman Pu TBC-a party office-a a thusawi te youtube ah ka lo ngaithla ve a. Pu TBC-a khan ‘kan pe dawn lo; kan hralh dawn lo’ a ti a. Kan Chief Minister khan, ‘kan acquire tir ang a, kan hralh dawn a ni’ a tih kha, hei youtube ah en theihin a awm a, nizan thleng khan ka la ngaithla a. Hemi chungchangah hian an thu a inhmu lo deuh niin a lang a. Thil hre tak takin, a figure te nen lam an rawn sawi chhuak a, ngaihnam pawh ka ti a. Hemi kawngah hian ‘Congress Party in ram acre 32 an lo pe tawh a’ tih te; kha airport sirah an lo pek kha kum 2019-ah MNF sorakin (ti ang) hma an lak loh avangin, sorkar kal ta khan a cancel tawh a ni.

Eng pawh ni se, tuna Lengpui Airport-a a pawimawh lai ni lovin, a sirah an lo pe ni ngei tur a ni a; helama kan awm ve hma niin ka hria a, Pu Speaker. Engpawh lo ni se, thil kal tawh kha chu; hma an lo la lova, a lo hlawhtling lova, tun hun hi kan lo thleng ta a ni a. Tun hunah te pawh member thenkhat atangin ‘a hun lo; hei hi pek pawh a la awm lova’ tia pek tuma hmalakna a awm avangin, Mizoram mipuite rilru a chia a. Kan House Leader-in, ‘mipui-sorkar kan din dawn a ni’ tia a sawi thin angin, vawiin niah mipui-sorkar hian All NGOs coordination te, Lengpui Airport Forum - Lengpui khawtlang mipuite bakah political party - MNF te, Congress te, BJP te pawh a niang chu, kan zavai mai hian Indian Airforce hnena pek hi chu kan remti lo a ni. Chuvang chuan, vawiinnia he resolution lo lut zingah khan a tam ber a ni ringawt mai a.

Chuvang chuan, Pu Speaker, kan Chief Minister youtube-a interview te ka lo ngaithla ve a, *chepa leh vahrit* te kha a tehkhin a, khatih hunlai khan ka rilru ah *Rahtea thawnthu* kha a lo lang ve thung a ni. Rahtea nuhrawn kha a damlo der a, a pain inthawi nan sial te, vawk te a talh a, mahse a dam thei reng reng lo. Chutah chuan, ‘Rahtea thin leh lung ka ei loh chuan ka dam lovang’ a ti. Chu chu Rahtea’n a hria a, Thingsiri kungah a va awm a. Chutah chuan an va ko thin a, “*Rahte, Rahte lo haw rawh, I nu’n khuang a chawi dawn e, I pa’n sial a chhun dawn e*”, an ti a; a ropui khawp mai Khuangchawi kha. Mahse, “*Ka thin, ka lung in ei ai chuan, Thingsiri par ka tlan e, ka puar e ka fan e*”, a ti ve a ni. A awmzia chu - vawiinah hian Indian Airforce hnenah hian lo pe ta ila, vawiinnia kan sum leh pai dinhmun te, run-way siamthatna tur chungchangah te Air-bus te leh thildang, kan thlathar zawrhna tur te pawh a lo tha a ni thei e. Amaherawhchu, he Zoram kal zel mipuite tan hian a chep dawn a ni, tih a hria ten an sawi hi a pawmawm ka ti a.

Chuvang chuan, *chepa leh vahrit* thlan ngawt ai chuan, Rahtea’n a thin leh a lung safe nana a tlan bo ang khan, vawiinnia Indian Airforce hnena pek kan tum laia hi ‘Zoram mipuite tan a him lo a ni ang a’ tih hi interview hrang hrang kan lo en ve atang leh a hriate sawi atangin a lang Chiangin ka hria. Tuna sorkar lam te pawh Lengpui lamah te zu kalin, inkawmna te pawh an zuk nei a, All NGOs Co-ordination Committee te nen pawh inkawmna an nei a. Amaherawhchu, vawiinni thlengin an la convince lo niin a lang tlat a ni. Kan ram tana tha

tur a nih chuan duh mai awm tak; Zoram tana tha tur, Zoram a lo changkana hma a lo sawn zelna tur a nih chuan duh mai awm tak hi, engatinge an duhlo tlat? Engatinge hlauhthawn an neih tlat? Chulai zawka chu ngaihtuah ila. Vawiiinnia ‘mipui-sorkar kan din dawn a ni’ tih hian, mipui-aw hi ngaithla se, tih hi ka sawi duh a ni. Kan kal chhohna turah a that tur zia te, member thenkhat atangin pek a nih loh tur te, insem a nih tur thu te kan ngaithla a. Hralh a nih tawh chuan, neitu nihna kan nei ngai dawn tawh lo.

Tin, Indian Air Force hnenah hian lo pe ta ila, sum leh pai tam tak chu min lo pe ang, mahse kha sum leh pai avang khan kan chanvo, kan thuneihna, kan ownership kan hlauh si chuan enge sawt chuang ang? ‘Sum leh pai kan inseng nasa’ kan ti a, a dikna chin pawh a awm ang; kan House Leader interview-ah pawh khan, “amaha revenue lo lut hrim hrimah hi chuan hlep kan nei ve deuh. Amaherawhchu, capital expenditure ngaihtuah hian kan loss nasa a ni” ti a ni.

MINECO building hmanni lawkah cheng tam takin kan chei tha a, saw ta tang sawn revenue kan hmu let em? Kan mamawh a ni a, kan hmang mai a ni; sorkar tih ve tur a ni mai a ni. *Entirnan*: - chawhma lam question-ah pawh tui in tur pek chungchangah ‘Tlawng Lui san zawng nikumah 110 a ni a, , kumin ah erawh chuan chauh 85 chauh a ni tawh. Chumi tlahniam siamna tur chuan crore 30, tui in tur kan pekna tur a ni. Chutiang bawh chuan, school zirtirtute pawh nichinah an sawi a, kan ngaithla tawh. Tin, *privatisation* nen khan hei hi a inang lova, sawi pawlh chi a niin ka hre lo.

Vawiiinah hian sorkar chuan ram-mipuute tana thatna tur chu kan ti ve bawh dawn lawm ni? Kawngpui siam nan sum leh pai tam tak kan seng a, road tax tlem te bak kan hmu let lo. Khatiang khan sorkarin a ram mipuute kalna te chu a buaipui tur a ni dawn lawm ni, kan tih ve tur leh mipui tana tha turah chuan? Chu chu a lawm ‘*Sorkarpui*’ an lo tih thin. Ram mipuute tana tha tur ngaihtuahtu kha sorkar tha a ni. Eng emaw hleka hralh tum zel ringawt kha chu, kan inhralh zo mai ang.

ZMC te pawh kan House Leader-in chawhma lamah “Central atangin project lo kal hrim hrim pawh, a enkawl zuina a awm dawn loh chuan, kan ti dawn lo a ni”, a ti a, tun sorkarin a tilo a nih pawhin, a dik tho e. Polytechnic te leh building hrang hrang kan sa a, manpower a awm loh avangin building hlui hlawnin a awm a, a dikna chin pawh a awm e. Chutih rual chuan, kan ngaihtlak tak ang khan, Congress-in Lengpui Airport kan siama in buai luai luai hi chu a dik lo; lo tihral tum ringawt pawh kha a dik lo. “Sorkar hmasaina hmachhawp a neihte, a tha a nih chuan kan chhonzawm zel ang, an ti a, chhonzawm zel a ni” tih, tukin zinga Governor thusawia *Motion of Thanks* kan sawinaah pawh khan sawilan a ni a. FOCUS Agriculture hnuaia awm te kha Congress hunlai atanga hma lo lak tan daih tawh a ni. A kal zel a, tikhan a intahtawl chho zel a ni.

EMRS te pawh, ka bula thu BJP Member zahawmtak Dr. K. Beichhua, Siaha bialtu, khatih hun laia hma a lo lak tawhna kha vawiiinniah a par kan hmu mai a ni. Chuvang chuan, Pu Speaker, engpawh ni se la, “hralh kan tum lo ve” kan ti a nih chuan, engatinge kan pass mai loh? ‘Kan tum lo’ ti sia, thinlunga tum ru reng si hi Zoram tan a tha lo ang a! Kan fa, kan naute, thangthar lo kal tur atan hian a him lo ang a! Kan hma kar mai ah 16th Finance Commission an lo kal dawn, Aizawl tlangah. Hengah te hian Congress Party ang pawhin memorandum te pawh kan thehluat ve a, kan hotute’n an thehluat a, BJP leh MNF te pawhin an thehluat ang a, sorkarin ti bawh sela. Crore 1000 te chu min pe thei mai ang a; India

chuan pawisa a ngah alawm. Kan need-based, ram pumpuiina kan mamawh em em a nih avangin, tun hi hun remchang tak; wawiina resolution kan sawiho pawh hi a hun tak zawk a ni lawm ni? 16th Finance Commission lo kal turah kan sorkar pawhin a dil ka ring. Interview vela kan ngaihthlakah “crore 1000 a awm chuan, run-way tha tak crore 35-50 vela siam theih a ni ang” tih a ni a, (**Speaker:** A zo dawn tawh em?)

He Resolution hi a hun takah he House-ah hian a lo lut a, kan ram, kan hnam ngaihtuah ila, mipui-sorkar hian mipui lungdamna, hahtdamna, nakin kan hmalam hunah chuan hlan pawh mipuiin kan la duh zawk mai thei; chutih hunah chuan hlan mai ang. Tun hunah erawh chuan lobbying neiha va inhrilhfiaha, intihkual a la ngai a nih hi. Chuvangin, Pu Speaker, Pu K. Laldawngliana resolution, “Mizoram sorkarin Lengpui Airport, Indian Air Force kuta hlan/hralh tuma hma a lak mek hi tha kan ti lova, tihtawp ni rawh se” tih hi, ka support e. Ka lawm e.

SPEAKER : BJP sorkar atang khan Pu K. Hrahmo khan a sawi tawh a, Dr. K Beichhua hi sawi duh a neih chuan i lo sawm ang.

DR. K. BEICHHUA: Pu Speaker, memberte i hriatthiamna leh memberte privilege i ngaih pawimawhna hi, a hmasain lawmthu ka sawi a ni.

Vawiinniah hian he airport chungchang hi zoram-mipui ngaihven, ‘talk of the town’ a ni a. Heng atang hian airport pawimawh zia leh airport-a rilru kan sen nasat zia hi a langchiang hlein ka hria a. Tin, he *Private Member Resolution* hi a hun takah lo lutin ka hre bawka ni.

Working Committee-in ngaihdan mumal tak thehlutin, Council of Ministers-in lo pass ta hlauh mai se, a tlai daih dawn a ni. Chuvang chuan, Working Committee-ina Council of Ministers hnena report a thehluh hmaa a rawn pulut hi a tih tur dik tak leh a hun tak a niin ka hria. Pu Speaker, chutih lai chuan, a main point ber - Lengpui Airport hi IAF kuta hlan emaw, hralh emaw, a eng tawngkam pawh chu lo ni ta se, a chhan ber chu *sum harsat vang* tih a ni a, mak khawp mai. Tukinah kan member pakhat khan, “sum kan ngah, he sorkar hian; a tam lutuk, crore 600 kan nei” a ti a. Chutihlai chuan, “Airport khu re-surfacing a nih loh chuan, within 3 months-ah license pawh hi cancel lailawk theih a ni” tih a lo ri leh bawka nen; zoram-mipui kan mangang a ni; hlaulo thei kan nilo. Tunah hian crore 80 dah niin ka hria a, thla thum chung hian kan zo thei ang em aw. Licence min cancel lailawk sak ang tih te pawh a hlauhawm hlein ka hria a ni.

He thilah hian inhnialna tam tak a lo awm tawh a, mithiamte tawngkam leh an thlirdan pawh kan lo ngaihtla nual tawh a, zoram-mipui, thingtlanga mite pawh hian ngaihdan an nei vek tawh; wawiin-ah he House ah hian eng ang pawhin sawi ila. Kan working chairman rawn sawi *terms of reference* pakhatna-ah “To prepare draft memorandum with IAF” tih a ni a, draft memorandum kha hlan tum ni lo se, prepare a tul lo. Kha kha eng vanga prepare nge anih? Draft memorandum an siam ang a, a tha anih chuan, hlan tur kha a ni mai a. Khalaia ‘kan tum lo’ han tih leh hnahnawh kha hriatthiam a har a ni. A changin ‘pawisa kan nei’ kan ti a, a changin ‘kan neilo’ kan ti bawka si; a englai thu hi nge kan lak ang, Pu Speaker? Mipui tan phei chuan a luhaithlak a ni. Dik tak chuan, kan hruai mipuite an mangang a ni.

Chuvang chuan, vawiina kan resolution hi member tam takin an lo sawi tawh a, he House-a kan sawi hma pawhin Youtube-a kan mithiamte interview leh debate-a an sawi te kha kan lo ngaithla nasa lutuk tawh; zoram-mipui a hre lo an awm mang tawh lo. Kan chairman ngei pawh khan decision siamna turah khan “Emotion of local populace” a ti nghe nghe a nih kha. Chutiang a nih chuan, vawiina zoram mipui hian kan airport IAF kuta hlan an duhloh zia chu chiang takin social media leh print media bakah khawtang ti-ti ah pawh a chiang thawkhatin ka hria.

Chuvang chuan, he resolution hi, “kan tum lo; kan ti dawn lo” ti ti lo hian, House-ah hian i pawm tlang mai ang u. Thu tam sawi pawh tulin ka hre lova, Pu Speaker, hun kha kan ui ang reng si a. Tuna ka rawn sawi khan a tichiang viauin ka hria. A hun tak a ni. Tun aia kan tih tlai chuan, an lo tih hman palh te a hlauhawm a ni.

Pu Speaker thil pakhat kan sawi leh lawk ka duh a. He Private Member Resolution hi a zahawm a, Treasury Bench lam atanga tein ‘heng te hi engnge rawn put luh ngai’ tih tawngkam ang te kha, nidangah chuan kan ti tur niin ka hre lo. Chuvang chuan, “*Mizoram sorkarin Lengpui Airport Indian Airforce kuta hlan/hralh tuma hma a lak mek hi tha ka ti lova, tih tawp ni rawh se*” tih hi a hun taka a rawn thehluh hi vanneihthlak ka ti a, “I pawm ang u” tih hi ka rawtna a ni. Pu Speaker, ka lawm e.

SPEAKER : A lawmawm e. Tunah chuan, Leader of Opposition kan sawm thei tawh ang em? Kan Leader, kan senior-te pahnih, ka hmazawn chiaha thute pahnih hi an senior viau tawh mai a, an kum pawh a tlem tawh lova. Chance kan inpek lai khan pharna chang hre tawh sela a lawmawm khawp ang aw. Aw le, Leader of Opposition ilo sawm ang.

PU LALCHHANDAMA RALTE, OPP. LEADER: Pu Speaker, ka lawm e. A hmasaah chuan lawmthu - House-ah kan han inhnial a, thusawi chungchangah te, a hminga Opp. Leader ka nih anga rawtna ka siam – ‘kan Group Leader-te tal hi chu thusawina hun pek ni se’ tia ka ngenna tlawm tak ilo pawma thusawina hun tha tak inpek leh, House boruak nuam tak i kaihhruaina hnuaiah kan han nei leh thei hi lawmawm ka ti a, a hmasain lawmthu i chungah kan sawi a ni.

Tuirial bialtu MLA zahawm tak Pu K. Laldawngliana Resolution “*Mizoram sorkarin Lengpui Airport Indian Airforce kuta hlan/hralh a tum hi tha ka ti lova, tihtawp ni rawh se*” tih a rawn pulut hi a hun hle mai tih ka ngaihtuah a. Vawiinah khan i ding lama thute khan an han sawi thin a, a buk thelha thelh, a concept thelh khan an han sawi thin a. Amaherawhchu, i ding lama thute hian an ngaihtuahna an hman nawn atana ka duh leh, Sorkar Cabinet kal ta ina ruahmanna a neihte kha an hriat loh vang a nih ka ring a. ZPM Sorkar a lo piana cabinet meeting neih hmasak ber Ni 13.12.2023-ah khan cabinet agenda no.16 ah chuan, (Pu Speaker i remtihain) - “Handing over Lengpui Airport to Airport Authority of India” tiin leh, “The Government may take step for handing over of Lengpui Airport to Airport Authority of India” tiin, AAI hnena pek turin cabinet-in a rel a. Chumi bawhzui tur chuan Working Committee a din a, chu Working Committee chuan an ngaihtuah an ngaihtuah a. Nichina Chairman sawi ang khan, August ni 30-ah ti tura a tih ni miah lo AAI-te nena thawh ho dan tur te.

Amaherawhchu, nichinah khan point hrang hrang a sawi a, (khawi emaw clause-ah chuan

a remchang a ni awm e.) A tawpah khan Indian Airforce te nena thawh ho a rawn rawt ta daih mai a. Chu thu chu a lo kal a, October ni 16, 2024 (dar 2:00)-ah Cabinet room-a Council of Ministers-te thukhawm chuan - (Pu Speaker, i remtihna in chu report chu chhiar leh ka duh a) “Report of the Working Committee to look into the maintenance and management of Lengpui Airport” tiha an decision ah chuan, ‘The report of the Working Committee to look into the management and maintenance of Lengpui Airport was deliberate by Council of Ministers. It was decided that the feasibility of handing over of Lengpui Airport to Indian Airforce may be further explore by the Working Committee. Draft MoU work out with Indian Airforce may be placed before the Council of Ministers for further consideration. The feasibility of handing over to AAI may no longer be explore.” Tih a ni. Ni 13 December-a pass, chumi kalh chuan thu a rawn thehltut a; a zirchiang a, AAI hnena pek kha chu a titawp a. A thuneihna pek piah lama a rawn rawtna “handing over Lengpui Airport to Indian Airforce” tiha Airforce hnena pekna/hlanna tur rawn zirchiang turin leh, chumi tana tul workout-a MoU rawn draft turin a pe tlat tawh a ni. Working Committee Chairman-in a rawn sawi “anmahni pek tawp tur a ni lo; joint venture-a enkawl tura ruahmanna thehltut anni” a tih kha chu, a rawn sawi lawkah ngai ta ila, nakinah ala chiang tura ka ngai a.

Vawiinniah engvangin nge *talk of the town* a niha, engatinge Mizo mipuiten kan ngaih pawimawh tak viaua, social site zawng zawngah kan ram leh hnam tana kan thawhpui kan NGOs te, political party te zawng zawngin kan rikpui tak luai luai? Lengpui Airport hi Mizoram rohlu kan neih, kan hruaitu hmasa khawvela awm ta lo Brig T. Sailoa leh Pu Laldenga ten nasa taka hma an lo lakna, Pu Lal Thanhawla leh pu Zoramthanga pawhin an hunlaia nasa taka hma a lo lakna, kum 25 chhung sorkarin tluk leh tlak fawma *kan ram mamawh a ni* tih hriaa an lo enkawl chhoh tawh kha vawiinni ah par a chhuang ve tan mek a, India ram airport ah pawh hmasawn chak, flight pawh tam zawk, amah pawh thil tam takah intodelh chhoa a awm mek laia, hralh/midang kuta pe tura thutlukna a awm avang hian, chumi kaihhnawihah chuan rilru a na a, mizo-mipuite kan rum a, kan sahaw lo thei lo a ni.

Kawng hrang hrangah inhnialna a awm a. A nihna takah chuan kan thahnemngaihna avang te a ni ang a. Hei, kan House Leader ber hi pa-frank tak a ni a, thil hi zep lutuk lovin an sawi mai thin a. Chutah chuan, Working Chairman leh kan member dangte in sawi khan, kan House Leader-ah hian *no-confidence* in move tluk a ni. A chhan chu, mi zawng zawngin kan hmu a lawm; kan House Leader leh kan journalist senior an inkawm a, social media leh youtube ah te kan hmu a. Pu Speaker, i phalna in tawite ka’n chhiar lawk ang e. Kan House Leader thusawi mi zawng zawngin kan hmuh chu – “Lengpui Airport ram khu kan insem dawn a ni, Indian Airforce te nen. A runway atanga a leh lam zawng, (terminal building ni lo, a ramhnuai lam zawng) khu an chang ang, chu chu a man kan chhutchhuak ang a, an lei ang. An leina man ringawt pawh chu kan thlahlel ve a ni” a ti a ni.

Chu chu a ni kan buaina bul zawk chu. Chutianga mi kan lei tir chuan, *kan hralh* tihna a ni ang chu maw le. Kan State-pa berin a sawi miao a, ‘ka sawi lo’ tih chi a ni lo. Hmana thil a sawi tawh, “ka sawi lo” a tih anga sawi chi kha a ni tawh lo, tunlaiah hi chuan. Lengpui Airport hi Mizote tan a hlu a, kan ram rohlu a ni a. “E khai, Indian Airforce hnena pek hi zawng a tha lo e” kan titlang a, a that lohna tam tak kan sawi a, sawi thui a ngai tawh lo a ni.

Pahnihah chuan, kan thlang lawka Silchar Airport te, Kumbhirgram Airport te, Jorhat

airport te North East-a kan hmuh theih Airforce enkawl, 1944 Indopui II-na bawr chhoa tawh leh Mizoram Lengpui Airport aia kum 54 zeta upa tawh te an than loh zia khu; Airforce enkawl an ni. Anni aia kum 54 a naupangin a lehpel tan tawhte an ni. Anni chuan defence - ram venhimna lam chauh an ngaihtuah a.

Pu Speaker, sorkar hmasaa a lo ngaihtuah tawhna te nichin khan kan hotu thenkhatte khan an sawi a; amaherawhchu, an han sawi sawp deuh a. MNF ministry Pu Zoramthanga'n a kaihhruai lai khan Lengpui Airport tihchangtlunna tur ruahmanna a siam a. August 2023 khan '*Construction of parallel runway at Lengpui Airport*' tih te lo ruahmanin, he ruahmanna hi Planning Department kaltlangin Central Sorkarah thehluh a ni a. Kan House Leader interview ah pawh, amah ngei pawhin he ruahmanna hi a lo hre lova crore 500 zet parallel runway siamna tura tiha kha. Tuna sorkarin a ruahmanna, kan runway piahlam ram zawng Indian Airforce hnena hralh an tumna lamah he parallel runway hi awm tura ruahman a ni. Chu chu a kal zel ang a, sorkar hmasa ruahmannaah chuan, khu airport khu nakinah chuan *international corridor, international airport* ni thei turin ruahmanna a kal avanga hei hi sawi kan ni.

Kan Ex-Chief Minister Pu Zoramthanga khan central-a Civil Aviation Minister te pawh a sawipui a. Amaherawhchu, August thla khan DPR kan peih chauh avangin, thui zawk kan kalpui hman ta lova. *In principle*-in thil thui tak sawi a ni a. Tichuan, ministry thar a lo piang a, (kan tihsual te pawh a awm ang a, khulaia airport lam hruiute an lo inthlak nen) he ruahmanna a awm thu hi kan sorkar-thar kha kan lo hrih lo a, (kan Chief Minister nilai pawhin a hriat loh thu a sawi kha). Chungte avang chuan kum khat chuang bawhzui lohin a lo awm ta ni. Helaia ka sawi duh chu, khu airport khu vawiinnia cabinet meeting khan 'Airport Authority of India nena indawrna kal tur tihtawp ni rawh se' a ti a. A dik tak chuan, thu kan sawi duh dan te pawh hi *half-truth* (a chanve dik) te hian kan sawi a. AAI te leh MNF sorkar te pawh kha an indawr a lawm; draft MoU an rawn siam a, kan ram tana tha lo ram neih hlen te, airport hralh theihna tur thuneihna pek te kha MNF ministry khan a phal hlawl lo. Khu ram khu hralh a phal lo; an kuta hlan kha a phal lo, nangmahni ang tho hian. Nangmahni chauhin inphal lo emaw inti thin a. Chuvang chuan, khatiang kha MNF khan a lo phallo daih tawh a ni.

A dawt lehah chuan, kan House Leader pawh hei hi ka ngen a - Kan cabinet khan IAF leh Airforce nena indawrna tur lampang leh feacibility lam te, MoU lampanga a hawi ngur ngura kha withdraw hram selangin. Airport Authority of India nen emaw kan State-in a enkawl thei ngang lo a nih chuan kan indawrna turah te thluak han tiche deuh teh se, kan House Leader hian, opening siam leh hram rawh se.

A dik tak chuan, kan House Leader hian Civil Aviation Minister takngial pawh vawikhat mah a la sawipui lo. Courtesy visit a zu neih pawh khan Prime Minister nen pawh 'tul bik chu sawi khawm zel ang aw' an ti a. DoNER Minister pawh a thianpa-fapa a ni a, thil thui tak a sawi theih a rinawm a ni. Chuvang chuan, kan Chief Minister, senior politician kan nei a, ani hian theih tawp chhuah rawh se. A tul anih chuan Pu Speaker, i veilama mite nen joint-legislator pawhin kan kal ang chu maw le. Kan BJP unaute pawh hian 'kan pui thei' an ti a lawm maw le. Keini pawh kan ding reng ang, a tul anih phawt chuan. Aizawl khawpuaia political party hrang hrang leh NGO te pawhin 'kan airport atan hian India hi inhawng rawh se' tiin, kawng pawh kan zawh ang chu maw le. Buana hmaa kherha, 'an theilo' han tih vel, hmaichhana inbiakna pawh awmlo, virtual conference vela tiha

thutlukna siam hi zawng a pamhmai deuh e, Pu Speaker.

Vanneihthlak takin vawiinniah Civil Aviation Secretary-ah Mizo-tlangval a awm a, chumi chu telephone pawhin an lo be mai thei, be lo mai thei, ka hrelo. Amaherawhchu, hmanni lawkah IAS senior ten an zuk bia a, a thusawi tawite social media-a lo langah khan, kan sorkar hian hemi tan hian a bei tawk lovin a hria a ang ka ti, ka reading-ah chuan; amah pawhin lo puih a inhuam niin ka hria. Airport Authority control theitu tur mizo-tlangval lal tak kan nei alawm maw le. Chu pawh chu kan Chief Minister thianpa-fapa, naupan lai atanga a hriatchian em em a ni. Ani pawhin Mizoram Chief Secretary atan pawh a it thu kha remchangah khan a sawi tawh a ni.

Chuvangin, vawiinniah kan sorkar hi ka ngen nawn duh a ni. Kan NGO zawng zawngte pawhin an duh lova, an ngen a, kan sorkar hi an ngen nawn awn-awn a, in ngaihtuah nawn hram se. Pu Speaker, i hriat angin NGO - Central YMA te, MHIP te Upa Pawl te, MZP leh MSU ten hei hi an phal ngang lova, ni 9.8.2024 ah khan Chief Minister hnenah pawh airport tiral lo hram tura an ngenna an thlen tawh a ni. A dawtah kan Central YMA-CEC in an ngaihtuah leh a, sorkar hi a la kal zel niin an hria a. Ni 27.1.2025 ah khan Central YMA chuan sorkarah ngenna a rawn siam leh a ni. Chu chang a nilo, Aizawl-city Students Union ten Lengpui airport, Airforce hnena hralh an duh loh avangin Chief Minister-ah ngenna an rawn thlen a. Tin, Mizoram pawna awm Shillong YMA Group te, MSU ten ni 29.1.2025 khan Chief Minister hnenah, “Shillong lamah kan awm a, ram leilung-fa Mizoram mite kan ni tho a. Kan experience enin, kan Chief Minister hian ngaihtuah nawn hram rawh se. Shillong Peak, kan kawmhak lawkah hian airforce an inbun a, thlawhna tum hmun helipad an neih pawh a bul vela mipuite a intibuai nasa lutuk a, hnawk an ti a, Meghalaya Assembly-ah pawh Khasi MLA pahnihin an harsatna pawh an auchhuahpui lawm-lawm a ni” tiin, kan Chief Minister hnenah lehkha an rawn thawn a.

Tin, chu chang a ni lo. Kan Chief Minister hian Delhi a zuk kal tum (Ni 6.1.2025)-a a thu rawn sawi Press Conference-ah khan, “Lengpui Airport hi Airport Authority of India hnenah emaw, Adani Group emaw hnenah kan hlan ang; Adani phei chuan DO letter an rawn siam tawh”, a ti a. RTI hmangin mi-thahnemngai ten ‘Adani chu eng angin nge an inhuam’ tih an han zawt dawn a, vanduaithlak takin, “Adani Group DO chu hmuh tur a awm ta rih lova; maintain a ni rih lo nge, tul a ti rihlo” tiin RTI chhanna kan dawng a ni. Chulo lehah chuan Pu Speaker, vawikhat chiah ka sawi leh duh chu - i dinglama thute ZNP annih lai khan, party hrang hrang - MNF te, ZNP te, MPC ten joint-resolution ni 6.10.1015 khan an siam a. Vawiinniah he House zahawm taka kan thianpa Hrangturzo Bialtu, hnam vei ngut mai te hian an lo sign a, amah hi vawiinniah kan House Leader right-handman a ni. Chu chuan, Indian Airforce hnenah ZNP ang pawh khan an hlan duhloh thu an lo pass tawh a, an sign thlap a ni. Chung document zawng zawng chu Pu Speaker, hei, ka kawl vek a. Kan House Leader hian a kawl sa te a lo tihbo takin i dawhkan zahawm tak kaltlangin, i remtih chuan, ka hlan duh a ni.

A tawp lamah chuan Pu Speaker, kan House ka ngen duh chu – Ni 16.10.2024-a AAI te nena indawrna sorkarin a tihtawp tak kha, khawngaih takin kan House Leader hian tinung leh sela, theih tawkin i bei ho ang u. Vawiinniah chuan hei hi kan rem tilo a ni. Kohhran-upa a ni a, kohhran committee-ah te chuan mi ala hmin kim lova, member zinga mite an la dam kim ngang lo te anih chuan, ‘i ngaihtuah tha rih ang hmiang, kan ti fo thin e’ an ti a. Vawiinniah hian ram tana a rawngbawlpui party hrang hrangte hian kan remtihloh thu

kan sawi a, NGO hrang hrangin an remtihloh thu an sawi a. Tute emaw mi-thahnemngai tak tak ten TV interview an neiha ka fak em em chu, Indian Airforce-a hun rei tak lo awm tawh kan senior thenkhat - Wing Commander leh Surgeon ten airforce hlauhawmlloh zia an rawn sawi kha chu, an tih tur a ni. An hlawh petu, an pension petu, vawiin thlenga an chhungkaw chawmna petu chu an tan tur alawm maw le. Kha kha an titha ka ti. Amaherawhchu, thu lakna ber tur a ni lo.

Vawiin hian ram tan, hnam tan, kan tu leh kan fa kal zel turte tanah airport kan neihchhun hi tiral lo ila. Indian Air Force hian engvangin nge an duh? Amah Pu Muanpuia, Hrangturzo bialtu, ka thianpa sawi ka'n sawi chhawng leh ang a - "Vaiho in an duh a, tha an tih viau chuan, Mizo tan a thalo a ni" a ti thin a. Chuvang chuan, heti tak maia an rawn vir an rawn vir hi, kan neihchhun min chhuhsak tum pheta offer tha tak an ti hi chu, Mizo tan chuan a hlauhawm hrim hrim. Tun hun atan chuan anni lam hi i haw lul lovang u; 'in lamletna hun timing a ni' tiin. He resolution-ah hian sawi duh tam tak nei mah ila, a nihna ang anga pawm a har anih pawhin, leh, kan cabinet pawhin AIF hnena pe tura decision a lo siam tawh anih pawhin hei hi en leta, AAI nen thawh ho chhunzawm dan zawng zawk turin kan insawm a ni. Tichuan, he Resolution hi ka thlawp thu Pu Speaker, ka sawi a ni e. Ka lawm e.

SPEAKER : A lawmawm e. Tunah chuan kan House Leader Pu Lalduhoma ilo sawm ang u.

PU LALDUHOMA, CHIEF MINISTER: Pu Speaker, ka lawm e.

India ram hian Man Mohan Singh-a, tukina kan sun tak kan han neih atang khan reformation lam hi kan hawi nasa em em a, chuta tang chuan a rampum huap central-a ruling apiangte ngaihpawimawh em em chu - *National Monetization Pipeline* hi a ni chho ta ngar ngar a. Chu chuan engnge a ken, kan tih chuan, *disinvestment* a keng a ni. Sorkar hian thil hi khawih tam lutuk lo sela, private-ah te, corporation emaw, (company-ah te pawh a ni ang a) privatize dan emaw, out-source dan emaw ngaihtuah kha a kalpui lian ta em em a. Keini pheichuan chu *disinvestment policy* chu a mamawh berte kan ni a, a chhan chu - resource kan neih tlem vang a ni. Chuvang chuan, ZPM hian kan election manifesto-ah khan, "*resource mobilization committee* te kan din ang a, *disinvestment* hi a theih chin chinah kan kalpui ang" kan ti kha a ni a. Chu chu mipuiin tha min tihpui a, he dinhmunah hian kan lo awm ta a; chumi kan bawhzuina, 'kan policy bawhzuina kal zel a ni.

Tichuan, inpuh tawn tur vak kan awmin ka hre lova, a sorkar apiangin kan manganpui thil a ni a. Congress an lo sorkar hma daih khan MNF-in kan airport hi AAI hnena hlan tumin hma a lo la daih tawh a, chu an hmalakna chu Congress sorkar khan a chhunzawm a, 2015-ah khan thutlukna a siam ta a. Chutah chuan, "AAI hi dawr tlak an nih ngang loh hi; Indian Airforce lam hi hawi teh ang" an ti ta a ni. Hemi chungchang ka han sawina chhan chu, khatih laia kan Chief Secretary Pu Lalmalsawma'n press mite hmaa a thusawi document kan based a ni, keini chuan. Chu chu pawnlamah tuten emaw 'thu diklo a ni' tiin min sawi sak a, tute emaw 'ka bia, ka kawm' tih mai maiah he House-ah hian thu kan sawi turah ka ngai lova.

Chuvang chuan, Pu Speaker, (i remtihlain) ka'n chhiarchhuak ang a. *Save Mizoram* Dt. 12.10.2015 - "Chief Secretary Pu Lalmalsawma chuan Lengpui Airport Indian Airforce kuta hlan chu sorkar phurrit chhawka tur a nih thu a sawi. Vawiin khan Aizawl thuthar

lakhawmtute kawmin Chief Secretary chuan, Airport enkawl chu state sorkar tan a hautak hle avangin, Airport Authority of India kutah hlan rawt phawt a ni a. Amaherawhchu, Airport Security chu state sorkarin a la tum zel dawn avanga phurrit a kian vak loh avangin, Indian Airforce kuta hlan tha tih a ni ta zawk a ni. Hemi chungchangah hian thutlukna siam a la ni lovin, indawrna kal lai mek a ni” tih hi a ni a. Pu Speaker, hei hi House property atan ka rawn hlan e.

Kha kha a ni mi thenkhatten, ‘thu diklo a ni’ an tih vak vak chu, pawn lamah. Keini chuan document behchhanin thu kan sawi thin a.. (*interruption*) Kha kha chu, thu hretu te kan ni ve lova, keini kan inngahna chu verbal ni lovin, *document*-ah a ni. Kha document kha a diklo anih chuan, Congress party hian an disprove tur a nih ka ring. An challenge awm reng ka la hre lo. Chuvangin, kha kha kan inngahna a ni. Engpawh ni se, AAI-ah hian an lo beidawng ve tawh a ni tih chu a chiangin ka hria a. Tichuan, ‘Indian Airforce lampang hi han tichhin ve ila a tha zawk ang e, tih ngaihdan an nei’ tih pawh a chiangin ka hria. ‘Thuthar-lakhawmtute a kawmna ah’ tih a nih kha. Khati chin kha Congress hmalakna ka sawi zawk duh chu ni mai se.

MNF hmalakna kha han sawi ve leh thung ila. Khu airport kan enkawl atanga kum 6 chauh kan la enkawlin, MNF sorkar kha a beidawng der tawh a ni. Kum 2004 ah khan AAI hnena hlan tumin hma a lo la daih tawh. Chu chu ka dem a ni lo; harsa an ti ve a ni; Sorkar apiangin harsa kan ti a ni. Tichuan, draft MoU pawh AAI chairman hian a rawn thawn a ni. Chu chu 2004 a ni a, 2008 ah chuan ‘hemi in draft MoU hi kan pawm thei lo a ni’ tiin, Controller hian lehkha a thawn thla veleh ta a. (Pu Speaker, hei pawh hi House Property ah kan dah leh ang e.)

Tichuan, MNF sorkar pawh kha AAI ah hian a lo beidawng a, ziakin an beidawna leh an pawm theihloh thu pawh an dah a. Chuti chung chuan an inbe chho zel a, 2020 ah khan draft MoU an siam leh a. Chu chu a copy kan nei a ni. Mahse, 2004, 2008, 2020 tea MNF-in AAI a dawrna reng rengah khan, a hnuhnung ber 2022 ah hian engmah hmasawna tur a awm lo a, pawm theih thil a la ni chuang reng reng lo a ni. Khati chen sorkar, keini aia experience ngah zawk te pawhin a an lo tih hleih theihloh kha, waviinah hian ti turin kan innawr ta vak mai a; min ngai-ropui lutuk hi a lawmawm ang reng bawk si a. Tichuan, kan han chhonzawm ve ta mai a ni, keini chuan. MNF-in 2022-a draft MoU a lo siam kha kan han zir ve ta a ni. chumi kan belh chian chhoh dan a chu kan la sawi ang a, chumi hma chuan... (*Interruption*)

PU LALCHHANDAMA RALTE, OPP. LEADER: Pu Speaker, *Point of Clarification* – ‘MoU MNF siam’ tih khan khawngaihin ti lo sela. ‘AAI ho MoU siam MNF-in a pawm lo’ ti se ka ti khawp mai.

PU LALDUHOMA, CHIEF MINISTER: Pawm loh zia in rawn confirm a, ka lawm khawp mai. Keini pawhin pawm harsa kan ti ve; kan inang khawp mai. Indem tur vak hi kan awm lo.

Amaherawhchu, a ram khu (Nichinah khan kan Working Committee Chairman khan a rawn sawi nual a) 2012 a Congress sorkar khan blast-pen atan acre 32 a lo pe a ni. Chu chu 2019 khan ‘MNF sorkarin a lo cancel leh tawh’ tia sawi a awm a. Sawi a awm avang hian a finfiahna kan zawng a, kan la hmu thei rih lo, tunah chuan. Sorkar hian a cancel-na

kan la hmu lova, kan han dap zel ang a. An lo la cancel lo a nih pawhin, kan cancel ang kan sorkar hian.

Tin, Sihphir-ah mimal ram acre 5, Lengpui-ah acre 138 (a vaiin acre 143), crore 248 man chu MNF sorkar khan a lo tihpui bawk a, *No objection Certificate* a lo pe a ni. Chu chu tun hnaiah hian kan han hrechhuak a. Lengpui khaw mipui khuan han hria se, an thin a ur ngawtin ka ring. Lehlahmah airport a awm tawh a, a lehlahmah airforce in a han kar cheh tur kha an duh hi ka ring lo reng reng. A man te hi a tam khawp a, mimal ram crore 248 chu ava hlawk dawn e aw; lawkpuite an awm ang em! tih te rilruah chuan a awm a ni. (*Interruption*)

PU LALCHHANDAMA RALTE, OPP. LEADER: Pu Speaker, *Point of Clarification* - Vawiinah inlei a awm tawh em? Sihphir te pawh tunah an indawr mek an ti a; lei tawh anga han inchhuah leh, mipuia ‘*an va hlawk dawn em*’ han tih vel kha chu, a dik lo a ni. Thudik hi i sawi ang u, he House ah hian.

PU C. NGUNLIANCHUNGA: Pu Speaker, ‘acre 138-a zau cancel’ tih kha, Pu TBC-a youtube interview-ah khan a awm tlat a ni. Khalai kha kan lo ngaithla ngun ve a, tun thlengin order a awm lo a ni. ‘Cancellation order kan hmu lo’ a ti si a. Working Chairman khan a hmu tihna em ni?

PU TBC LALVENCHHUNGA: Pu Speaker, khalai kha *Clarification* atan: Indian Airforce airport hlan phalna kha cancel-na kan la hmu lo a. Amaherawhchu, blast-pen (fighter thuhrukna) airport chhung hmun hniha a lo pek kha chu MNF sorkar khan August, 2019 ah a cancel.

PU LALDUHOMA, CHIEF MINISTER: A that chu. Thil hi hriatsual a awm a, min ngaihdam kan dil a. Blast-pen bik chu cancel a ni a, a dang kha chu cancel-na kan la hmu lova. Chu chu ‘kan lo dap zel ang’ tih kha a ni.

Eng le, khaw le, acre 138-a zau crore 248 chu (tu ram pawh ni se) a hlawk ang tih chu a rin theih a ni. Chutah chuan sorkar a tel lo thei lova, MNF sorkarin 2019 khan NOC a pe a ni... (*interruption*)

PU ROBERT ROMAWIA ROYTE: Pu Speaker, *Point of Clarification:* Khawngaihlin, sorkarin acre 148 pek tur khulalah khuan a nei reng reng em ni le?

PU LALDUHOMA, CHIEF MINISTER: Mimal ram a ni a, a neitu hming te pawh kan hre vek a, hei document a awm vek a. Chu chu sorkar te nena tih tlan a nih avangin, sorkar khan NOC a lo pe a. Kum 2019-a pek kha lo kal Zelin, 2024 (ZPM Sorkar tawh hnu) ah pawh Aizawl DC office hian a lo la buaipui zui zel a ni. Chu chu tun hnaiah kan hrechhuak ta a, “E khai! Hei hi a tha hauh lo mai,” kan ti a, *Kept in abeyance* turin kan dah a ni. Kan ti tawp rih a ni.

Tin, a area khu Congress sorkarin 1998-ah a lo pek a ni a, bigha 2345 a ni. 2002-a MNF a lo sorkar khan an han teh that tir a, bigha 10-in a lo zim ta a. 2006 ah MNF sorkar bawkin a teh that tir leh a, bigha 775-in a lo zim leh zual ta a. Tichuan, a tira Congress hunlai ami ai khan MNF Sorkar-in a 2006-a a teh that tir hian bigha 786 ngawtin a lo zim ta a ni.

Congress sorkar ram pek sa kha MNF sorkarin a tizim ta tihna a ni a. Amaherawhchu, an la tang tlang tha angreng khawp mai tho a; VC-ah te an tang tlang a, hei, ‘an in-merger dawn’ tih te a awm a ni a, deuh-ina. Tichuan, ZPM-in kan han teh that tir ve a, bigha 165-in kan zauh a ni, leh ta-ina. Tiang chuan, theihtawpin tan kan la a. A chhungah pass neite pawh an awm a. Amaherawhchu, airport ram tur a ni a hei hi chu. A nih nih kan nim ai ang a, a khin leh kan inkhing ang a, theihtawp kan chhuah ang kan ti a. Tunah khuan kan demarcate fel vek tawh a, fencing kan ti dawn tan a ni.

Tichuan, Pu Speaker, vawiina kan thusawi kha hriatthiam har ka ti a. A thenin, “Airport hi Mizoram sorkar kutah awm zel rawh se,” ti zawngin an sawi a, a thenin, “AAI hnenah hlan ni rawh se; dawr tha leh rawh u,” an ti bawk a. Vei lama mite kha an tan dan a inanglo nual mai a; a eng zawk ber kha nge ni ta tih pawh ka hrethiam chiah lova. Tunah hian, CISF 214 rawn dah an tum a, kan tang tang-tang a, kan tang zo lo a ni ber a. Hmanni Home Secretary lo kalah khan kan han sawi dun a, ‘engpawh ni se, tunah khuan police 100 awmna chin chiah kan nei a. 100 rawn tir phawt mai ula, a bak hi chu kan lo inpeih ve deuh hunah an awmna tur te kan han sa ve ang a; a intahtawlin in rawn tir dawn nia,” kan inti a, kan inngen a. Tin, “sum te pawh a ngai dawn a; an hlawh kha engtin nge kan tih ang” tih a ni a. Kum khata an hlawh tur kha crore 22 chuang a ni a. Tichuan, heta tanga fee kan hmuh hi kum khatah crore 2 chauh a ni bawk si a, a daih lo nasa em em mai dawn a. Chung te pawh chu ‘min ngaihtuahpui kan ngai ang’ te kan ti a. Tiang chuan, kan han buai mai ta zel chu a ni a.

Tin, license hi kum khat danah te min pe a, tunah hian hun tlem te chauh kan nei tawh a. Tunah hian 36 PCN hi repair turin min ti a. A PCN tisang tur chuan thawh chhunga flight cancel a ngai a, thlawhna runway hran te chu nei ila, “hetah hian lo tum rih rawh se,” a tih theih a; kan nei bawk si lova. Chuvang chuan, a PCN tisang tur khawpa siam tur chuan thlawhna service tihtawp rih a ngai a ni. Tikhuan, zanah te zingah te, a thlawhna tum loh lai te chuhin theihtawp kan chhuah a. Tunah hian crore 80-in recarpeting (recarpeting chauh) kan bei mek a. A tak taka PCN 70 bawr vela siam tur chuan a ngai tam em em a, hun pawh a duh rei a; rei fe thlawhna service kan tihtawp a ngai hrim hrim dawn a ni.

Tichuan, tuna a terminal building chin operation ringawtah hian hlep te pawh a awm ve tawh a. Amaherawhchu, cargo service te, a building te, parallel runway te kan la mamawh a. Tin, PCN tihsan te a ngai a, Instrumental Landing System tha te, ATC tha te kan awt a. Building te pawh, kan thalaiten mi airport an en a, an rualawt a, khuti ringawt renga dah thu khu a awm lova. Tihchangkan leh tihmawi deuh te kan duh a. Tin, water supply scheme lian a ngai a, electric chutiingin a lo ni vek a. Khang a capital investment zawng zawng nena chhut chuan kan hloh ang a. Hloh kha kan inhuam a, Sorkar chuan a hloh tur pawh a ni. Amaherawhchu, kha chuah kha sum hmanna tur a ni lova, Sorkar chuan sum hmanna tam tak a lo nei si a. Chuvang chuan, kan thalaite rual awt ngawih ngawiha awmte duhkhawp tur hian keimahni sum chuan a har dawn em em a, a chhoh kal deuh hlek a ni. Chu chu sorkar hmasa te pawhin an ngaihdan tho a ni a, kha vanga kawng dang lo dap kha kan ni. Hei hi kan ni tlang vek a ni; inhriatthiam tlan a tha ka ti.

Tichuanin, *chepa leh vahrit* kha kan sawi vawng deuh a. Chepa leh vahrit hi Mizo thufing a ni a, a chhe zawk leh a tha zawk sawina a ni mai a. A inthat hleih em a ni, kan dawr pahnih te hi. AAI chuan a ram hi ‘a thlawnin kan nei hlen ang’ an ti a ni. Indian Air Force chuan ‘a lehlam zawng hi lease in kan lo lei ang e’ an ti a ni. An lei ang a, a man kan tel

ang a, a ownership (a neitu) chu kan la ni reng dawn a ni. Lease-in kan pe dawn ni. ‘Hralh’ intih vak vak tur a ni lo, kha kha. A ram neitu chu kan la ni reng dawn; *Bengal Eastern Frontier Regulation, 1873* hnuaiyah he nihna hi chu kan la nei reng a, Article 371(g) hnuaiyah kan la nei reng bawk a ni. Chuvang chuan, *lease* erawh chuan kan pek a ngai. Assam Rifles te, Industrialist te pawh *lease* in kan pe a. Amaherawhchu, a thlawn ringawta pek ai chuan a man dawn kha kan duh ve a ni.

Tichuan, ‘ram kan mamawh belh chuan acquisition min tihpui ula keimah niin a man ka pe ang’ an ti leh a, chupawh chu *lease* vek tur a ni. Chutih laiin AAI chuan, ‘a thlawn vekin min pe ula a neitu kan ni ang’ an ti a, a ownership an insist a ni. Engtin nge non-tribal in tribal ramah ownership hi an rawn insist ngam zawk ni. Kan pe theilo reng reng kha chu; political suicide a ni ringawt. Kan Article 371(g) a zahawm lutuk; tihngaihna a awmlo reng reng a ni. Kha kha kan pawm theih loh chu a ni a.

Tin, chu lovah chuan, AAI hian ‘a hlawkna zawng zawng kan tel vek ang’ an ti a, cheng khat mah min share an tum lo. ‘A hlawkna zawng zawng kan nei ang a, water min supply ang a, electric min supply ang a, security pawh min tum sak ang’ an la ti ta tlat a ni. Khatiang neuh neuh kha chu a detail in luhchilh lo mai ila. Helamah Indian Airforce ve thung chuan (a ram chu kha ka sawi zo tawh a), ‘parallel runway te pawh siam kan duh; kan sumin kan siam ang. Tichuan, tuna awm sate pawh hi kan sum vekin kan upgrade ang a; instrumental landing system leh khatiang zawng zawng kha keimah niin kan tum vek ang. Airport runway chin piah lamah hian kan inhung dawn a, chutah chuan security pawh keimahniin kan intum dawn. Airport pangngai chin hi nangniin in chang ang a, chutah chuan a security pawh in tum ang a, a hlawkna zawng zawng pawh in ei ang’ min ti thung ta a. Tichuan, chutiang chuan lo ti chhin dawn ta ila, kan indawr mek a ni mai a. Indawr chuan khang zawng zawng kha chhawpchuah a ngai ang a. Kha kha lo puitlinin, lo intawm ta ang ila, mipui hian Airforce hmel chu an hmu dawn lo reng reng. A terminal building leh engkim khu a ngaiin a la awm vek dawn a, a piah lamah a ni an awm dawn ni. Khalai kha ka han sawi Chiang duh a ni.

Chuvang chuan, a inthlau em mai a, duhthlan dawn ralah chuan thlanawm hlei tak a ni. Tin, khatiang a nih avang khan cabinet meeting-a vawikhat report an rawn thehluh khan, ‘Heti a nih chuan, AAI chu dawr zui tawh lo mai rawh se’ kan ti a. A chhan chu, an chairman khan kan lehkha pawh an chhang duh tawh si lova, kan phone an la tawh bawk si lova an phur lo niin kan hria a. A chhan chu, India ramah Airport enkawl mek an ngah a an hloh mek reng a. ‘Engtin nge kan Airport enkawl mek hi kan deh ral theih ang’ tih hi an ngaihtuah ber a ni a. Tunah hian, Airport 25 an dek ral tawh a ni, midang kutah; Guwahati te pawh Adani hnenah an pe daih tawh a ni. Chu chu an tum a ni tih kan rinna chu, thuthlung pakhatan khan, ‘AAI in kan lo lak chuan, midang tupawh hnenah kan lo hlan chhawn dawnin Mizoram sorkar remtihna kan la lo ang’ tih kha an telh tlat a ni. Hralh chhawn leh an tum tih kha a lang reng; an enkawl sa pawh an dispose zel a, hralh zel an la tum a. Amaherawhchu, sorkarin tul a tihnaah chuan, Sorkar cooperate body a ni a, hloh pawhin a ti tur a ni a. Chutiang hloh a *run* pawh tam tak a nei mek reng a ni. Kha kha a nih avangin Cabinet khan, ‘hetiang a nih chuan anni hi dawr zui tawh lo ula, Airforce te hi lo dawr zui zel ula; tichuan in indawr theihna ang ang chu a draft in rawn thehluh leh dawn nia’ kan ti a. An la rawn thehluh lo a, kan la ngaihtuah lo hrim hrim a. Chumi a lo luh hunah chuan Cabinet in tha a tih chuan, a pawm thei a; tha a tih loh chuan, a pawm lo thei bawk a. Chumi stage ah chuan tunah hian kan la awm rih a. Resolution ina ‘hlan an tum; hralh

an tum' tih ram khan kan la dai pha lo hrim hrim a ni.

Tin, heng zawng zawng hi *terms of reference* chhunga mi vek kha a ni a, terms of reference bawhchhiatna a awm lo a ni. Nichinah khan, 'Mizoram Airpor-naupang te hian Airport-upa tak tak Silchar te kan leh pel vel tawh' han tih kha a awm a, heng hi thil kan hrechiang lo deuh niin ka hria a. Silchar hi inhman tawm ve tho a ni a, Airforce nen. Assam ram chhunga 2nd busiest Airport a ni a, tunah hian. Northeast ah hian 4th busiest Aiport a ni a, India ramah hian 36th a ni phak a ni, Aiport 330 vel bawrah hian; chuti khawp chu Silchar Aiport te chu a ni tawh a. Anni umpha tur chuan kum rei fe kan la mamawh ang. Chuvang chuan, kan thudawna te hi tlemin belchiang thin I la a thain ka ring a.

Tin, 'parallel runway tihna tur sorkar hmasain a ruahman' a tih kha Pu Speaker, hei hi a ni a - Pi Dr Renu Sharma, kan Chief Secretary hlui khan August ni 16, 2023 khan a lo zuk theh thla ve a. Hetah hian airport lam hawi awmchhun chu, Modernization of Lengpui Airport - ₹500 crore chiah a ni; hei bak hi engmah a awm lo. Chu pawh, a kawng awm chhun tur chu DoNER atanga PM-DeVINE emaw bak kha chu source dang awm theihna tur a awm lova. Kan sawi fo a, hengah te hian parallel runway a tel lo reng reng a, sawi a awmlo reng reng; upgradation te pawh a awm lo; a in *modernization* tih zawng hi a ni. Hei pawh hi *House Property* ah kan hlan leh ang e.

Tichuan, *lekhathawn* an sawi te kha, a then kha ka dawn awm ka hre lova, a then kha chu ka dawng ngei mai a. Kan lekhathawn te hi min lo dawn khalth thin nge ni! Tin, '*ZNP hunlai khan*' tih kha a awm a, hman lai thil kan sawi zel chuan, independent la sual leh te a ngai ang a. Tunah kan sual tawh lo, khang kha chu hun a danglam tawh a ni, tih kha hria ilangin.

Tin, a tawp berah chuan Pu Speaker, thu belhchian dawl lovin Mizoram mipui a tichi-ai em em a ni a, tunah hian. Airforce veteran ho, *Zoram Kalsiam Zonet* program interview kha i thlir theuh teh ang u. Zoram mipui pawhin kha kha lo thlir teh se; khatah khan thil a chianguang khawp mai. Khang kha pension thak thaka thawk, a taka hria technical-mi an ni a, keini chu kan ni ve lova. Khang ho hnen atanga kan thu hriat kan sawi chhawng a, kan thu dawna source a inan loh chuan kan inhnial ta mai mai ni hian a lang a. Anni ho, officer paliten an hriat dan an sawi kha chu a pawmawm khawpin ka hria. 'Airforce hnena kan hlan chuan air ambulance a tih theih lovang' te kan ti a. Hotu pakhat chuan, 'airforce kuta a awm chuan, air-ambulance ti tur chuan Shillong-ah dil phawt a ngai ang a, khutah Delhi, an center ah chuti khati' a ti a, a sawi kawu nuai mai a. Mahse, he mite hi chuan 'darkar 2 chhungin a tihfel theih; COO in a tifel vek thei; kan tifel fo an ti mai, a lo hlauhawm lem loh' an ti a ni. A lo awlsam khawp mai.

Tin, *non-schedule flight* hi, hetah airforce pawhin thlawhna a nei a, India Airline kha a ngah ber tur a ni a, tichuan airport neitu kan awm ta a. Khang zawng zawng chunga thuneitu chu DGCA a ni a. Kha khan *air-timing* zawng zawng a ruahman vek a. Helaia airforce a nih avanga a lo tihbuai khan Aizawl - Kolkata flight thlawkchhuak tur kha darkar khatin delay se, kha kha Delhi emaw, Mumbai emawa thlawk leh tur a ni a, a *chain* a tibuai vek. Khatianga tihbuai theih a ni lo. DGCA in a lo ruahman tawh ang hi a kal dan a ni a, chu pawh chu airline te nena inbiakremna advance-a siam vek a ni. 'Hetianga airforce ina an tihdanglam hi kan la hre miah lo' an ti bawk a nih kha. Chuvang chuan, khatiang nilo emergency ... (*Interruption*)

PU LALRINTLUANGA SAILO: Pu Speaker, *Point of Order* - Tuna kan House

Leader sawi kha a dikna chen a awm ang a. Amaherawhchu, *Working Committee on Lengpui Airport* Chairman hova tuna Wing Commander a han sawia kha a zuk kal ngei a, Pu Saidenga te nen. Indian Airforce kuta hlan a that zia, hospital te, school te an din zel dan te zu campaign-a kal kha a ni a. Ani hi Wing Commander pawh ni se la, khalamah experience a nei lova...

PU LALDUHOMA, CHIEF MINISTER: Airforce pawh an dawr a, an indawr dan te chu a chairman te chuan an sawi tur a ni. Chu chu kan hnenah pawh an rawn thehluh tur a ni. Khang zingah khan “Airforce chuan hospital tha tak tak te, school tha tak kan din ang a, chu chu mipui tan a tangkai khawp ang” an ti a, chu chu kan veteran ho pawh hian an sawi leh tho a ni. An awm tawhna zawng zawngah civil miin an hospital leh school te an chhawr zia an sawi a ni. Thil an hmuh dan kha an sawi chhawng ve a ni mai a.

Tin, ‘helaia a lo tum theih lohin, Tripura ah tum a ngai a, chuti khati’ an ti a. Airline reng reng hian an tumna tura an tum theih loha an tum lehna tur *alternative* hi an ruahman sa vek; kha kha airforce leh airforce lo lam a ni lo. Tin, ‘*a bengchheng*’ tih a ni leh a. Jet fighter hi a thlawhchhuah dawn chhoah second 2-1 chiah a bengchheng; a bak chu thui deuha tikhan a kal mai a ni. Tin, ‘min bomb hmasa ang, chuti khati’ tih te pawh expert hovin an han sawi, ‘Lengpui Airport bomb a tul meuh hi chuan India ram chu a chhe vek hman tawh ang’ an ti a ni. Chuti khawpa strategic lo a ni a, Lengpui Airport hi. Tin, khatiang hmun tur atan khan rawn siam dawn se, ‘airforce hmunpuia siam tur hian a hmun hian a daih lo hrim hrim; engtikah mah hei hi chu a theihloh ang’ an ti tawp. Chungte pawh chu kan insawithaih lutuk deuh hlek a.

Tin, ‘*joint-user airport*, a intawma an hman reng rengah hian a tlangpui thuin 80% civil in an hmang tangkai a, 20% vel chauh hi airforce hman a ni. Military exercise an ti ang a, chuti khati’ an ti a, military exercise reng reng Mizoram ah hian tihna tur space a awm lo an ti a nih kha. Hla takah, thawm bengchheng, hriat phak loha silai kah theihna ah military exercise chu an ti thin.

Tin, ‘min dang ang kan lut thei lo ang’ an ti a. Anni chu compound hranin an inhung daih tawh a lawm. Chuta lut tur chu sikul naupangte leh, ID neite kha an ni dawn. ‘Civil nen kan inawmpawlh dawnlo’ tih te kha hria ila. Mipui hi kan intihthaih nasa em em mai a, an hriaten an sawi kha i awih tlang mai teh ang u; ‘kan *source of information* hi i fimkhur tlang teh ang u’ kan ti mai a ni.

A tawpah chuan, tunah hian duhthlan tur pathum kan nei a –

Pakhatna: Sum nei ila, tu hnenah mah hlan lo ila, Mizoram sorkar hian enkawl zui zel ila tih hi kan duhthusam number pakhatna a ni. Chumi atan chuan kan NGO Co-ordination committee-te nen thuthlukna kan siam tlang a, kan inkawmna-ah. 16th Finance Commission an lo kal dawn a, chu 16th Finance Commission chu an hmu ve dawn a ni, kan NGO te hian, ‘Chutah chuan thehtawpin lo nawr rawh u’ kan ti a.

Tin, helaia official te nena inhmua engkim a zawh tawh vek hnuah a mimalin minute 15 kan inkawm fal dawn a ni kei pawh. Hei hi nichina ‘AAI in lo dawra in lo beidawng tawh anih pawhin, tinung leh rawh u’ tia kan Opposition Leader min han ngenna kha a zahawm a. Kan tinung leh hreh miah lo, kan in open a ni. Hmanniah Home Secretary a lo kal pawhin kan sawi leh a. An stand te kha change ve sela. Higher level ah an sawi a, ‘*terms and condition* an

tidanglam thei dawn a nih chuan, kan inhawng' tih kha Home Secretary ka hrihl a ni.

Tichuan, hei hi theihtawpin han nawr phawt mai ila. Party te pawhin kan hmu dawn tho a, nawr ho ilangin. Amaherawhchu, crore 1000 vel hi kan mamawh a ni, upgradation ah leh parallel runway atan. Mahse, hei hi chu vawikhatah inpek a ngai lo; kum khat chhunga kan zawh theih chin tawh kha a awm dawn a. Kha kha min hman tir theih chuan, a kum leh ah, tiang khan a kal chho dawn a. Vawikhata inthlak vek tur lam a ni lo a, India sawrkar tan pawh. Hei hi kan first option a ni a. Hei hi kan hmuha, khang a basic infrastructure a kha kan neih chuan a bak chu *maintenance* a ni tawh a, kan zo ve lutuk. Kan hlep ve tawh khatah kha chuan; a capital investment kha kan lungngaih vang mai mai a ni. Chu chu tuna kan hmabak a ni.

Pahnihna: AAI dawr thar leh kha (ka sawi ang khan) kan la inhawng. Kan han dawr tha leh ang a, higher-level ah pawh. An thu te an lo sawhsawn thei a nih chuan, a tha a ni mai a. Amaherawhchu, kan hmaa sorkar pahnih lo awm tawh pawh an beidawn tawhna kha a ni a, keini pawh kan han beidawng chu a ni ta der a. India rama an dinhmun kan enin, airport an enkawl zo tawh lo va, an dek ral zel a. Kha kha a nih mek lai khan, hetiang lam hi an hawi tawh lo em mai a, kan han huphurh a ni mai a. Amaherawhchu theihtawp kan chhuah leh ang, hetah pawh hian.

Pathumna: Tikhan, kan thang pahnih kha a per thelh chuan, a tawp; a pathumna chu *Indian Airforce* tho tho kha a ni. Kan indawr leh ang a, amaherawhchu, 'cabinet in an condition a pawm thei em, a pawm theilo em' tih kha a ni a. Mizo mipuite tana thalo tur chu kan pawm miah dawn lo. Kan tan a tha tur erawh chu huaisen takin kan pawm ngam ang. Chu chu kan kal dan tur a ni. Tute emaw sawisel avang ringawt leh, thil tha kan tih pawh min sawisel duhtu ten an sawisel ringawt avang hian thil tha kan tih ngamloh phah dawn miah lo. Kan ram tana tha tur chu kan ti ang. Amaherawhchu, kan ram tana tha lo a nih chuan, kan ti hauh lo ang. Chu chu Mizo mipuite ka tiam duh a.

A tawp berah chuan, kan resolution *wording* hi a diklo hrim hrim a. "Hlan an tum hi, hralh an tum hi" tih a ni a. Hlan tum a awm lo a, hralh tum a awm bawh si lo a. chuvang chuan, hengte hi chu lo pawm loh awm tak zawh hi a ni a. Hetiang a awm miao loh avangin, a resolution neitu hi withdraw turin ka request teh ang. Thil awmlo move vak kha a tulna a awm lo a. Chuvang chuan, withdraw mai se la, kan fel tlang a ni mai. Ka lawm e.

(Hon. Dy. Speaker at the Chair.)

DEPUTY SPEAKER: Aw le, tunah chuan, resolution neitu Tuirial bialtu MLA zahawmtak, Pu K. Laldawngliana kan sawm ang a, han wind-up sela, adopt han dil nghal se.

PU K. LALDAWNGLIANA: Pu Dy. Speaker, ka lawm e. Member zahawmtak tak mi 13-in ka resolution min rawn sawipui a, in zavai chungah lawmthu ka sawi duh a ni. Kan thusawi kha ka ziak deuh vek a, ka react tawh lem lo ang a. A tlangpuiin kan resolution min pawmpui vek a, 'hralh kan duhlo; hlan pawh kan duh lo' tih kha chiang takin kan hre vek a, Zoram-mipui zawng zawngin min thlir vek a. Kan dinhmun diktak, Working Committee Chairman te, House Leader zahawm takte, leh kan Opposition Leader ten a rawn sawi tawh bawh a. Anni kha an hming ka han point out duh deuh bik a.

Kan thusawi atanga chiang taka lang chu – '*Indian Airforce-ah hralh/hlan kan tumlo*' tih

kha a chiang tho a. Amaherawhchu, kan dinhmun diktak han sawi khan, ‘hralh lo thei lo dinhmunah kan ding a, Cabinet-in kan la pass lo e’ tih a ni a. Kan Opposition Leader ngenna, ‘*min ngaihtuah nawn sak thei em*’ tih kha, kan House Leader-in, “option pathum kan siam ang a, hei hi chu kan lo ngaihtuah nawn leh dawn nia; Cabinet-ah te pawh kan lo sawi nawn leh dawn nia; NGO te nen pawh kan zavaiin a tul a nih chuan, kan bawhzui ho leh dawn nia” tih thutlukna a lo siam a. A lawmawm ka ti hle a ni.

Tuna resolution kan rawn putlul hi a hun takah kan lo ti a ni a. Lo ti lo ila chuan, thil a kal thui khawp mai a, Cabinet pass mai tur kha a ni a. Ram mipui lungawi lo lutuk te, a sorkar lai ngei atanga phone kan dawn chu sawi loh, hmai chhana kan sawipui pawha an duh loh thu kan ngaithla nasa a. Amaherawhchu, kan dinhmun diktak kan ngaithla a, loh theihloh dinhmunah kan awm tawh avangin kan House Leader-in kan dinhmun dik tak a rawn sawifiah kha a lawmawm ka ti hle a ni.

Aw le, khatia a nih kha chuan, tun dinhmunah chuan ka resolution kha a pass theih mai lo em ni le? A pass vek theih mai a nih kha; a hnua lo ngaihtuaha tih tlan theih a nih chuan; kan pawm vek si a. Tichuan, kan inlungual tlangin ka hria. Khami hnua khawh ngaihtuah ho a sawikhawm leh tur kan ti ta a. A hnua kha chuan hmalak dan tur *point pathum* a rawn sawi a. Kha kha kan chhonzawm mai thei niin ka hria a.

Tin, ram mipuite pawhin kan thu leh hla min thir vek si a, kan ngaihtuah ber leh min ngaihchan ber a ni bawh a. Chuvang chuan, Zoram mipuite aiawhin he ka Resolution, ‘*Mizoram Sawrkarin Lengpui Airport Indian Airforce kuta hlan/hralh tuma hma a lak mek hi tha ka ti lova, titawp rawh se*’ tih hi House zahawm taka memberte min lo support-a min lo pass pui vek turin ka sawm ache u. Ka lawm e.

DEPUTY SPEAKER: Aw le, Resolution neitu in *adopt* a rawn dil a. Kan buk ang a.

“*Mizoram Sawrkarin Lengpui Airport Indian Airforce kuta hlan/hralh tuma hma a lak mek hi tha ka ti lova, titawp rawh se*” tih hi, adopt remti apiangin, ‘*remti*’ ti u la, Remtilo kan awm chuan, ‘remtilo’ ti ula. Remtilo lam a thum zawk tlat mai.

Aw le, Pu K. Laldawngliana, Tuirial bialtu MLA zahawm tak Resolution, “*Mizoram Sawrkarin Lengpui Airport Indian Airforce kuta hlan/hralh tuma hma a lak mek hi tha ka ti lova, titawp rawh se*” tih chu House-in a hnawl ta a ni.

Aw le, waviin atana kan Business chu kan zova, kan session hi kan chawl rih ang a. March Ni 3, 2025 (Thawhtanni) chawhma dar 10:30 AM ah kan thukhawm leh dawn nia.

Sitting is adjourned. (7:03 PM)